

## APOSTOLO: YEESU ME ÄTYEPÄNEJI BINAME BIME KAAKESEA POTO CIDI ME

<sup>1</sup> Yoo Teopilo, cane niinäce lui mene ne itu yogärepene, pui cabu puga ge mene Yeesu me kaakesea piiyepu abiberäja poto cidi me, teeme kaakesea me gije abacita cabu ca <sup>2</sup> ngälu Acejiyame te teebine cabucewe me ecatuji. Yeesu camuge cabucewe me otni, tabe lui biname bine ituge jäjacra teeme ätyepäneji biname me äbitame, teebibine bäärmii jegednemige Aceji Seemo me kokre ca. <sup>3</sup> Yoo, teeme budre ingwe ca, Yeesu lui footi bimu ngalebora bucourage padare cabu awabudnitanige teeme opo gaabe, pipu pi teepi toraca umle äbitininisi egä tabe lui ireclota ge. Teepi teebine jepänanisi, tabe mene teebibine jejananemige Acejiyame te lipu biname bine yaawademuge. <sup>4</sup> Tabe liba ten cama enajige, jejemige teebibine egä, “Gone saabmaluye Yerusalema ne, yepä puma jewagrijepeye Babe te lui ätityera poto cidi me umle ituge wawena, piiyepu cane lui poto cidi me jijipene. <sup>5</sup> Yoo, Yoane niiye yaacituge biname bime cabu teeme niiya mule äcisejame, yepä nesae pana bimu ingwe ca Acejiyame pa yaacitepi Aceji Seemo weeme yepäyepä trupa cabu me.

### *Yeesu Ädige Cabucewe me*

<sup>6</sup> Yeesu me ätyepäneji biname cina ten cama liba abasecretnige, teebine itemlisi egä, “Yageyame,

nää maane ai padare cabu Israela biname cääri padare nicärininite cimyägämu ire atwime?”

<sup>7</sup> Yeesu teebibine jejemige egä, “Peei lui weeme cabu lica gyene umle äbitame Babe te lui bimu piiyepu lui padare ituge acrana, ingle iyeta mule lui teeme ime cabu temi. <sup>8</sup> Yepä, Aceji Seemo liba pa tädepi weeme yepäyepä trupa cabu me, weene piba kokre ne pa jepänepeye teeme bau ca, siige mene pa jiicemepeye cebine aitnejame Yerusalem cewe ngalebora, piiyepu iyeta Yuudea gawe cabu ta, Samariya gawe cabu ta, cuta piiyepu iyeta gawecewe cabu ta.” <sup>9</sup> Ai mene liba siige, Acejiyame te Yeesu ne ecatige cabu me teeme ätyepäneji biname bime opo gaabe je. Carbe te teebine piba icwabige teeme päpäna ca.

<sup>10</sup> Yoo, tabe liba ädige cabu me, teepi ire ca ecanisi. Piba taatu neeneni biname bulubulu cäbletääpe cama tawabudnitäsi, jaaclajutige teeme gome, <sup>11</sup> jejemäsi egä, “Galilaya biname, weene ngena tääpume aclajuteji gemi ire cabu me? Peei Yeesu lui Acejiyame becatige weeme bau ca, tabe cire tacnenutepi yepä pana mule ca weene lipu jepäniye tabe otni cabu me.”

### *Biname Lui te Yuuda me Kaakesea Puupu ne Jecatige*

<sup>12</sup> Siige, piba Yeesu me ätyepäneji biname cina Olibi Uli podo cabu ca äcnärige Yerusalem me. Peei podo lui babo cewe mameta ge. <sup>13</sup> Teepi liba atyarige babo cewe cabu me, yepä mete cabu puupu cabu me eclige, teepi luma icrajinige: Peteru, Yoane, Yakobu piiyepu Andrea, Pilipo piiyepu Tooma, Bartoloma piiyepu Matayo, Yakobu

lui Alapeus me bägrä, Simona lui Kanana sigu biname ge, piiyepu Yuuda lui nuuja Yakobu me bägrä ge. <sup>14</sup> Teepi jäje labasecretnuge yepä gome irecu ätumutame, cuta ten cama puga ge poto magebi piiyepu Yeesu me mage Mariya piiyepu Yeesu me iganewale.

<sup>15</sup> Poto bimu ingwe ca Yeesu bau me ätrunga biname cina abasecretnige, iyeta lui pama yepä hanred twenti biname ge. Puma cita ca Peteru abujängtige mene jajanename. Tabé jejemige egä, <sup>16</sup> “Cäme binamewale, Acejiyame me Oogäräneji Mene te ibibi bääbitige, Aceji Seemo lui mene jiicuji Daawida me tage cabu ca ciige ngena cire läbitezepi Yuuda poto cidi me, lui Yeesu ne jaawabepi cubuyame bau me. <sup>17</sup> Yuuda mime tomi cabu ge, ingle Yeesu teebine itu ecatuji mime gigri kaakesea wawename.”

<sup>18</sup> Yoo, Yuuda lui rarekaake ecatuji teeme niiya kaakesea tääpume, tabe peei ca yepä gawe ne jelet-nuji. Puga pui gawe cabu tabe itramuji, camuge ipluji, came iyeta täsuji, siige budre äbituji. <sup>19</sup> Iyeta biname lui cina icrajuji Yerusalem cabu je, mene itecijemuji peei poto cidi me. Peei name pi teepi pui gawe ne teeme mene ca einujisi Akeladama ca, peei me abocломta lui Uudi Gawe.

<sup>20</sup> Siige, Peteru puma cita ca jejemige egä, “Salamo uupera peba cabu mene pisi nyene Yuuda poto cidi me egä,

‘Teeme mete te kaake läbitege;

nuuja te puma gone yaanajuge.’

Cuta nuuja mene egä:

‘Nuuja te teeme kaakesea puupu ne yaacatege.’

**21-22** Siige, pepu pi miiji nuuja biname te mine cama abasuta mene iicaname Yeesu me arpinenta poto cidi me. Miiji yepä ne acata mime tomi cabu ca; yepä lui te mine cama waatnetnäjuge iyeta pui padare cabu, Yageyame Yeesu liba mine cama ge. Pui padare ne gije jebacituji, Yoane liba niiye ca äciseja mene jiicemuji; siige pui padare teeme ngälu gaabe gyene, Yeesu liba lädepi mime bau ca cabucewe me.”

**23** Teepi puma cita ca jaajisi neeneni rooriye bine ngii: Yoosepa lui ne yaainusi Barsaba ca, teeme nuuja ngii lui Yuustus sine. Tabepä biname gyene, cuta nuuja biname ngii lui Matiya sine. **24** Teepi piba irecu ätumutinisi egä, “Yageyame, maane umle gäte iyeta biname bime ngene atwanena, peei name pi ai neenenibiname cabu ca niwabinini, maane lui ne ituge jaji. **25** Nää, maane singi laati te ai ätyepäneji biname me kaakesea pa yaacatege Yuuda lui ne itu saabmalepi, tabe liba budre täbitumi, niiyarage puupu cabu me tädumi?” **26** Yoo siige, teepi peei neenenibiname ngii bine yoogärisi matimati kula cabu. Matiya me kula te yuutrutige, siige teebine ecitisi pui lebin ätyepäneji biname cama abasutame.

## 2

### *Aceji Seemo me Otni poto cidi me*

**1** Pentikos bimu liba tädige, iyeta Yeesu bau me ätrunga biname cina abasecretnige yepä mete cabu me. **2** Teepi piba taatu itecijemige babo mumwämu carbe cabu ca. Pui mumwämu lui babo kokre buuwe pana ge, mete iyeta ngalebora

tabacitige teepi luma icrajige. <sup>3</sup> Teepi puma cita ca jepänisi muye wädräji pana gwidape bine lui cina äpletnärige, otninisi iyeta biname bime mope papa cabu. <sup>4</sup> Aceji Seemo te abacitanige teeme yepäyepä trupa ngalebora iyeta poto cabu lenajame. Teepi mene maramara jiicemisi. Aceji Seemo te lui mene ecäremige, teepi papa jiicemisi.

<sup>5</sup> Puga ge Yerusalem je Israela biname lui cina itu saaclepi iyeta gawe maramara cabu ca. Teepi iyeta Acejiyame ne yaawejanusi. <sup>6</sup> Bucurage biname cina abasecretngi pee mene maramara liba itecijemige. Teepi iyeta ngenecu jelonecmige mene ätecijame, ingle Yeesu bau me ätrunga biname cina mene jiicemisi pui biname bime yepäyepä tagepogogo ca. <sup>7</sup> Teepi mutäcäco äbitininisi, piba jiicemisi egä, “Lui biname cina mene jiicenemisi, teepi iyeta Galilaya biname gemi! <sup>8</sup> Peei lipu gyene egä mine teebibine jitecijenemisi mimerage cewe mene iicema cabu ca? <sup>9</sup> Mine Partiya gawe cabu ca, Mediya cabu ca, piiyepu Elama cabu ca; Mesopotamiya gawe cabu ca, Yuudea piiyepu Kapadokiya gawe cabu ca gemi; Pontus piiyepu Asiya cabu ca gemi; <sup>10</sup> Pirugiya piiyepu Pampuliya cabu ca gemi; cuta piiyepu Aikupito cabu ca, piiyepu poto Libiya cewe cabu ca gemi, lui Kurene cewe mameta gyene. Poto mine lui Rooma cabu ca gemi; <sup>11</sup> cuta piiyepu pui tomi cabu ca poto lui Israela biname gemi, poto lui Israela biname lica gemi, yepä mine iyeta Israela biname bime mule jäätprungemusi; cuta piiyepu poto mine lui Krete curä cabu ca piiyepu Arabiya gawe cabu ca gemi; yepä mine iyeta jitecijemisi teepi mimerage

mene maramara ca jiicetnäjemisi. Teeme mene lui pee i babe miiji mule poto cidi me Acejiyame lui bine itu jaawenemepi.” <sup>12</sup> Yoo siige, biname cina mutäcäco äbitininisi piiyepu maramara ngene atwanena jepänemisi, piba teemeteme ätemläjinisi egä, “Ai ngena mule gyene?”

<sup>13</sup> Yepä, poto cina ätrunga biname bine bääclena me jewenemisi, jiicemisi egä, “Ai biname lui sice buduma gemi!”

### *Peteru me Mene*

<sup>14</sup> Peteru puma cita ca jeclajutige pui lebin ätyepäneji biname cama, piiyepu babo tage ca gije abacitige mene jajanename biname bine egä, “Israela biname piiyepu weene iyeta lui cina Yerusalema cabu je inajininige, cäme mene nätecijeye! Cane weebibine umle jiwenininine ai mule lui ngena tääpu myene. <sup>15</sup> Ai biname sice buduma lica gemi, weene lipu jiiceniniye, ingle bimu lui nain oklok kroke gyene. Peei lui sice nänäja padare lica gyene. <sup>16</sup> Yepä, ai mule lui eei tääpu myene Acejiyame me mename biname Yoele lipu itu jiicuji egä,

<sup>17</sup> ‘Acejiyame jiicige: Age sena mene cane ngena cire jaawenepene ceräcerägääbü padare cabu.

Cane cäme Seemo ne cire yaacitepene iyeta biname bime trupa cabu.

Weeme imäbägrä piiyepu ngulebägrä cina cäme tagepogogo mene cirege iicema; weeme mamye rooriye cina maramara mule bine wama pana cirege päpäna; piiyepu weeme moda cina wama bine cirege päpäna.

- 18 Yoo, käme kaakesea biname, rooriye cuta magebi piiyepu,  
 pui padare cabu käme Seemo cane cire yaacitepene teeme yepäyepä trupa cabu.  
 Teepi cuta piiyepu käme tagepogogo mene cirege iicema.
- 19 Cane owowä gwidape cirege wawena dume cabu,  
 piiyepu kokre mule gwidape cirege wawena gawe cabu.  
 Uudi, tuyemuye, piiyepu waaniwaniba kloka weene cirege pääpääna;
- 20 bimu te cäsä me cirege äbita,  
 cuta mabye te uudi pana uududi me cirege äbita.  
 Iyeta ai mule cina niinäce cirege äbita,  
 piba ingwe ca mime Yageyame me babo ceräcerägääbu bimu te cire tädepi.
- 21 Siige, iyeta biname lui cina Yageyame me ngii yaawejanusi,  
 tabe teebibine niiya cabu ca cire yääsecräremepi.' Siige.
- 22 Israela biname, ai mene itecijinege!  
 Acejiyame ciitaca mule, cälu täti gwidape, piiyepu owowä gwidape bine cängena jaawabäjempa weeme opo gaabe; tabe pui bine Yeesu Nasaretayame cabu ca jaawenanemepi. Weene pui umle gemi, ingle weeme gome jaawenanemepi. Tabepu pi singi weebibine umle wawename egä Yeesu lui ätyepäneji ge teeme bau ca. 23 Acejiyame teeme singi ca itu iyemaluji Yeesu ne weeme bau me ätyepame. Tabepu padare umle ge ngena cirege äbita. Weene teebine

piba budre me jaawenepeye, liba niiya mule biname bine giri jaacranemepeye teebine baarge uli cabu äbyecrame. <sup>24</sup> Yepä, Acejiyame teebine budre cabu ca yaarpinantepi, teeme budre mäpu cabu ca yääyeblingtepi, ingle naace gyene budre te teebine äblicäco cängena gawe me apremela. <sup>25</sup> Yoo, Daawida te mene jiicuji teeme poto cidi me egä,

'Iyeta padare cane Yageyame ne jääpänune cäme niinäce gaabe je;  
cane niiya päpäna äblicäco gäne, ingle tabe iyeta padare cane cama gyene.

<sup>26</sup> Peei name pi cane ngenecu miiji gäne, piiyepu gege cama mene jiicune.

Yoo, Acejiyame, cane budre cire läbitepene, yepä cane määme trämä papa nanajenige,

<sup>27</sup> ingle maane licarage cäme seemo ne cire nab-malepi biname bime cable cewe cabu je,  
cuta piiyepu lica cirege cäme trupa ne abmala gape cabu ocwwäwame, cane lui määme miiji-rage kaakesea biname gäne.

<sup>28</sup> Maane ireclota gaabe itu nawabepete;  
piiyyepu cane määme gome gege cama nana-jenige.'"

<sup>29</sup> Siige, Peteru piba jejemige, "Cäme biname-wale, lui mene mime kaakesaare Daawida poto cidi me, cane miiji weeme tääpume pajecu me wawena. Tabe budre ge, gape cabu ecitujisi; teeme gape pisi nyene ama mime gome. <sup>30</sup> Tabe Acejiyame me mename biname ge. Tabe umle ge Acejiyame lui mene teeme kokre ngii cama teebine ituge jaji egä, 'Yepä määme kaakesaare cane mope biname ne cire jaawenepene maane

liiyepu.’ <sup>31</sup> Siige, Daawida ngene ca egluji Acejiyame ngene singi cirege wawena, peei name pitabe mene jiicuji Keriso me arpinenta poto cidi me egä,

‘Acejiyame teebine lica ebmalige biname bime cable cewe cabu je;

teeme trupa te lica gape cabu ocwäwige.’

<sup>32</sup> Siige, ai mene lui Yeesu poto cidi me. Acejiyame teebine yaarpinanteipi budre cabu ca. Cine iyeta teebine tepänanumesi ireclota ge. <sup>33</sup> Acejiyame liba teebine yaarpinanteipi, puupu teeme gome yääcärep, piba teebine Aceji Seemo cuta yääcärep, teeme Babe te lipu itu jejuji wawename. Yoo, page weene lui bine jepänemiye piiyepu lui maramara mene itecijenininige, peei iyeta lui Yeesu bau ca gyene. <sup>34</sup> Siige, Daawida lica Yeesu pana äduji cabucewe me, yepä tabe apu mene jiicuji egä,

‘Yageyame te cäme Yageyame ne jejuji:

Ama adnati cäme camu poto cidi ca,

<sup>35</sup> ngälu cane määme cubuyame bine määme ernge gawe me cire yaacranemepene.’

<sup>36</sup> Yoo, Israela biname iyeta, weene miji cängena umle egä peese nyene pui Yeesu weene lui ne itu yaacitepeye baarge uli cabu. Acejiyame teebine itu jaawenepi Yageyame piiyepu Keriso.”

### *Cine Ngena ne Miji Wawena*

<sup>37</sup> Siige, biname cina Peteru me mene liba itecijemige, teepi mage ngenecu mäpu äbitininisi teeme conocono mule name pi. Teepi Peteru piiyepu nuuja ätyepäneji biname bine itemlemisi egä, “Binamewale, cine ngene ne miji wawena?”

**38** Peteru teebibine jejemige egä, “Atatrongärineye weeme niiyaniya mule cabu ca, piiyepu niiye ca äciseja ne ecateye Yeesu Keriso me ngii cabu. Piba Acejiyame te weebibine niiya cabu ca pa isecräripi, cuta teeme mijirage owecu gwidape pa täätupepepi weeme bau me, peei lui Aceji Seemo gyene. **39** Peei mene Acejiyame bau ca lui weeme tääpume, piiyepu weeme bägrä, weeme saarewale tääpume, cuta piiyepu iyeta biname bime tääpume lui cina cudecewe cabu icrajenige, iyeta biname Acejiyame mime Yageyame lui bine cire taasoglecmepi teeme bau otnime.”

**40** Peteru jedednemige peei bäärmi, piiyepu bucurage nuuja mene ca teebibine sewadanemige egä, “Täsecräripeye conocono mule cabu ca, ingle mäpu daremu te tädenige ai niiyarage biname bime bau me!” **41** Bucurage biname cina ätrunga ca ecatisi teeme mene ne, piiyepu niiye ca äciseja ne ecatisi Yeesu me ngii cabu. Pui yepä bimu cabu pama trii tausen biname cina ätrunga biname bime tomi cabu ebäcnisi. **42** Bucurage padare teepi singi ge Yeesu me ätyepäneji biname bime bau ca mene abiberäjame. Teepi labasecretnininusi mene abaitname, deedei gigri läbitininusi, piiyepu cuta Acejiyame bau gigri irecu lätumutinusi.

### *Ätrunga Biname bime Mule*

**43** Acejiyame me ätyepäneji biname cina bucurage ciitaca mule piiyepu kokre mule gwidape Acejiyame me kokre ca jaawenemusi. Biname iyeta mutäcäco läbitininusi. **44** Iyeta lui cina Yeesu ne jitprungisi, teepi yepä gome labasecretnuge piiyepu teeme gwidape lui gigri. **45** Teepi poto

gwidape piiyepu gawe bine aletnename jaawenemusi, siige rarekaake jäätämäni. Lui bime singi piti nemi, teeme täüpume jaabelanemusi. <sup>46</sup> Iyeta bimu teepi labasecretnuge Acejiyame me iiwäreja mete caale ngalebora, puma cita ca toraca gege cama yaacluge teeme mete me deedei gigri äbitame. <sup>47</sup> Teepi eso yääcärusi egä, “Acejiyame lui babo miji gyenel!” Iyeta biname teeme ngenecu miji ge pui ätrunga biname bime bau me. Iyeta bimu gaabegabe Yageyame Yeesu te biname bine yääbäcnanemuge teeme tomi cabu me, lui cina niyya cabu ca äsecräreji gemi.

### 3

#### *Ernge Niiyaniya Biname te Miji Äbitige*

<sup>1</sup> Nuuja bimu Peteru Yoane naabi aaclige Acejiyame me iiwäreja mete me teeme mämle irecu ätumuta padare trii oklok. <sup>2</sup> Puga ge iiwäreja mete caale cabu yepä grana, ngii Jamyacu. Cuta puga ge peei grana gaabe gome yepä rooriye lui me ernge niiyaniya ge. Tabo otnetneja äblicäco, ingle pepu ärngeji ge. Iyeta bimu gaabegabe biname cina teebine yaacananusi, peei grana gome yaabmalusi biname bine rarekaake täüpume ätinäjame, lui cina yääbäcnusi iiwäreja mete caale ngalebora me. <sup>3</sup> Tabo liba Peteru Yoane naabibine jäätämäni abacita je, teebibine äätinäruji rarekaake täüpume. <sup>4</sup> Teepi ire acitasi teeme bau me, Peteru piba jejige, “Ire cime bau me!” <sup>5</sup> Tabo puma cita ca ire jaatwige teebibine, teemämu ngene jotwanige egä, “Teepi pama ceera me singi gegi.” <sup>6</sup> Peteru jejige, “Cäme rarekaake licarage gyene, yepä käme

lui pisi nyene, cane pa nääcärene: Yeesu Keriso Nasareta ceweyame me ngii cabu, cane meeagine naajenine egä abujängti otnime!” <sup>7</sup> Tabe teeme camu poto ime ca joomlige, teebine ewejängtige. Piba taatu pui biname me ernge dugulace kokre äbitige. <sup>8</sup> Tabe piba abujängtige, jeclajutige teeme ernge ca, piba gije abacitige otnetnejame. Tabe ten cama iiwäreja mete caale ngalebora me abacitige. Tabe otnetnäjige, uuplatäjige, piiyepu Acejiyame ne ewepyeräjige. <sup>9</sup> Biname cina teebine jepänisi otni je piiyepu Acejiyame ne awepyeräja je. <sup>10</sup> Teepi liba umle äbitininisi egä pui ätineräja biname peese nyene, lui te ladnatuge iiwäreja mete caale grana ngii Jamyacu gome, teepi cälu te jitemige, lui miji te tädige teeme bau me.

### *Peteru te Mene Jejemige Iiwäreja Mete Puutucuje*

<sup>11</sup> Pui ernge niiyaniya biname egäcäro Peteru Yoane naabibime ime joomlige, iyeta biname ngenecu aloneca cama tuuwametnige teeme bau me. Teepi iiwäreja mete caale ngalebora pui pupu cabu jage, lui ne ngii yaainusi “Solomona me Caagecage Toro Mete” ca. <sup>12</sup> Peteru te liba biname bine jepänemige, jejemige egä, “Israela biname, weene ngena name pi cälu te jitemige? Weene ngena tääpume cime bau me ire sinajininige? Nää, weene apu jinge-nininige egä cime kokre ca, coo cime miji mule ca, ai biname ne otnetnejame jewenago? Licarage! <sup>13</sup> Acejiyame peese nyene lui ne Abrahamo, Isacako, piiyepu Yakobu yaawejanusi; Acejiyame peese lui ne mime sasa kaakesaare cina yaawejanusi. Tabe te peei ne bii jewenige, teeme miji kaakeseayame Yeesu ne

jamyacu apaclyera ceerame. Yoo, weene Yeesu ne yääcärepeye Israela modamoda biname bime bau me, piiyepu teebine jäätgyepeye Pilato me opo gaabe, ngänu gyene tabe itu ngene jwaatwanepi teebine asatame. <sup>14</sup> Yeesu lui mara conocäco biname gyene, yepä weene teebine jäätgyepeye, Pilato ne jaajepeye cubucubu biname weebibine ceerame, lica Yeesu. <sup>15</sup> Weene pepu pi teebine budre me jaawenepeye, lui te biname bine ireclota gaabe jaawabäjemuge, yepä Acejiyame teebine yaarpinatepi budre cabu ca. Cine ire arbi biname gemi peei poto cidi me. <sup>16</sup> Peei Yeesu me ngii te ai biname ne kokre becäriga. Yoo ai biname weene lui ne jepäneniyepi piiyepu sasa umle gemi, teeme ernge dugulace kokre bäbitige teeme ätrunga ca Yeesu me ngii cabu. Yeesu bau ätrunga te teebine miji bii jewenige weeme opo gaabe je.

<sup>17</sup> Yoo käme binamewale, cane umle gäne, weene liba Yeesu ne niiya jaawenepeye, weene umle lica gemi weene ngene jaawenepeye. Weeme modamoda biname piiyepu, teepi umle lica gemi. <sup>18</sup> Yepä, peei mule ca Acejiyame te teeme sasa mene ibibi itu jaawenepi. Sasa cabu ca iyeta teeme mename biname cina peei mene jaaitnäjusi egä teeme Keriso mage mäpu cire jäätäpänepe. <sup>19</sup> Yoo, ebmaleye page weeme niiyaniya ngene atwanena Yeesu poto cidi me, atatrongärineye Acejiyame bau me. Tabé piba weeme niiyaniya mule pa yääyeblengemepi. Peei jewenepeye, <sup>20</sup> piba ngenecu plowa pa tädepi Yageyame bau ca, piiyepu tabe cire täätylepepi Yeesu Keriso, lui ne ituge jaji weeme bau ätyepame. <sup>21</sup> Page tabe miji cabucewe je yaanajuge, ngälu pui padare

te cire tädepi Acejiyame liba iyeta gwidape bine kirece me cire jaawenemepi. Ujarage Acejiyame te mene jiicuji pee i poto cidi me, piiyepu teeme miji mename biname cina jaaitnäjusi pui mene bine. <sup>22</sup> Moose jiicenige Oogäräneji Mene cabu egä, ‘Acejiyame weeme Yageyame te nuuja mename biname cire täätpepepi, cebine liiyepu itu nätyepuji. Tabi lui weeme biname cabu ca cirege otni. Weene iyeta teeme mene miji jewenepeye. <sup>23</sup> Laati te teeme mene lica yaacatuge, teebine yääyeblingtusi Acejiyame me biname bime bau ca iyeteta.’ <sup>24</sup> Iyeta mename biname, Samwela piiyepu iyeta teeme ingwe ca lui cina secluji, iyeta lui cina Acejiyame me tagepogogo mene jiicemusi, teepi mene jiicemujisi ngena cina täbitimesi ai padare cabu. <sup>25</sup> Acejiyame me sasa mename biname cina jeitnujisi tabe ngena cire jaawenepi. Teeme pui mene lui weeme tääpu myene. Cuta piiyepu weeme tääpu myene ai nuuja mene, Acejiyame te weeme sasa kaakesaare bine lui ecäranemuji, tabe liba Abrahamo ne jejuji egä, ‘Cane iyeta biname bine ai gawecewe cabu je miji cire jaawenemepene määme ingwe kaakesaare cabu ca.’ <sup>26</sup> Yoo, Acejiyame liba teeme kaakesea bägrä Yeesu ne yaarpinantepi, siige teebine tityepepi niinäce weeme bau me weebibine miji ceerame, tabe liba weebibine iyeta pa itatrongäripi weeme niiya mule cabu ca.”

## 4

*Peteru Yoane naabi Israela Modamoda Biname  
bime Opo Gaabe je Jaaclajutige*

<sup>1</sup> Peteru Yoane naabi liba mene jejemäsi biname bine, poto Acejiyame täüpume iiwäreja biname, piiyepu iiwäreja mete awamuta mope biname, cuta piiyepu poto Sadukea sigu biname, teepi iyeta piba atyarininisi. <sup>2</sup> Teepi ngenecu niyya cama itecijemige Peteru naabi Yoane biname bine ebiberäjemäsi egä, “Yeesu lui budre cabu ca itu larpinantepi, peei name pi teeme kokre pisi nyene cuta biname bine budre cabu ca arpinerame.” <sup>3</sup> Yoo, pui biname cina singi lica teeme peei mene ätecijame, peei name pi Peteru Yoane naabibine joomlisi. Mämlerage ge, peei name pi krokeciyiye mete bora me ääsinglantisi ngälu nuu ja kroke. <sup>4</sup> Yepä, bucurage biname cina lui Peteru Yoane naabibime mene itecijemige, teepi peei mene jitprungisi, siige ätrunga biname cina bucurage äbitininisi, faib tausen joomlige.

<sup>5</sup> Nuuja bimu cabu, poto Israela mope biname, nuuja modamoda biname, piiyepu cotre abiberäja biname cina yepä gome me abasecret-nige Yerusalem cewe cabu je. <sup>6</sup> Teepi mene ajananinisi iiwäreja babo biname Anas cama piiyepu Kayapa cama, Yoane piiyepu Aleksanda cama, cuta piiyepu Anas me poto ingle biname cama. <sup>7</sup> Teepi piba Peteru Yoane naabibine taasoglicisi teeme opo gaabe je aclajutame, piba teebibine äätemlisi egä, “Weene peei biname ne lipu miji tewenumeye? Nää, ngena kokre ca piiyepu laati me ngii cama tewenumeye?”

<sup>8</sup> Siige, Aceji Seemo te babo äbitige Peteru me trupa cabu. Tabé puma cita ca teebibine jejemige egä, “Mope biname piiyepu nuuja modamoda bi-

name,<sup>9</sup> weene nää cibibine nitemleniye pui mule poto cidi me lui te täbitumi ernge niiyaniya biname täüpume? Nää, weene singi umle äbitame cine lipu tewenumago peei mule ne?<sup>10</sup> Weene iyeta miji umle äbita, piiyepu Israela biname iyeta miji umle, egä Yeesu miji kokre te ai biname ne iyeta miji me tewenumi, lui biname te aclajuteji gyene weeme opo gaabe je. Yeesu Keriso Nasareta ceweyame peese nyene, weene lui ne baarge uli cabu itu yaatecwamtepeye. Acejiyame teebine budre cabu ca itu yaarpinantepi.<sup>11</sup> Tabe peese nyene lui poto cidi me Oogäräneji mene te jiicenige egä,

‘Lui kula ne weene raranga biname cina jigyisi, baborage bäbitige iyeta nuuja cabu ca.’

<sup>12</sup> Siige, Yeesu peese nyene lui taatu ibibi gyene biname bine niiya cabu ca äsecrerame. Ai gawecewe cabu Acejiyame te nuuja biname me ngii lica ituge ceera lui te ibibi gyene mibibine niiya cabu ca äsecrerame.”

<sup>13</sup> Siige, pui mutre biname cina mutäcäco äbitininisi Peteru naabibine Yoane päpäname egä teepi lui wälu umle cäco gegi, cuta umle äbitame egä teepi papa biname gegi, sukulu cäco. Teepi puma cita ca umle äbitininisi Peteru naabi Yoane Yeesu cama cuta waatnetnejäsi.<sup>14</sup> Yepä, teepi nuuja mene äblicäco ge iicana, ingle teepi ernge niiyaniya biname ne jepänisi Peteru Yoane cama aclajuteji ge, lui ne miji me tewenumäsi.<sup>15</sup> Siige, teepi Peteru Yoane naabibine jaajisi pui mutre biname tomi äyeblengame puutucu me asatame puma awagrijame. Puma cita ca teemeteme mene ajananinisi egä,<sup>16</sup> “Mine ngena ne jaawenesi ai

neeneni biname poto cidi me? Iyeta biname Yerusalem cabu umle gemi egä teepi peei mara ciitaca mule ne tewenumäsi. Mine äblicäco peei ne aina. <sup>17</sup> Yepä, mine singi lica ai mene te otnetnejame, peei name pi mine miiji teebibine ablawejame egä, ‘Ingwe ca gone Yeesu me ngii cabu nuuja biname ne mene jaji.’ ”

<sup>18</sup> Siige, teepi Peteru Yoane naabibine cääri taasoglecisi, jaajisi egä, “Gone Yeesu me ngii cabu mene jaajanemuye, coo biname bine yaabiberäjimuye!” <sup>19</sup> Yepä, Peteru naabi Yoane jejemäsi egä, “Weene weemämu atranineye egä Acejiyame me opo gaabe je lui gyene conocäco, nää weebibine ätrungame, coo Acejiyame ne ätrungame. <sup>20</sup> Cine ngena ituge päpäna piiyepu ätecija, cine äblicäco bojä lenaja peei poto cidi me.” <sup>21</sup> Puma cita ca pui mutre biname cina teebibine kokre mene camaaablawäjisi, siige jäätylepsi. Teepi äblicäco teebibine niiya cabu acita, ingle biname täüpume wälu ge. Biname iyeta Acejiyame me ngii ne ewepyeräjisi pui gwidape täüpume lui cina ituge äbita. <sup>22</sup> Lui biname te ciitaca mule cabu ca miiji me täbitumi, tabe footi kämäge cama senajumi piiyepu cerämu poto.

### *Ätrunga Biname cina Irecu Ätumutinisi Acejiyame bau me*

<sup>23</sup> Peteru naabi Yoane liba tasatäsi, teepi acnenutäsi teeme ätrunga binamewale bime bau me, teebibine jeitnemäsi ngena mene modamoda iiwäreja biname piiyepu nuuja modamoda biname cina bii jaajisi teebibine. <sup>24</sup> Ätrunga biname cina teeme mene liba itecijemige, teepi iyeta irecu

äatumutinisi Acejiyame bau me egä, “Yageyame, maane lui tewenemujite cabucewe, gawecewe, malu, piiyepu iyeta lui peei cabu temi, maane mene itu jejujite määme kaakesea biname, cime kaakesaare Daawida ne. <sup>25</sup> Tabe piba Aceji Seemo me ätityera ca peei mene jeitnuji apu egä, ‘Ngena name pi maramara gawe biname cina babo claabe gemi?’

Teepi ngena name pi gläämu bine papapa jew-enemisi?

<sup>26</sup> 26 Gawe maramara mope biname cina cubu gwidape bine emacetnäjenemisi.

Modamoda biname cina yepä gome abase-cretnenige cubu agedname Yageyame piiyepu teeme jaji biname Keriso cama.’

<sup>27</sup> 27 Siige, ai mene te ibibi läbitepi Heroda piiyepu Pontiyo Pilato liba ai cewe ngalebora nuuja gawe biname piiyepu poto Israela biname cama labase-cretnipesi määme conocäco kaakeseayame Yeesu ne äciseräjame, maane lui ne ituge jaji biname bine niiya cabu ca äsecrerame. <sup>28</sup> Teepi labasecretnepi iyeta määme singi wawename, maane lipu uja ngene jotwanujite Yeesu bau ngena te äbitame.

<sup>29</sup> 29 Yoo, Yageyame, cuta page maane mene bii näätecijige, teepi lipu opo cabu nirmäjinisi. Gone ätecija taatu, yepä maane määme kaakesea bägrä bine nitityäripi määme mene wälu cäco iicemame.

<sup>30</sup> 30 Määme kokre niwabinini pita biname bine miji me wawenecame, piiyepu owowä piiyepu ciitaca mule bine wawenecame Yeesu määme conocäco kaakeseayame me ngii cabu.”

<sup>31</sup> 31 Teeme irecu ätumuta mene liba siige, piba taatu pui mete teepi luma tabasecretnige, peei

te akocnäjige. Aceji Seemo te babo äbitige iyeta teeme yepäyepä trupa cabu. Teepi gije abacitinisi Acejiyame me mene wälu cäco iicemame.

### *Ätrunga Biname cina Jebelanemisi Gwidape bine*

<sup>32</sup> Iyeta ätrunga biname teeme ngenecu piiyepu teeme singi lui yepä ge. Nuuja biname te lica jiicige egä, "Cäme gwidape lui cämi nemi," yepä teepi iyeta teemeteme jebelanemisi. <sup>33</sup> Yeesu me ätyepäneji biname cina babo kokre cama ire jerbisi Yageyame Yeesu me arpinenta poto cidi me, piiyepu Acejiyame me baborage miji ten cama ge. <sup>34</sup> Teeme tomi cabu nuuja biname lica ge lui te singi cama enajige bimu gaabegabe gwidape tääpume. Laatibi yageyame ge gawe coo mete tääpume, teepi aletname jaawenimusi, aletna rarekaake saawecnemusi, <sup>35</sup> piba ätyepäneji biname bine yääcäremusi. Teepi pee rarekaake jaabelanemusi teeme yepäyepä laati bemi gwidape cäco.

<sup>36</sup> Biname ngii Yoosepa pepu jwenige. Tab Leebi me ingle cabu ca ge; teeme aplimla puupu lui Kupro curä cabu. Ätyepäneji biname cina teebine yaainusi Banaba ca, pee me aboclomta lui kokre ne ceerayame biname ge. <sup>37</sup> Yoosepa poto gawe aletname jwenige, gawe aletnäneji rarekaake bine ewademige, puma cita ca ätyepäneji biname bime ime cabu icranemige.

## 5

### *Ananiya naabi Sapira*

<sup>1</sup> Yepä, puga ge rooriye ngii Ananiya lui teeme coga Sapira cama poto teeme gawe aletname

jewenäsi. <sup>2</sup> Yepä, tabe poto aletnäneji rarekaake mara gome icranemige teeme tääpume, poto taatu ecäremige ätyepäneji biname bine, engletnäjemige egä, “Camle-camle daremu gyene ai pui gawe tääpume.” Teeme coga iyeta umle ge peei poto cidi me. <sup>3</sup> Peteru rooriye ne jejige, “Ananiya, maane ngenome ire taatu jecitite Satani te mee-bine acaname. Maane angletneja mule bii jewenite Aceji Seemo bau me, maane liba poto gawe aletna rarekaake ne cumä tewenumete. <sup>4</sup> Pui gawe liba aletna cäco ge, määme yene piba, cuta peei gawe tääpume lui rarekaake sewademumete, määmi nemí iyeta. Peei name pi maane ngenome ngene totwananumete peei angletneja mene iicemame? Maane walya mene lica jiicite biname bau me, yepä maane Acejiyame bau me walya bii jiicite!” <sup>5</sup> Ananiya liba peei mene itecijige, puirage padare cabu budre tama itramige. Siige, iyeta lui cina itecijemige peei poto cidi me, teipi mage wälu. <sup>6</sup> Mamye rooriye cina mete ne sebäcnisi, Ananiya me budrekaake ne etnisi, ecanisi, gape piba ecitisi.

<sup>7</sup> Matikolä padare ingwe gaabe ca, Sapira te peei mete me tabacitige, yepä tabe umle lica ge ngena te babitige teeme rooriye poto cidi me. <sup>8</sup> Peteru teebine utemlige egä, “Cebine naji, nää ai rarekaake lui camlecamle daremu gyene, maane piiyepu määme rooriye lui secatumeye weeme gawe tääpume?” Tabe jejige egä, “Yoo, camlecamle daremu peese nyene.”

<sup>9</sup> Siige, Peteru jojige teebine, “Maane piiyepu määme rooriye weene ngenome mene tewenum-eye Aceji Seemo ne walya mene ca apicnentame?

Pui biname cina lui määme rooriye ne gape me becitisi, age tema mete grana gome, cuta mee-bine naasatenisi!” <sup>10</sup> Piba taatu tabe utramige Peteru me ernge gome, siige budre äbitige. Pui mamye rooriye cina mete ne sebäcnisi, jopänisi budre, puma cita ca teebine usatisi, cuta gape ocitisi teeme rooriye gome. <sup>11</sup> Iyeta Yeesu bau ätrunga biname piiyepu iyeta nuuja biname lui ai mule poto cidi me itecijemige, teepi iyeta mage wälu äbitininisi.

### *Ciitaca Mule Gwidape poto cidi me*

<sup>12</sup> Yeesu me ätyepäneji biname cina bucurage owowä mule piiyepu ciitaca mule bine jaawen-emusi biname sobe cabu. Ätrunga biname iyeta yepä gome labasecretnuge iiwäreja mete caale ngalebora me, Solomona me Caagecage Toro Mete cabu je. <sup>13</sup> Nuuja laatibi ätrunga biname lica, teepi wälu ge ten cama abasecretname, ngänu gyene iyeta biname cina miiji mene taatu jiicusi teeme poto cidi me. <sup>14</sup> Yepä bucurage magebi piiyepu rooriye cina mime Yageyame Yeesu ne jäätungusi, piiyepu ätrunga biname bime tomi cabu ebäcnisi. <sup>15</sup> Ätyepäneji biname bime ätityera mule name pi, biname cina pita biname bine yaawademusi babo gaabe gome, waaku coo tiire cabu yaab-malemusi, ingle naace popi teepi singi Peteru me ceegi teebibine awabame, tabe liba pee i pita biname bine yääsuplingtemuge. <sup>16</sup> Bucurage biname lui yaacrajemuge Yerusalemameta, cewe matimati cabu, teepi babo cewe me yääbäcnusi ätyepäneji biname bime bau me yaacluge, pita biname yaawademusi piiyepu poto biname lui

niiya cable cama gemi. Siige, teepi iyeta miiji me läbitininusi.

### *Ätyepäneji Biname cina Mäpu Padare Jepänisi*

<sup>17</sup> Iiwäreja babo biname piiyepu iyeta lui cina ten cama ge, teepi iyeta lui Sadukea sigu biname ge. Teepi claabemete jepänanemisi, ingle biname cina babo singi ätyepäneji biname bime täüpume. Teepi peezi claaabe name pi mene jitranisi ätyepäneji biname bine niiya wawename. <sup>18</sup> Teepi teebibine joomlemisi, babo cewe krokeciyiye mete cabu me ebäcnemisi. <sup>19</sup> Yepä, mime Yageyame me mename seemo te peezi ciiye cabu tädige, krokeciyiye mete gaabe ne jiitnige, ätyepäneji biname bine pui mete cabu ca ewademige, teebibine piba jejemige egä, <sup>20</sup> “Weene biiri, naaclege iiwäreja mete me. Puma jicljutipi, biname bine ebiberäjemepeye iyeta mene ai kirece ireclota potocidi me.” <sup>21</sup> Ätyepäneji biname cina peezi ne jewanisi. Bimu liba tacitige, teepi iiwäreja mete me ebäcnisi, gije abacitinisi biname bine abiberäjame.

Pui iiwäreja babo biname piiyepu teeme binamewale tesoglecimisi iyeta Israela modamoda biname cina abasecretname mutre biname tomi täüpume. Teepi piba teeme ätityera biname bine krokeciyiye mete me jityepemisi ätyepäneji biname bine teeme bau me waadename. <sup>22</sup> Yepä, pui biname cina liba atyarige, teepi lica krokeciyiye mete cabu jepänemisi teebibine, peezi name pi cuta äcnärige, abasecretna biname bime bau jeitnemisi egä, <sup>23</sup> “Cine liba krokeciyiye mete me atyarinago, gaabe jepänisi armeji ge, iyeta awamuta biname gaabe bine jepamutemisi, yepä cine

liba gaabe jiitnisi, mete ngalebora pui biname bine lica jepänemisi!” <sup>24</sup> Modamoda iiwäreja biname piiyepu iiwäreja mete awamuta mope biname, teepi liba peei itecijemige, cälu te jitemige egä, “Baa, ngena te bääbitige? Lete nemi pui biname?” <sup>25</sup> Puma cita ca yepä biname te tabacitige, teebibine jejemige egä, “Cäme mene nätecijeye! Peei rooriye weene lui bine krokeciyi mete me sebäcnimumeye, teepi iiwäreja mete cabu temi, biname bine puma ebiberäjenemisi!” <sup>26</sup> Pui awamuta mope biname te piba ädige teeme ätityera biname cama, ätyepäneji biname bine sewademisi, yepä teepi ime ca lica joomlemisi, ingle teepi wälu ge egä biname cina pama teebibine kula ca äbyecra mage, ai name pi teepi owecu gemi ätyepäneji biname bime tääpume.

<sup>27</sup> Teepi ätyepäneji biname bine ebäcnemisi mutre biname bime opo gaabe je aclajutame. Iiwäreja babo biname te piba teebibine jejemige egä, <sup>28</sup> “Cine weebibine uja itu jijanipago kokre mene ca egä, ‘Gone peeii biname me ngii cabu yaabiberäjemuye,’ yepä weene cime mene lica ituge ätecija, siige iyeta biname bine Yerusalemaga ngalebora je ebiberäjanemiyi, piiyepu weene singi cibibine aitna-me egä cine te Yeesu ne budre me itu yaacitepesi.”

<sup>29</sup> Peteru piiyepu nuuja Acejiyame me ätyepäneji biname cina mene jewecnistisi egä, “Cine miiji Acejiyame me singi wawena, lica biname bime singi ne. <sup>30</sup> Acejiyame peese nyene laati ne mime sasa kaakesaare cina yaawejanusi. Tabe te Yeesu ne budre cabu ca yaarpinanantepi, weene liba tee-

bine budre me itu yaacitepeye baarge uli cabu.  
**31** Acejiyame teebine itu yaarpinantepi teeme camu poto me, teebine biname bine Waadena Biname piiyepu niiya cabu ca Äsecrera Biname me itu jaawenepi. Yoo, tabe singi Israela biname bine padare cerame teeme niiya mule abmaläcemame piiyepu pui niiya cabu ca äsecrerame.  
**32** Cine ire arbi biname gemi peei gwidape poto cidi me, cuta Aceji Seemo piiyepu, Acejiyame lui ne täätylepuge biname bime cabu me, laatibi teeme singi jaawenusi.”

### *Gamaliya te Mutre Biname bine Bäärmijegednemige*

**33** Siige, peei mutre biname cina ai mene liba itecijemige, teepi mage claabe ge, singi ge ätyepäneji biname bine budre me wawename. **34** Yepä, puga ge yepä Parisea biname teeme ngii Gamaliya. Tabe cotre abiberäja biname ge, lui te baborage ge iyeta biname bime ngene atwanena cabu. Tabe abujängtige pui mutre biname bime sobe cabu, jejemige egä ätyepäneji biname bine miiji äsimi puutucu me. **35** Siige, tabe piba mutre biname bine bäärmijegednemige egä, “Cäme Israela binamewale, weene miiji cängena ngene jottwananineye weene singi peei biname poto cidi me ngene wawename. **36** Weene ngene jepecneye biname ngii Tiyudas poto cidi me. Poto kämäge niinäce gaabe me tabe täduji, biname bine jejemuji egä, ‘Cane babo biname gäne.’ Pama fooa hanred rooriye cina ten cama abasutinujisi. Yepä, tabe budre jepänaji, teeme biname cina piba mara-mara äbitininujisi, siige wata apiruji teeme sigu

te. <sup>37</sup> Tiyudas me ingwe ca, biname bime ngii acnema padare cabu, Yuuda Galilaya ceweyame te piba täduji. Tabé cuta bucourage biname ewademiji ten cama otnetnejame, yepä tabe cuta budre jepänuji, siige teeme biname cina maramara äbitininujisi. <sup>38</sup> Yoo, peei name pi ai biname bime poto cidi me cane weebibine jjienininine, gone teebibine niiya jaawenemuye, yepä ebmalemep-eye! Liba biname bau ca gyene teeme ngene atwanena piiyepu teeme waweneca, piba peei te papa me pagege äbita, <sup>39</sup> yepä liba Acejiyame bau ca gyene, weene äblicäco teebibine iibana. Weene piba Acejiyame cama pa aglipeye!”

Siige, mutre biname cina Gamaliya me mene jecatisi. <sup>40</sup> Teepi tesoglecemisi ätyepäneji biname bine, teebibine etemeläjemisi, piba jejemisi, “Gone mene cääri jiicemuye Yeesu me ngii cabu,” siige teebibine jityepemisi. <sup>41</sup> Ätyepäneji biname cina peei mutre biname bine ebmalemisi gege cama, ingle naace popi Acejiyame ngene jotwanige egä teepi miiji ge Yeesu me ngii name pi mäpu päpäname. <sup>42</sup> Iyeta bimu teepi iiwäreja mete cabu piiyepu biname bime mete maramara cabu mene jaajananemusi, biname bine yaabiberäjemu Miiji Mene Yeesu Keriso poto cidi me.

## 6

### *Seben Ätityera Biname poto cidi me*

<sup>1</sup> Ingwe ca Yeesu me ätrunga biname cina liba bucourage äbitininisi, Israela biname lui cina Griik mene jiicemusi, teepi jicnecimisi Heberu mene biname bine egä, “Teepi liba cuublacubla bine

rarekaake yääcäranemusi, cime cuublacubla bine kupae lica jaawenemusi.” <sup>2</sup> Puma cita ca pui twelb ätyepäneji biname cina tesoglecemisi iyeta ätrunga biname bine yepä gome abasecretname, jejemisi teebibine egä, “Miji lica gyene cine liba Acejiyame me bäärmi mene jajanena kaakesea ne abmalame rarekaake ire atwi täüpume. <sup>3</sup> Cime binamewale, peei name pi weeme cabu ca jejäcremeye seben rooriye bine, lui cina umle biname gemi, piiyepu Aceji Seemo ne cängena jäätprungusi, cuta piiyepu iyeta biname cina lui täüpume ngenecu mijji gemi. Cine teebibine rarekaake ire atwi kaakesea pa yääcäremepesi. <sup>4</sup> Siige, cine piba iyeta padare irecu ätumuta piiyepu bäärmi kaakesea cabu pa lacranipago.”

<sup>5</sup> Siige, iyeta ätrunga biname singi ge pepu wawename. Teepi seben rooriye bine ngii jejäcremisi. Age temi teeme ngii: Setepano lui me ätrunga baborage ge piiyepu lui me trupa cabu Aceji Seemo te baborage ge, cuta Pilipo, Prokora, Nikano, Timona, Parmenas, piiyepu Nikolas lui Antiyoka ceweyame ge. Tabé Israela biname lica, yepä tabé Israela biname bime irecu ätumuta mule ne ituge acata. <sup>6</sup> Siige, ätrunga biname cina teebibine ewademisi ätyepäneji biname bime bau me. Teepi irecu ätumutinisi piiyepu ime etacwemisi peei seben biname bime papa cabu.

<sup>7</sup> Siige, Acejiyame me Miji Mene te otnetnäjige iyeta poto ta. Yeesu bau ätrunga biname cina ablinisi Yerusalema ngalebora, cuta piiyepu bucurage Acejiyame täüpume iiwäreja biname cina peei Miji Mene ne jitrungisi.

*Israela Modamoda Biname cina Setepano ne  
Joomlisi*

<sup>8</sup> Setepano lui te baborage ätityera piiyepu kokre jääpänuge Acejiyame bau ca, tabe ciitaca mule piiyepu owowä mule bine jaawenemuge Aceji Seemo me kokre ca biname bime opo gaabe je.

<sup>9</sup> Yepä, poto biname cina Setepano cama mene abajininisi. Teepi lui Israela biname bime yepä abasecretna mete cabu ca, pui mete ngii yaainusi egä ‘abasecretna mete asatäneji biname bime tääpume.’ Puga ge pui abasecretna cabu Israela biname lui Kurene piiyepu Aleksandriya cewe cabu ca gemi, piiyepu poto nuuja Israela biname Kilikiya piiyepu Asiya Probins cabu ca. Teepi iyeta gije abacitinini Setepano cama mene abajame. <sup>10</sup> Yepä, Aceji Seemo te Setepano ne babo umle ecärigi. Peei umle cama tabe liba mene jiicemuge, teepi äblicäco daremu mene iicana.

<sup>11</sup> Teepi pee name pi poto biname bine ogä rarekaake ecäremisi walya mene jajime. Teepi apu jiicisi egä, “Cine Setepano ne jitecijisi, tabe Moose me cotre mene bine jiseblecäjemige, cuta piiyepu Acejiyame ne jiseblecäjige.” <sup>12</sup> Pepu pana teepi ngenecu alonecame jewenemisi biname bine, piiyepu modamoda biname, cuta piiyepu cotre abiberäja biname. Teepi Setepano ne joomlisi, ecanisi mutre biname bime opo gaabe me.

<sup>13</sup> Teepi piba poto biname bine ebäcnemisi walya mene iicaname Setepano poto cidi me. Pui cina jejemisi egä, “Ai biname te jääseblecäjemuge ai cudege iiwäreja mete poto cidi me piiyepu Moose me cotre mene poto cidi me. <sup>14</sup> Cine ituge ätecija tabe jaji je egä Yeesu pui Nasareta ceweyame te ai

iiwäreja mete ne pagege iibyageca, piiyepu mime sasa mule lui Moose bau ca gyene, peei ne mara me pagege wawena!” <sup>15</sup> Iyeta lui cina mutre biname tomi cabu adnatärenige, teepi ire jetwananisi Setepano ne, jepänisi egä teeme opo lui mename seemo pana ge.

## 7

### *Setepano me Mene*

<sup>1</sup> Liwäreja babo biname te Setepano ne itemlige egä, “Nää, teeme mene toraca gyene määme poto cidi me?”

<sup>2</sup> Setepano jejemige egä, “Cäme babewale, binamewale, käme mene nätecijeye! Ujarage mime kaakesaare Abrahamo liba camuge Harana cewe me otni, Acejiyame lui jamyacu apaclyera cama ge, tabe teemämu aboclomtuji Abrahamo bau. Pui padare tabe Mesopotamiya gawe cabu enajuji. <sup>3</sup> Acejiyame teebine jejige egä, ‘Ebmalemi määme inglewale bine, piiyepu määme gawecewe ne ebmali, nuuja gawe cabu me ädi, cane lui gawe ne pagege awaba määme täüpume.’ <sup>4</sup> Siige, Abrahamo piba ebmaluji Kaladea gawe ne, äduji Harana cewe me lenajame. Liba Abrahamo me babe budre äbituji, Acejiyame piba teebine jitetyepuji otnime ai Kanana gawe cabu me, weene page luma inajininige. <sup>5</sup> Yepä, pui padare Acejiyame te yepä gawe matikolä lica ecäruji Abrahamo ne teemerage gawe lenaja täüpume, yepä Acejiyame teebine mene jejuji gawe ceera teeme täüpume piiyepu teeme kaakesaare täüpume ingwe ca. Yoo, pui padare Acejiyame liba peei mene

jejuji, Abrahamo bägrä cäco enajuji. <sup>6</sup> Age Acejiyame me mene teeme bau me: ‘Määme ingwe kaakesaare cina cirege otni mage cudecewe me nuuja biname bime gawe cabu lenajame, puma mäpurage daremu cäco kaakesea cirege wawena. Teeme ireclota mäpu cirege fooa hanred kämäge cama. <sup>7</sup> Yepä, pui gawe biname lui bime tääpume teepi mäpurage kaakesea cire jaawenepesi, cane teebibine teeme mäpu daremu cirege ceera. Ingwe ca määme kaakesaare cirege äsecrera peei gawecewe cabu ca. Teepi käme bau piba cirege awejena airage gawe cabu.’ <sup>8</sup> Siige liba peei mene apiruji, Acejiyame piba Abrahamo ne jejuji teeme cewecu acitame teeme tääpe matikolä iirputa ca. Peei cewecu ca Abrahamo te Acejiyame me jajeji mene ecatuji teeme tääpume teeme biname me äbitame. Pui name pi Abrahamo, Isacako te liba aplimluji, teeme tääpe matikolä jiirputuji seben bimu teeme aplimla ingwe ca; piiyepu ingwerage Isacako teeme bägrä Yakobu me tääpe matikolä cuta jiirputuji. Yakobu me padare liba, tabe cuta teeme twelb imäbägrä bime tääpe matimati cuta jiirpeclimuji pui cewecu acitame. Pui twelb imäbägrä cina kaakesaare me äbitininujisi mime twelb ingle lenajame.

<sup>9</sup> Pui bägrä cina claabemete jepänujisi Yoosepa ne lui teeme yepä ge, siige teebine aletname ecanujisi daremu cäco kaakesea wawename Aikupito gawe cabu je. Yepä, Acejiyame puga ge ten cama, <sup>10</sup> teebine cängena isatuji iyeta teeme peei mäpu cabu ca. Yoosepa liba jeclajutuji Aikupito gawe Mopeyame Parao me opo gaabe je, Acejiyame te Parao ne ngenecu miiji jewenuji

Yoosepa tääpume, piiyepu Yoosepa ne babo umle ecäruji. Parao piba Yoosepa ne ecituji Aikupito gawe piiyepu iyeta Parao me mete bine ire atwime. <sup>11</sup> Gane padare piba täduji Aikupito piiyepu Kanana gawe cabu iyeta; biname cina mage loolo me cewe icrajuji. Mime kaakesaare licarage nuuja deedei bine jepänemujisi. <sup>12</sup> Peei name pi Yakobu liba itecijuji egä deedei puga ge Aikupito je, tabe teeme bägräwale, lui gemi mime kaakesaare, teebibine jityepemuji teeme niinäce gaabe me piiyeme. <sup>13</sup> Ingwe ca teepi liba cääri äcnäruji, Yoosepa teeme naniganewale bime bau aboclomtuji. Parao pui padare cabu umle äbituji Yoosepa me ingle biname poto cidi me. <sup>14</sup> Yoosepa piba mene jityepuji teeme babe Yakobu te otnime teeme inglewale cama Aikupito me. Teepi iyeta lui sebenti faib biname ge. <sup>15</sup> Puma cita ca Yakobu äduji Aikupito me. Tabe puga ge budre, cuta teeme bägrä iyeta budre puga ge. <sup>16</sup> Ingwe ca teeme kaakesaare cina pui saarewale bime budrekaake ewademujisi Kanana gawe cabu me cewe ngii Sekem me, puga kaake bine gape jerbemujisi, lui gapecewe ne Abrahamo te rarekaake ca itu jeletnuji Hamora biname bime bau ca.”

<sup>17</sup> Setepano mene jiicemige egä, “Acejiyame me padare liba mameta ge atyaramta teeme jajeji mene toraca me äbitame, lui mene Abrahamo ne itu jejuji, mime biname cina piba Aikupito gawe cabu bucourage itu ablinujisi. <sup>18</sup> Pui padare cabu kirece mope biname te gije abacituji Aikupito gawe ne ire atwime; tabe umle lica ge Yoosepa poto cidi me. <sup>19</sup> Pui mopeyame piiyepu teeme biname cina mime biname bine engletnäjemujisi,

mime kaakesaare bime ireclota mäpu me jewenemujisi. Teepi teebibine giri jicranemujisi teeme engäbägrä bine puutucu abmalame budre äbitame. <sup>20</sup> Siige, Moose pui padare cabu aplimluji; tabe jamyacu bägrä ge. Nesae mabye teeme mage babe cina teebine mete cabu ire jetwujäsi. <sup>21</sup> Moose ne liba nuuja puupu cabu me imlitäsi, pui Parao me ngulebägrä te teebine esicruntuji, joomluji teeme bägrä tääpume. <sup>22</sup> Aikupito umleumle biname cina Moose ne ebiberäjujisi. Tabo babo me äbituji teeme mene piiyepu teeme waweneca cabu.

<sup>23</sup> Moose liba footi kämäge joomluji, tabe ngene jotwananuji teeme Israela binamewale bine ädärame. <sup>24</sup> Tabe jepänaji Aikupito biname te yepä Israela biname ne egluji. Moose pui ne itityäruji, Aikupitoyame ne daremu jewecnistuji, budre tama egluji, siige. <sup>25</sup> Moose apu jengenuji egä teemerage Israela biname cina umle ge egä Acejiyame te teebine pa jaajepi teebibine äsecerame teeme mäpu ireclota cabu ca, yepä Israela biname umle lica ge peei poto cidi me. <sup>26</sup> Nuuja bimu tabe jäätänuji neenenä Israela biname arngi cabu jage. Moose singi teeme claaabe ne agawame, jaajuji egä, ‘Siige, weene yepä biname gegi. Weene ngenome weemämu arngeniye?’ <sup>27</sup> Yepä, lui te nuuja ne egluji, tabe Moose ne iyebalingäjuji, teebine itemluji egä, ‘Meebine laati te bii naajige cime ire atwi biname piiyepu ablaweja biname äbitame?’ <sup>28</sup> Wää, maane singi cebine agli mäte, maane lipu birice Aikupito biname yepä ne seglumete?’ <sup>29</sup> Siige, Moose liba peei mene itecijuji, tabe Aikupito gawe cabu ca

äyeblingtuji cudecewe me, siige Midyan gawe cabu gije abacitiji lenajame. Puga teeme coga te neeneni imäägrä bine aaplimluji.”

Setepano cerämu cuta jiicemige egä, <sup>30</sup> “Footi kämäge liba apirininujisi, Moose piba Sinai podo wajwa je daapo taatu gawe cabu enajuji, siige Acejiyame me mename seemo te teeme bau taboclomtuji. Uli te puga ayige, pui wädräji cabu pee mename seemo ne jepänuji. <sup>31</sup> Moose cälu te jitiji peei uli ne liba jepänuji ayi je, äduji mameta me cängena ireme. Tabé piba Acejiyame me tagepogogo itecijuji egä, <sup>32</sup> ‘Cane Acejiyame sâne, lui ne määme kaakesaare Abrahamo, Isacako, piiyepu Yakobu yaawejänusi.’ Moose me tääpe te wälü name pi jeclonuji, tabe wälü ge ireme. <sup>33</sup> Acejiyame teebine jejuji, ‘Määme ernge gwidape yiirecimi, ingle maane aclajuteji gäte cude puupu cabu. <sup>34</sup> Yoo, cane jäätänemune cäme biname bime ireclota Aikupito je lui mage mäpurage ge. Cane teeme mäpu cabu cewe oocanena nätecijanuge; cane bii täinine teebibine mäpu cabu ca äsecrerame. Ayo, cane meeble Aikupito me pa näätypene.’

<sup>35</sup> Siige, Moose peese Israela biname cina lui ne itu jigyujisi, teebine jejujisi egä, ‘Laati te meeble naajige cibibine ire atwime piiyepu ablawejam?’ Yepä, Moose peese nyene lui ne Acejiyame te itu tityepuji Israela biname bine ire atwime piiyepu teebibine teeme mäpu ireclota cabu ca äsecrerame. Pui mename seemo lui te ayeji uli cabu taboclomtuji, tabe Moose ne itityäruji. <sup>36</sup> Moose peese nyene lui te biname bine ewademuji Aikupito gawe cabu ca. Footi kämäge cama tabe ciitaca gwidape bine jewenanemuji Aikupito ngalebora

piiyepu Uududi Malu gome piiyepu pui daapo taatu cewe cabu. <sup>37</sup> Moose peese nyene lui te Israela biname bine jejemuji egä, ‘Acejiyame nuuja mename biname ne cire täätylepepi, tabe cebine liiyepu itu nätyepuji. Tabe weeme cabu ca yepä cirege.’ <sup>38</sup> Siige, Moose peese nyene lui puga ge Israela biname cama pui daapo taatu cewe cabu je. Tabe puga ge mime sasa kaakesaare cama piiyepu pui mename seemo cama, lui teebine mene jejuji Sinai Podo cabu je. Tabe puga sewademuji Acejiyame miji ireclota mene mibibine jajanename.

<sup>39</sup> Yepä, mime kaakesaare cina äbwäricnинујиси teeme mene ätecijame, siige Moose ne jigyujisi. Teepi singi ge cuta Aikupito me äcnärame. <sup>40</sup> Peei name pi teepi Moose me naane Aarona ne jejujisi egä, ‘Mime uuje bine jewenemi mime niinäce gaabe otnime. Mine nuuja umle lica gemingenja te itu täbitumi Moose tääpume podo cabu je, lui te mibibine Aikupito gawe cabu ca niwadipi.’ <sup>41</sup> Teepi puma cita ca uuje ne jewenujisi awejename, teeme opo lui kau plongo pana ge. Teepi peeи ne yiiwäräjujisi, babo deedei jewenujisi, lui teeme ime ca wawenäneji gwidape ge. <sup>42</sup> Peei name pi Acejiyame te kaake ca icelyäremuji teebibine, ire ta jicranemuji teeme peeи singi gaabe cabu otnime dume piiyepu wale bine iiwärejame. Mene pisi nyene Oogäräneji Mene cabu Acejiyame me mename biname bime bau ca egä,

‘Israela biname, peeи lui käme tääpume lica gyene weene lui footi kämäge cabu cibucibu gwidape yaaglecimuye, yiiwäräjemuye pui daapo taatu cewe cabu je.

**43** Yepä, Moloko uuje tääpume weene cäbletääpe ca mete ne erangujiye, pui ne ecanujiye, cuta piiyepu weeme uuje Rapana, teeme ämyeji wale ne ecanujiye.  
**Teipi** lui ime ca wawenäneji gwidape ge iiwäreja tääpume.

Cane pee name pi weebibine cudecewe me cirege ätyepa Babloniya nuuja poto me.'

**44** Siige, mime kaakesaare bime iiwäreja mete puga ge pui daapo taatu cewe cabu je. Peei watata rarangäneji mete lui cäbletääpe ca wawenäneji ge. Peei lui Acejiyame me mete ge biname cama lenajame. Teipi pee ne cängena jewenujisi epu pana Acejiyame te Moose bau me lipu eboclomtuji mene taatu ca mete raranga tääpume. **45** Ingwe ca teipi pee mete teeme bägrä bine ecäremujisi. Teeme bägrä cina pui mete ne piba ecanujisi ten cama, teipi liba Yosuwa cama ecluji ai Kanana gawe bine waadename, Acejiyame te teeme niinäce gaabe ca liba iyecräjemiji maramara biname bine. Pui mete te ten cama enajuji ngälu Daawida me padare. **46** Yoo, Acejiyame ngenecu miji ge Daawida tääpume. Tabé Acejiyame ne itemluji tabé te meterage wawename Acejiyame tääpume, lui ne iyeta mine Yakobu me kaakesaare cina yaawejanusi. **47** Yepä, Daawida me bägrä Solomona te pee mete ne eranganuji.

**48** Yepä, Caburage Acejiyame tabé lica yaanjuge mete cabu lui ne biname cina yaarangusi, teeme mename biname te lipu jiicuji egä,

**49** 'Yageyame te jiicenige: cäme puupu gyene cabucewe je,

cane biname bine puma cita ca ire pa taatwe-mepene.

Gawecewe lui cäme ernge acita puupu gyene.

Lipu mete ne weene singi cäme tääpume rarangame?

Lese nyene puupu cäme lenajame?

<sup>50</sup> Cije cane iyeta gwidape cämämu lica jewanemu-jine?”

<sup>51</sup> Siige, puma cita ca Setepano cuta jejemige egä, “Weene ätrunga cäco gemi. Weene ngene atwana Acejiyame bau lica gemi. Weene Acejiyame me mene ätecija cäco gemi. Weeme sasa kaakesaare liiyepu weene pepu gemi. Teepi lipu singi lica Aceji Seemo ne ätecijame, weene cuta piiyepu. <sup>52</sup> Wää, nuuja mename biname puga ge weeme kaakesaare cina lui ne niiya lica jaawenusi? Eewe, teepi niiya jaawenemusi iyeta mename biname bine! Teepi Acejiyame me mename biname bine budre me jaawenemusi lui cina mene jeitnäjujisi teeme Conocäco Kaake-seayame Yeesu me otni poto cidi me. Siige, ai padare weene walya mule ca teebine budre me itu yaaglepeye. <sup>53</sup> Weene peete nemí lui cina Acejiyame me cotre mene ewademujiye, mename seemo cina lui cotre weebibine icärinujisi, yepä weene lica peeí cotre bine jaawenemuye!”

### *Biname cina Setepano ne Kula ca Jibyecrisi*

<sup>54</sup> Siige, pui mutre biname cina liba Setepano me mene itecijemige, teepi claabemete jepänisi, giricu bine etebecmisi teeme claabe name pi. <sup>55</sup> Yepä, Aceji Seemo Setepano me trupa cabu bab-orage ge. Setepano cabu me ire acitige, Acejiyame

me jamyacu apaclyera ne jepänige piiyepu Yeesu ne jepänige aclajuteji ge Acejiyame me camu poto ca. <sup>56</sup> Tabe jiicige, “Ire cabu me! Cane jepänenine dume äpacuteji ge piiyepu teebine, lui Acejiyame bau ca täduji biname me äbituji, tabe aclajuteji ge Acejiyame me camu poto ime je!”

<sup>57</sup> Baborage ala cama pui mutre biname cina teeme tablame bine ime ca ermemisi, piba taatu Setepano bau me tuuwametnige, <sup>58</sup> teebine babo cewe cabu ca wata iyeblingtisi, kula ca jibyecrisi. Teepi teeme acwabeja cäblettääpe ebmalemisi yepä mamye biname gome je, teeme ngii Saulo. <sup>59</sup> Teepi Setepano ne jäje jibyecranisi, siige tabe mime Yageyame ne jejige egä, “Yageyame Yeesu, nacati käme seemo!” <sup>60</sup> Tabe kokorare ca ääpednutige, piba babo tage ca jejige egä, “Yageyame, gone ngene taapecnute teeme poto cidi me ai niiya mule ne.” Tabe ai mene jiicige, siige budre äbitigē.

## 8

<sup>1</sup> Yoo, Saulo singi ge Setepano me budre tääpume.

### *Saulo te Ätrunga Biname bine Mage Niiya Jaawenanemuge*

Puirage bimu cabu poto biname cina gije abacitinisä ätrunga ingle biname bime ireclota mäpurage wawename Yerusalema je. Teepi iyeta ätrunga biname bine iyeeräjemisi, siige teepi uucratni-ge cewe maramara me Yuudea piiyepu Samariya probins ngalebora me. Ätyepäneji biname taatu icrajige Yerusalema je. <sup>2</sup> Poto cängena ätrunga

biname cina Setepano ne gape me ecitisi, mage ele ewäyisi.

<sup>3</sup> Yepä, Saulo gije abacitige ätrunga biname bine äyeblengame. Tabé mete yepäyepä ngalebora abacitanige, ätrunga biname bine sisecreräjemige, siige magebi rooriye bine icranemige krokeciyiye mete bora me.

### *Samariya Cewe cabu ta Miji Mene Jaajanane-musi*

<sup>4</sup> Lui ätrunga biname bine iyecräjemisi, teepi ot-ninisi cewe gaabegabe ta, Miji Mene iyeta poto ta jejanganemisi. <sup>5</sup> Pilipo ädige babo cewe Samariya me, puga biname bine umle jewenemige Keriso poto cidi me, lui te biname bine niiya cabu ca yääsecräremuge. <sup>6</sup> Bucurage biname tomitomi cabu teepi cängena itecijemige Pilipo ngena mene jejanganemige. Teepi iyeta teeme mene jitecijanisi, piiyepu ciitaca mule bine jepänemisi, tabe lui bine jewenemige. <sup>7</sup> Niiya cable cina mage ala cama äsinisi bucurage biname cabu ca; piiyepu biname lui bime ime ernge apineca cäco ge, piiyepu biname lui eepanepana otni, teepi miji me äbitininisi. <sup>8</sup> Yoo, peei name pi baborage gege puga ge Samariya cewe cabu je.

<sup>9</sup> Pui babo cewe cabu yepä biname ngii Simona te enajige. Mage padare cama tabe Samariya biname bine călu te ätime jaawenemuge teeme piiseba mule ca. Tabé jiicemige egä tabe babo biname ge. <sup>10</sup> Iyeta biname pui babo cewe Samariya cabu, matimati cabu ca ngälu modamoda me, teepi teeme mene jäätcejusi, jiicusi egä, “Tabé peese nyene biname lui Acejiyame me kokre

cama gyene, lui ne yaainusi Babo Kokreyame ca.” <sup>11</sup> Lecaleca padare cama teeme piiseba mule name pi biname cina mutäcäco läbitininusi, peeи name pi teeme mene jäätjecijanusi. <sup>12</sup> Yepä, teepi liba Pilipo me mene jitecijisi, Miji Mene Acejiyame te biname bine waadena poto cidi me piiyepu Yeesu Keriso poto cidi me, teepi piba niiye ca äciseja ne ecatisi, rooriye magebi iyeta. <sup>13</sup> Simona cuta peeи mene liba itecijige, teebine cuta niiye ca jicisäjisi Yeesu me ngii cabu. Peeи ingwe gaabe ca, tabe Pilipo me mameta je enajige, piba călu te jitige kokre mule gwidape piiyepu ciitaca mule bine liba jepänemige, Pilipo lui bine jaawenemuge Aceji Seemo me kokre ca.

<sup>14</sup> Yerusalem cabu lui ätyepäneji biname cina liba itecijemige egä Samariya biname cina itu yaacatepesi Acejiyame me mene ne, siige teepi piba Peteru Yoane naabibine jäätjepisi teeme bau me. <sup>15</sup> Teepi liba atyaramtäsi, Acejiyame ne puma ewejenäsi pui ätrunga biname bime täüpume egä Aceji Seemo te pa labacitanegе teeme yepäyepä trupa cabu me, <sup>16</sup> ingle naace popi Aceji Seemo te camuge abacitana teeme nuuja biname cabu, yepä teepi niiye ca äciseja taatu itu yaacatepesi mime Yageyame Yeesu me ngii cabu. <sup>17</sup> Puma cita ca Peteru naabi Yoane ime icranemäsi teeme papa cabu, siige Aceji Seemo te piba teeme yepäyepä trupa cabu abacitanige.

<sup>18</sup> Simona liba jepänige egä Aceji Seemo te ätrunga biname bime trupa cabu babacitanige, ätyepäneji biname cina liba ime icranemäsi teeme papa cabu, tabe piba singi rarekaake ceerame

Peteru Yoane naabibine, <sup>19</sup> jaajige teebibine egä, “Cuta cebine näcäreye pee i kokre, egä cane lui biname cabu cäme ime laacitune, Aceji Seemo te piba labacituge teeme cabu me.”

<sup>20</sup> Yepä, Peteru teebine jejige egä, “Maane äte, määme rarekaake cama ädi ngälu cäco niiya puupu me, ingle naace popi maane ngene bii jotwanite Acejiyame me owecu gwidape ne aleiname rarekaake ca! <sup>21</sup> Maane äblicäco gäte cine cama gigri kaakesea wawename, ingle määme ngene atwana conocono gyene Acejiyame me opo gaabe. <sup>22</sup> Ebmali page ai niiya mule ne, Acejiyame ne ewejani määme niiya ngene atwanena poto cidi me. Tabé pama mee bine kälyä pa naawenege. <sup>23</sup> Cane nääpänenine egä maane niiya claabe gäte cime kokre poto cidi me. Määme niiya mule te mee bine bii noomlige.”

<sup>24</sup> Puma cita ca Simona te Peteru Yoane naabibine jaajige egä, “Owecu, weene Yageyame ne ewejaneye cäme tääpume egä nuuja pee i niiya gwidape te, weene lui poto cidi me bii najiye, lica pagege äbita cäme tääpume.”

<sup>25</sup> Siige, Peteru naabi Yoane Yeesu me ireclota poto cidi me liba jiicemäsi, piiyepu Yageyame me mene liba jejananemäsi, teepi pee i ingwe ca acnenutäsi Yerusalem me. Cuta gaabe cabu liba aaclige, Miiji Mene jejananemäsi Samariya gawe biname yepäyepä cewe cabu ta.

### *Pilipo Miiji Mene Jejige Yepä Etiyopiya Gawe Biname ne*

<sup>26</sup> Acejiyame me mename seemo te Pilipo ne jejige, “Maane amacnepi, uule poto me ädi,

ngälu gaabe cabu atyaramtepi, lui gaabe gyene Yerusalem ca Gaasa me.” Yoo, ai taje biname lica waatnetnäjinusi peeii gaabe cabu. <sup>27-28</sup> Siige, Pilipo amacetnäjige, abyemärige. Yepä Etiyopiya gawe ngii biname puga ge gaabe cabu teeme cewe otnime. Tabi lui rarekaake ire atwi mope biname ge magebi tääpume lui te Etiyopiya gawe ne ire jaatwuge. Tabi itu lädepi Yerusalem me Acejiyame ne iiwärejame; tabi tacne-nutenige cewe me teeme älädnalädna gwidape cabu. Gaabegabe liba tädige, tabi Oogäräneji Mene bine secnemige, Acejiyame me menameyame Isaya lui bine soogäruji. <sup>29</sup> Aceji Seemo te Pilipo ne jejige egä, “Ädi älädnalädna gwidape gome me.” <sup>30</sup> Puma cita ca Pilipo uuwamige Etiyopiya biname mameta me, teebine jitecijige Isaya me Oogäräneji Mene acnema cabu. Tabi teebine itemlige egä, “Nää, iyeta umle gäte ai mene lui ecnenenemite maane?”

<sup>31</sup> Etiyopiya biname te jejige egä, “Cane lipu umle äbita; nuuja biname liba lica pisi nyene cebine abiberäjame?” Tabi piba Pilipo ne jejige, “Tacenuti älädnalädna gwidape cabu, cäme gome adna-ti!” <sup>32</sup> Age peeii neeneni Oogäräneji Mene pargi Yeesu poto cidi me tabi lui bine aacnenige: “Tabi epu maamoi pana, aglime lui ne ecanisi.

Tabi maamoi plongo pana, lui te bojäcu  
yaanajuge teeme ngäli liba jaaclanimusi.

Tabi nuuja mene lica.

<sup>33</sup> Teepi ajiri me jewenisi teebine, yepä äwärimta biname lica ge teeme tääpume.

Nuuja biname te äblicäco mene iicana teeme ingwe kaakesaare poto cidi me,

ingle naace popi teeme ireclota ai gawecewe  
cabu ngälu bii joomlige.”

<sup>34</sup> Siige, pui biname te Pilipo ne jejige, “Cebine naji, laati ne pee mename biname te jeitnenige? Teeme tääpume aitnäjenige, coo nuuja biname ne jeitnäjenige?” <sup>35</sup> Pilipo piba gije abacitige mene me. Tabe jegednige peeirage mene pargi cabu ca, piba teebine jejanige Miji Mene Yeesu poto cidi me. <sup>36</sup> Teepi liba gaabe cabu aaclige, niiye gome atyaramtäsi, piba pui biname te jejige egä, “Agesa niiye. Nää, maane lipu gäte cebine niiye ca äcisejame Yeesu me ngii cabu?” <sup>37</sup> Pilipo te jejige teebine egä, “Yoo, cane miji gäne meeble niiye ca äcisejame määme ngenecu bora liba ätrunga pisi nyene.” Tabe jejige egä, “Yoo, cane jitrunegenine egä Yeesu Keriso lui Acejiyame me bägrä gyene.”

<sup>38</sup> Pui biname liba mene jejige teeme kaake-seayame te äländalädna gwidape iibename, piba Pilipo piiyepu Etiyopiya biname niiye cabu me äglenutäsi, siige Pilipo piba Yeesu me ngii cabu jicisäjige teebine. <sup>39</sup> Teepi liba tarpatäsi niiye cabu ca, mime Yageyame me Seemo te Pilipo ne ecatige. Pui biname te teebine ingwe ca lica jepänige; yepä, gege cama teeme gaabe cabu ädige. <sup>40</sup> Pilipo piba jepänige egä tabe lui babo cewe ngii Asotus cabu jage. Puma cita ca tabe ädige, iyeta cewe cabu ta Miji Mene jejanemige, ngälu siige Kesarea cewe me atyaramtige.

## 9

*Saulo Ätrunga Biname me Äbitige*

<sup>1</sup> Peei padare cabu Saulo te biname bine drämä ca jwenemige egä tabe singi Yageyame me ätrunga biname bine budre me aglecame. Tabé iiwäreja mope biname bau me ädige, <sup>2</sup> teebine itemlige peba ceerame egä tabe peeí peba cama miiji gyene Israela biname bime abasecretna mete yepäyepä cabu me abacitaname, lui cina babo cewe Damaseko ngalebora jage. Saulo singi ge peeí peba bine naace täüpume päpäname, egä tabe liba biname bine jääpänemuge lui cina Yageyame me gaabe cabu waatninusi, magebi piiyepu rooriye, siige peeí peba te conocäco yääcäruge oomlemame, Yerusalem me waadename.

<sup>3</sup> Saulo liba babo cewe Damaseko mameta at-yaramtige, piba taatu apaclyera te carbe cabu ca teebine tuungepmalige. <sup>4</sup> Tabé itramige gawe cabu me, tagepogogo piba itecijige egä, “Saulo, Saulo, maane ngenome cebine niiya nawenanenite?”

<sup>5</sup> “Babo Biname, baa maane laasi näte?”

“Cane Yeesu säne, maane lui ne niiya nawenanenite. <sup>6</sup> Abujängti, ädi babo cewe me, cane puma mene pa naajene maane ngena wawename.”

<sup>7</sup> Saulo cama lui biname cina eclige, teepi imyemutemige mene cäco. Teepi tagepogogo itecijemige, yepä nuuja biname ne lica jepänisi. <sup>8</sup> Siige, Saulo gawe cabu ca abujängtige, irecu aasatige, yepä äblicäco ge päpäna gwidape bine. Teepi peeí name pi teeme ime joomlisi, eweclujisi, Damaseko cewe me ecanisi. <sup>9</sup> Nesae bimu ngalebora tabe äblicäco ge päpäna. Pui padare cabu tabe deedei piiyepu niiye cäco enajige.

**10** Puga ge Damaseko cewe je yepä ätrunga biname ngii Ananiya. Yageyame teebine wama pana jejige egä, “Ananiya!”

Tabe jejige, “Yageyame, cane age säne.”

**11** Yageyame piba teebine jejige egä, “Abujängti, ädi yepä gaabe cabu me, pui gaabe ngii Conocäco ge. Puma Yuuda me mete cabu je maane itemlepi yepä Taasu cewe biname tääpume, teeme ngii Saulo. Tabe irecu ätumutenige. **12** Tabe Saulo te wama pana yepä biname ne bii jepänige, ngii Ananiya, teeme mete me lui te tabacitige, ime aacitige teeme papa cabu, piba tabe cääri irecu aasatige.”

**13** Ananiya jejige, “Eewe, Yageyame! Bucurage biname cebine itu najanepesi ai biname poto cidi me, tabe lipu baborage niiya jaawenemuge määme biname bine Yerusalem ngalebora je.

**14** Tabe peba cama Damaseko me tädumi, cuta pee peba cabu conocäco pisi nyene modamoda iiwäreja biname bime bau ca iyeta biname bine oomläjecame Acejiyame me ngii lui cina yaawejanusi.”

**15** Puma cita ca Yageyame te jejige, “Maane äte, teeme bau me ädi, ingle naace popi cane teebine itu jaajepene käme kaakesea wawename, käme ngii aitnejame nuuja gawe biname bime bau me, piiyepu maramara gawecewe mope biname bime bau me, cuta piiyepu Israela biname bime bau me. **16** Cane kämämu teebine pa jaawabepene iyeta mäpu tabe lui pagege päpäna kämiji pi.”

**17** Siige, Ananiya ädige, pui mete me abacitige, piba ime aacitige Saulo me papa cabu. Tabe jejige egä, “Käme biname Saulo, Yageyame Yeesu lui

määme bau me taboclotumi gaabe cabu maane liba aima tädumete, tabe te cebine bii nätyepige, ingle naace tääpume maane cääri päpäname pi-iyepu Aceji Seemo te määme trupa cabu abacitame.” <sup>18</sup> Piba taatu cibu idre pana gwidape cina taatramige Saulo me irecu cabu ca. Tabé piba irecu aasatige ireme. Tabé abujängtige; piba Ananiya teebine niiye ca jicisäjige Yeesu me ngii cabu. <sup>19</sup> Tabé liba deedei äbitige, teeme kokre te cääri piba tacnenutige.

*Saulo te Miji Mene Jejananemige poto Damaseko Abasecretna Mete cabu je*

Nesae bimu cama Saulo ätrunga biname cama enajige Damaseko cewe je. <sup>20</sup> Tabé conocäco ädige poto abasecretna mete me, gije abacitige mene jajanename egä Yeesu lui Acejiyame me Bägrä gyene.

<sup>21</sup> Iyeta lui cina itecijemige, cälu te jitemige, teemeteme ätemläjinisi egä, “Baa, agesa tabe lui te Yerusalem je pui biname bine yaaglecimuge lui cina Yeesu me ngii yaawejanus? Tabé pama aimä tädumi, ingle naace popi tabe singi ätrunga biname bine oomläjecame modamoda iiwäreja biname bime bau waadename!”

<sup>22</sup> Yepä, Saulo me mene kokrerage äbitige. Tabé toraca conocäco Yeesu ne jewabudnitige, jejemige egä, “Tabé peese nyene lui ne Israela biname cina jewagrijanisi teebibine niiya cabu ca äsecrerame.” Siige, Damaseko cewe je lui Israela biname, teepi äblicäco ge teeme mene awecnista.

<sup>23</sup> Bucurage bimu ingwe ca, poto Israela biname cina abasecre-tnige, mene jitranisi Saulo ne

aglime. <sup>24</sup> Yepä, nuuja biname te teebine jejige teepi ngena mene jitranisi. Ciiye bimu teepi cewe grana gome ire jetwisi teebine aglime. <sup>25</sup> Yepä, ciiye cabu Saulo me binamewale cina teebine ecanisi cewe kula caale gome me. Puma cita ca teebine baborage diiba ngalebora isinglantisi, kula gaga cabu ca iyinisi gawe me.

### *Saulo Yerusalem Ngalebora je*

<sup>26</sup> Saulo piba Yerusalem me ädige. Tabe singi ätrunga biname cama alenglecäjame, yepä teepi Saulo me mene lica jecatisi egä tabe lui toraca ätrungayame gyene. Teepi iyeta wälu ge teeme tääpume. <sup>27</sup> Puma cita ca Banaba teebine itityärige, ecanige ätyepäneji biname bime bau me. Banaba teebibine jejananemige Saulo lipu mime Yageyame ne itu jäätänepi Damaseko gaabe cabu, piiyepu Yageyame te ngena mene itu jaajepi teebine. Tabe cuta piiyepu jeitnige Saulo te mene Yeesu me ngii cabu lipu wälu cäco jaajananemepi Damaseko cewe cabu je. <sup>28</sup> Saulo peei name pi ten cama enajige piiyepu Yerusalem ngalebora ta otinetnäjige. Tabe mene wälu cäco jiicemige mime Yageyame me ngii cabu. <sup>29</sup> Puga ge Israela biname lui Griik mene ca jiicemusi. Tabe ten cama mene jiicemige, teebibine jiseblecäjemige, yepä teepi singi ge teebine aglime. <sup>30</sup> Ätrunga biname liba umle äbitininisi ai poto cidi me, teepi Saulo ne ecanisi Kesarea malu cewe me, puma cita ca teebine jityepisi Taasu cewe me.

<sup>31</sup> Siige, piba iyeta ätrunga ingle biname cina Yuudea, Galilaya, piiyepu Samariya gawe cabu poode jepänanisi. Teepi kokre äbitininisi, piiyepu

bucurage me äbitininisi Aceji Seemo me ätityera name pi, piiyepu Yageyame me opo gaabe je teepi cängenarage icrajige.

*Peteru Ädige Cewe Neeneneni Luuda piiyepu Yoopa me*

<sup>32</sup> Peteru iyeta cewe ta otnetnäjige. Nuuja taje tabe ädige Luuda me, Acejiyame me biname bine puma engräjemige. <sup>33</sup> Puga tabe biname ne jepänige ngii Aenea lui me ime ernge apineca cäco ge. Eit kämäge ngalebora tabe äblicäco ge teeme ute puupu cabu ca arpinenta. <sup>34</sup> Peteru teebine jejige egä, “Aenea, Yeesu Keriso te mee-bine miji naawenenige. Arpinanti, määme ute gwidape emactnäjemi!” Siige, Aenea piba taatu arpinantige. <sup>35</sup> Iyeta biname cina lui Luuda piiyepu Sarona cewe ngalebora icrajige, Aenea ne jepänisi. Teepi piba mime Yageyame bau tattroängarinisi.

<sup>36</sup> Puga ge Yoopa cewe cabu yepä magebi ngii Tabita lui ätrunga biname gwene. Yoo, teeme Griik ngii lui Dooka, peei me aboclomta lui diiya. Iyeta padare tabe muijimiji kaakesea jaawen-emuge, owecumete biname bine yäätityäremuge. <sup>37</sup> Peei padare cabu teebine pita te jwoomlige, siige budre äbitige. Teepi teeme budrekaake ne jucisäjisi, cabu je lui mete puupu, pui cabu ocitisi. <sup>38</sup> Yoopa cewe cudecewe lica ge Luuda cewe ca. Peei name pi Yoopa je ätrunga biname liba umle äbitininisi egä Peteru lui Luuda cewe cabu jage, teepi neeneneni biname bine jäätylepisi teeme bau me mene cama egä, “Owecu, wata tädepi cime bau me.” <sup>39</sup> Siige, Peteru piba amactnäjige, ten cama

ädige. Tabe liba Yoopa me atyaramtige, teepi ecanisi pui cabu puupu me. Iyeta cuublacubla cina teebine jowaclomtisi, ele jolwisi, maramara asigreräja gwidape Peteru ne piba jewabäjisi, Dooka lui bine itu yaaterutäjemepi tabe liba ireclota ge.

**40** Siige, Peteru iyeta biname bine iyebengemige pee i puupu cabu ca, kokorare ca piba äpednutige Acejiyame bau irecu ätumutame. Puma cita ca tabe atatrongtige budrekaake bau me, jojige teebine egä, “Tabita, arpinanti!” Tabe irecu aasatige, Peteru ne liba jepänige, piba adnatige.

**41** Peteru teebine ime ca jwoomlige, owejängtige. Tabe piba tesoglecemige ätrunga biname bine cuta cuublacubla bine iyeta, teebibine jewabemige egä Tabita ireclota gwene. **42** Iyeta Yoopa ngalebora biname cina itecijemige ai poto cidi me, siige bucourage biname cina Yageyame ne jitprungisi.

**43** Peteru poto bimu cama Yoopa je enajige, biname ngii Simona teeme mete cabu. Simona me kaakesea lui cibu tääpe bine yaamacetnäjemuge maramara kaakesea tääpume.

## 10

### *Koroneliyo te Peteru ne Ala Tesoglige*

**1** Puga ge Kesarea cewe je yepä biname ngii Koroneliyo lui ge mope biname Rooma cubu biname bime yepä sange tääpume. Pui sange ne yaainusi ‘Italiya Sange’ ca. **2** Tabe babo singi irecu ätumuta mule tääpume. Tabe piiyepu teeme ingle biname iyeta Acejiyame ne yaawejanusi. Teeme ätityera baborage ge Israela owecumete biname bime tääpume, piiyepu tabe jäje irecu lätumutanuge

Acejiyame bau me. <sup>3</sup> Yoo, yepä mämlebimu me trii oklok poto cidi me, tabe wama pana pajecurage jepänige mename seemo ne, lui tädige, teebine jejige egä, “Koroneliyo!”

<sup>4</sup> Tabe pui mename seemo ne wälwälü ire jetwige, piba jejige egä, “Yageyame, ngena gyene?”

Mename seemo te jejige egä, “Acejiyame te ngenecu miji gyene määme irecu ätumuta täüpume piiyepu määme owecu mule täüpume. Tabe singi ge meeble miji mene jajime. <sup>5</sup> Page Yoopa me määme biname bine jityepimi yepä biname ne ärngime teeme ngii Simona Peteru. <sup>6</sup> Nuuja biname ngii Simona lui te cibu tääpe bine yaamacetnäjemuge, tabe teeme mete cabu enajenige. Pui mete lui malu ligi jage.” <sup>7</sup> Siige, mename seemo te liba peei mene teebine bii jejige, piba abyemärige. Puma cita ca Koroneliyo ala taasoglicige teeme neeneni mete kaakesea biname bine piiyepu yepä cubu biname ne, lui tage teeme miji kaakeseayame, cuta lui te Acejiyame ne yaawjanuge. <sup>8</sup> Koroneliyo teebibine jäätänige ngena te bii bääbitige, siige piba Yoopa me jäätylepänige.

### *Peteru Babo Gwidape ne Wama pana Jepänige*

<sup>9</sup> Nuuja bimu teepi liba gaabe cabu jage Yoopa cewe mameta atyara, peei padare Peteru piba jegelige mete toro cabu lui puupu cabu me irecu ätumutame. Bimu duusa mameta ge. <sup>10</sup> Peteru loolo me cewe te joomlige, tabe singi deedei tääpu mage. Deedei gädnäja trämä, tabe wama pana jepänige, <sup>11</sup> dume te iitnige, puma cita ca

yepä gwidape te gawe me täinige, lui babo daam-ledamle cäbletääpe pana ge; teeme fooa mutre ca siyinisi gawe me. <sup>12</sup> Puga ge pui gwidape papa cabu maramara cibu piiyepu biicwale piiyepu glunubora ele. <sup>13</sup> Piba tagepogogo te jejige teebine egä, “Peteru, arpinanti, eglecemi, erngäjemi!”

<sup>14</sup> Yepä, Peteru jejige, “Eewe, Yageyame, cude gemi! Cane umle cäco gäne gwidape ärngäja lui gemi cude cime täüpume, coo piiyepu lui gemi cibucibu lica.”

<sup>15</sup> Pui tagepogogo te cuta jejige, “Maane gone gwidape bine yaainemute cude ca, Acejiyame lui bine cibu me itu jaawenemepi!” <sup>16</sup> Nesae gääbu liba pepu äbitige, peei cäbletääpe ne gwidape cama piba cabu me ewecnistisi.

<sup>17</sup> Peteru mage ngene jotwananige teeme wama pana mule me abocломta poto cidi me. Puirage padare lui biname bine Koroneliyo itu täätYepämi, teepi Simona me mete ne jepänänisi, siige mete gaabe gome jaaclajutänige. <sup>18</sup> Teepi ala abayänisi, biname ne itemlänisi egä, “Pisi nyene, nää, biname ngii Simona Peteru?”

<sup>19</sup> Peteru te liba ngene jotwananenige peei wama pana mule me abocломta poto cidi me, Aceji Seemo te piba teebine jejige egä, “Ire! Nesae biname age tämi, meeбine näärngenänisi. <sup>20</sup> Maane amacetnäji, äini, gone däagudägu läbitute ten cama otnime, ingle cane te bii jäätYepänine teebibine.” <sup>21</sup> Siige, Peteru äinige, pui biname bine jejemige, “Cane age säne weene lui biname ne jirngeniye. Weene ngenome tujiye?”

<sup>22</sup> Teepi jejänisi egä, “Cubu mope biname Koroneliyo te nityepämi. Tabe miijirage biname

gyene, lui te umle gyene Acejiyame ne awejena, piiyepu iyeta Israela biname ngenecu miji gemi teeme poto cidi me. Acejiyame me conocäo mename seemo te Koroneliyo ne tejumi mee-bine asoglecame teeme mete me otnime, naace tääpume tabe määme mene ätecijame.”<sup>23</sup> Siige, Peteru pui biname bine mete me ääsinglentänige yepä ciiye cama ute me.

### *Peteru Atyaramtige Koroneliyo me Mete me*

Nuuja bimu tabe amacetnäjige, siige ten cama ädige. Poto ätrunga biname Yoopa cewe cabu ca ten cama eclige.<sup>24</sup> Yepä bimu ingwe ca, Peteru atyaramtige Kesarea cewe me, Koroneliyo luma teebine jewagrijige. Koroneliyo cama puga ge teeme inglewale piiyepu poto binamewale, tabe lui bine tesoglecemige.<sup>25</sup> Peteru liga mete me abacitige, Koroneliyo teeme bau ädige, kokorare ca teeme gome äpednutige,<sup>26</sup> yepä, Peteru teebine ewejängtige, jejige egä, “Abujängti! Cane cuta biname gäne.”<sup>27</sup> Peteru Koroneliyo ne mene jejanige egäcäro teepi mete me abacitasi. Tabepuma pui biname bine jepänemige.<sup>28</sup> Tabejemige egä, “Weene umle gemi egä cime Israela biname bime cotre pisi nyene egä, cine lica ädära coo abasuta nuuja gawe biname cama. Yepä, Acejiyame cebine nabiberäjumi egä: ‘Gone nuuja biname ne jäägyuye, gone teebine cude me jaawenuye.’<sup>29</sup> Peei name pi maane liba cebine nasoglumete, cane tädine mee-bine ädärame, ngänu gyene maane Israela biname lica gäte. Siige, cane page näätelenine, maane cebine ngenome nasoglumete?”

<sup>30</sup> Koroneliyo jejige, “Nesae bimu liba bapirige, cane piba mämlebimu me trii oklok poto cidi me, page liiyepu ge, käme mete cabu irecu tätumutanumene. Piba taatu yepä biname te, lui me käbletääpe apaclyäreji cama ge, käme opo gaabe teclajutumi, <sup>31</sup> najumi egä, ‘Koroneliyo, Acejiyame te määme irecu ätumuta mene bii bitecijige, cuta nääpänige maane owecumete biname bine lipu yäätityäremute. <sup>32</sup> Maane Yoopa me määme biname bine jityepemepi, yepä biname ngii Simona Peteru bau me. Tabi lui nuuja Simona me mete cabu jage, lui te cibu tääpe yaamacetnäjemuge. Teeme mete lui malu ligi jage.’ <sup>33</sup> Puma cita ca cane biname bine tityepemumene meeblee lowejutame, siige baborage eso maane lipu tädite. Page cine age temi Acejiyame me opo gaabe je, meeblee naawagrijenisi maane cibibine umle wawename Yageyame te ngena mene naajumi jajime.”

### *Peteru me Mene*

<sup>34</sup> Siige, Peteru Koroneliyo naabibine mene jejemige egä, “Cane page umle bäbitine lipu toraca gyene egä Acejiyame te yepä pana ire nitwenininige. <sup>35</sup> Tabi singi iyeta gawecewe biname bime tääpume, lui cina teeme ngii yaawejanusi piiyepu miiji taatu mule bine jaawenemusi. <sup>36</sup> Weene umle gemi Acejiyame lui mene Israela biname bime bau itu jityepuji egä poode pisi nyene Acejiyame cama Yeesu Keriso name pi. Tabi Yageyame gyene iyeta biname bime tääpume. <sup>37</sup> Weene umle gemi ngena itu äbituji Galilaya je piiyepu iyeta poto

Israela gawe cabu ta pui padare ingwe gaabe ca, Yoane liba mene jejemuji niiye ca äciseja poto cidi me. <sup>38</sup> Weene umle gemi Yeesu Nasareta ceweyame poto cidi me, Acejiyame te lipu teeme cabu Aceji Seemo ne ecituji cuta kokre ne ecituji. Yeesu iyeta poto ta waatnetnäjuge, miijimiji mule jaawenemuge, piiyepu iyeta biname bine miji me jaawenemuge lui cina Satani me kokre cabu yaacrajuge, ingle Acejiyame lui ten cama ge. <sup>39</sup> Cine ire arbi biname gemi iyeta mule tääpume Yeesu lui bine itu jewenemuji Israela biname bime gawe cabu cuta piiyepu Yerusalem ngalebora je. Teepi teebine budre me jewenujisi baarge uli cabu äbyera ca. <sup>40</sup> Yepä, nesae bimu ingwe gaabe ca Acejiyame teebine budre cabu ca erpinantuji, piiyepu cuta eboclomtuji, <sup>41</sup> lica iyeta biname bime bau me, yepä cime bau me. Cine ire arbi biname gemi, tabe lui bine itu nijinuji ai kaakesea tääpume. Yeesu me budre piiyepu arpinenta ingwe ca cine ten cama deedei erwäjujisi cuta piiyepu niiye enujisi. <sup>42</sup> Yeesu cibibine nijinuji biname bine Miji Mene jajanename, piiyepu aitnejame egä tabe peese nyene Acejiyame lui ne atrana biname me jewenuji ireclota biname piiyepu budre biname bime tääpume. <sup>43</sup> Iyeta sasa mename biname cina mene jeitnujisi teeme poto cidi me, jiicemujisi egä iyeta biname lui cina teebine jäätprungusi, Acejiyame teeme niiyaniya mule cabu ca kälyä cire jaawenemepi Yeesu me kokre name pi.”

*Aceji Seemo te Nuuja Gawe Biname bime  
Yepäyepä Trupa cabu Abacitanige*

<sup>44</sup> Peteru liba mene iicema cabu je, Aceji Seemo te abacitanige iyeta lui cina teeme mene jitecijisi. <sup>45</sup> Israela ätrunga biname lui cina Peteru cama seclige Yoopa ca, teepi călu te jitemige Acejiyame liba teeme ätityerayame Aceji Seemo ne cuta nuuja gawe biname bime cabu ecitanige. <sup>46</sup> Teepi teebibine jitecijemisi maramara tagepogogo ca iicema je piiyepu Acejiyame me kokre ne awepyeräja je. Peteru piba jejemige egä, <sup>47</sup> “Aceji Seemo te ai biname bime cabu babacitige tabe uja lipu tabacitanuji mime cabu me. Nää, miji gyene nuuja biname te teebibine iibasename, teepi liba niiye ca äciseja ne acatame Yeesu me ngii cabu?” <sup>48</sup> Tabe puma cita ca Koroneliyo naabibine jejemige Yeesu Keriso me ngii cabu niiye ca äciseja acatame. Teepi pui kaake poto ca Peteru ne jejisi poto bimu cama ten cama lenajame.

## 11

### *Peteru Mene ne Jeitnige Yerusalema Ätrunga Biname bime bau me*

<sup>1</sup> Yuudea gawe cabu ta ätyepäneji biname piiyepu iyeta ätrunga biname cina itecijemige egä nuuja gawe biname cina Acejiyame me Miji Mene ne itu secatumesi. <sup>2</sup> Peteru liba ädige Yerusalema me, puga ge poto ätrunga biname lui singi gemi nuuja gawe biname cina Acejiyame me cewecu ne acatame, teeme tääpe matikolä iirputa ca Israela biname pana äbitame. Teepi peei name pi Peteru ne jiyingäjisi egä, <sup>3</sup> “Maane lipulipu labacitepete nuuja gawe biname me mete cabu me, lui Israela biname lica gyene piiyepu lui me tääpe ne lica

ituge iirputa mime pana. Maane cuta piiyepu deedei teta cama läbitepete? Maane peeи lui mime cotre ne jaatropangtepete!” <sup>4</sup> Peeи äingeja mene name pi Peteru teebibine jejananemige iyeta lui itu läbitepesi pui mule me agedna cabu ca. Tabe apu jiicige egä:

<sup>5</sup> “Yoo, cane liba Yoopa cewe cabu irecu lätumutepene, cane piba yepä gwidape ne wama pana jäätänepene. Peeи gwidape lui daamledamle cäbletääpe pana ge, teeme foo mutre ca säinepesi gawe me, siige käme mameta me liibepi. <sup>6</sup> Cane piba ngalebora me kängena ire jaatwananepene. Puga cibu gwidape bine piiyepu cibu käco gwidape, biicwale, glunubora ele bine jäätänemepene. <sup>7</sup> Cane puma cita ca tagepogogo nätecjepi, cebine lui najepi egä, ‘Peteru, arpinanti, eglecemi, erngäjemi!’ <sup>8</sup> Yepä, cane jaajepene, ‘Eewe, Yageyame, cane umle käco käne nuuja cude cibu piiyepu cibu käco gwidape käme tage cabu acita.’ <sup>9</sup> Pui tagepogogo mene cabucewe ca piba neeneni me najepi, ‘Gone yaainute cibu käco gwidape ca Acejiyame lui ne cibu me jaawenuge.’ <sup>10</sup> Nesae gääbu pepu läbitepi, siige piba pui gwidape bine iyeta yaawecnemepi cabu me. <sup>11</sup> Puirage padare nesae biname lui bine käme bau täatyepämepi Kesarea cewe cabu ca, teipi mete me tatyaräpesi, cane lui mete cabu nanajepi. <sup>12</sup> Aceji Seemo te cebine najepi pui biname cama wata otnime. Siige, ai siks ätrunga biname cina Yoopa ca cane cama yaaclepi Kesarea me. Puga cine iyeta Koroneliyo me mete me yääbäcnenepesi. <sup>13</sup> Koroneliyo piba cibibine

nijipi tabe lipu mename seemo ne jääpänepi, teeme mete cabu lui aclajuteji, jaajepi teebine egä, ‘Maane biname bine jityepemepi Yoopa me yepä biname ne arwojutame, teeme ngii Simona-Peteru. <sup>14</sup> Tabe meebine mene pa naajepi maane piiyepu määme inglewale lipulipu niiya mule cabu ca äsecrerame.’ <sup>15</sup> Siige, cane liba gije labacitepene mene me, Aceji Seemo te piba teeme yepäyepä trupa cabu me labacitanepi, ai ätrunga mule agedna cabu je mime trupa cabu lipu abacitanuji. <sup>16</sup> Cane piba mime Yageyame me mene ngene jaapecnepene tabe lipu tiicuji egä, ‘Yoane lipu niiye yaacituge biname bime papa cabu niiye ca äciseja tääpume, Acejiyame te pepu Aceji Seemo weeme trupa cabu pa yaacitanepi.’ <sup>17</sup> Cäme tääpume pajecu gyene egä Acejiyame pui nuuja gawe biname bime trupa cabu yepä pana Ätityerayame ne yaacitanepi tabe lui ne mime cabu itu ecitanuji, mine liba Yageyame Yeesu Keriso ne niinäce jitprungujisi. Nää, käme kokre pisi nyene Acejiyame ne iibaname teeme Ätityerayame ne ceerame? Eewe, äblicäco!”

<sup>18</sup> Siige, ätrunga biname cina Peteru me mene liba jitecijisi, teepi pui äingeja mule ne piba ebmalisi, Acejiyame me ngii ewepäntisi, jiicisi egä, “Acejiyame padare cuta yääcäremepi nuuja gawe biname bine atatrongärame teeme niiyaniya mule cabu ca toraca ireclota ne päpäname lui ngälu cäco gyene.”

*Mene Antiyoka Ätrunga Ingle Biname bime poto  
cidi me*

**19** Ätrunga biname cina Yerusalemä cabu ca uu-cratnuji maramara gawe cabu me, teeme mäpu ireclota name pi Setepano me budre ingwe ca. Poto cina cudecewe me eclige Poenikiya, Kupro, piiyepu Antiyoka me. Teepi Israela biname taatu bine Miji Mene jejananemisi. **20** Yepä, poto ätrunga biname cina Kupro curä piiyepu Kurene gawe cabu ca cuta Antiyoka cewe me eclige. Teepi puga mene jejananemisi biname bine lui Israela biname lica gemi, teebibine umle jewenemisi Miiji Mene mime Yageyame Yeesu poto cidi me. **21** Mime Yageyame me kokre ten cama ge, peei name pi bucurage biname cina mime Yageyame bau me tatatröngärinini, teebine jitprungisi.

**22** Idre ecanisi peei mule poto cidi me Yerusalemä ätrunga biname bime bau me. Teepi puma cita ca Banaba ne Antiyoka cewe me jityepisi. **23** Siige, Banaba liba atyaramtige Antiyoka me, jepänige Acejiyame te biname bine lipu miji itu jaawenemepi. Tabe Banaba te piba gege äbitige, teebibine iyeta bäärmi jegedne-mige mime Yageyame ne toraca ätrungame, teeme gome cängena lenajame. **24** Yoo, Banaba miijirage biname ge, teeme ätrunga baborage, piiyepu Aceji Seemo me kaakesea te teeme cabu babo äbitige. Siige, bucurage biname cina Yageyame ne jitprungisi teeme mene name pi.

**25** Banaba puma cita ca Taasu cewe me ädige Saulo ne ärngime, **26** liba jepänige teebine, ecanige Antiyoka cewe me. Yepä kämäge ngalebora teepi puga ätrunga biname cama abasutinisi, bucurage biname bine ebiberäjemäsi. Antiyoka je teepi

Keriso me binamewale bine ciitacarage einemisi egä ‘Kristiyan’.

<sup>27</sup> Pui padare poto Acejiyame me mename biname cina Yerusalem ca eclige Antiyoka me. <sup>28</sup> Teeme yepä te ngii Agabu abujängtige, Aceji Seemo me kokre ca mene jiicige egä, “Gane padare mameta gyene otni iyeta gawe cabu ta.” Yoo, pui gane padare te täduji Klaudiyus liba enajuji Rooma Mopeyame täüpume. <sup>29</sup> Ätrunga biname cina mene jitranisi rarekaake ätyepame teeme biname bine Yuudea gawe cabu ätityerame. Laatibi rarekaake cama, teepi yootonisi. Bucurage rarekaake cama biname cina, teepi bucurage icranemisi; rarekaake cäco biname lui, teepi nesae icranemisi. <sup>30</sup> Siige, pui rarekaake jityepemisi Banaba piiyepu Saulo cama Yuudea ätrunga ingle mutre biname bime bau me.

## 12

*Heroda te Ätrunga Biname bine Mäpu cabu Icranemige*

<sup>1</sup> Pui padare Mope Biname Heroda gije abacitige poto ätrunga biname bine mäpu cabu acranecame. <sup>2</sup> Tabé cubu biname bine jejemige Yoane me naane Yakobu ne budre me aglime cubu turikä ca. <sup>3</sup> Heroda liba umle äbitige egä poto Israela biname cina singi ge pepu agleca mule täüpume, tabe piba cuta Peteru ne joomlige. Pui te äbitige Israela biname bime trii padare ngalebora, teepi liba uutneca cäco buludu bine yäärwäjusi. <sup>4</sup> Yoo, Peteru ne liba joomlisi, teepi piba teebine krokeciye mete cabu me isinglantisi, awamuta biname

bime ime cabu ecitisi. Yoo, puga ge fooa sigu awamuta biname; yepä sigu lui fooa biname cama, cuta iyeta nuuja sigu piiyepu. Siige, Heroda ngene jotwanige Peteru ne atraname biname sobe cabu Israela biname bime Äsuplengta trii ingwe poto ca. <sup>5</sup> Siige, Peteru krokeciyiye mete cabu enajige, yepä ätrunga biname cina Acejiyame ne jäje yaawejanusi teeme poto cidi me.

### *Peteru Krokeciyiye Mete cabu ca Tasatige*

<sup>6</sup> Lui bimu cabu Heroda singi ge Peteru ne acaname krokeciyiye mete cabu ca biname sobe cabu atraname, pui bimu me niinäce gaabe cikiye cabu, Peteru ute ogrige neeneni awamuta biname bime cole je. Tabé ätäyäneji ge neeneni ayana seea ca, piiyepu cuta poto awamuta biname puga ge krokeciyiye mete grana gome. <sup>7</sup> Piba taatu Yageyame me mename seemo puga aclajuteji ge Peteru mameta gome, piiyepu apacyera te tuungepmalige puupu cabu me tabe luma enajige. Pui mename seemo te Peteru ne palace gome joomlige, elotnicige arpinentame, jejige egä, “Wata arpinanti!” Puirage padare ayana seea cina aatramige Peteru me ime cabu ca. <sup>8</sup> Mename seemo piba jejige, “Määme baagi ca amlemalti, ernge gwidape aasigräri!” Peteru pui jaawenige, siige mename seemo piba jejige, “Määme acwabeja cäbletääpe ca ätrugäri, cane cama tädi!” <sup>9</sup> Peteru teebine ingwe icwige krokeciyiye mete cabu ca, yepä tabe umle lica ge egä mename seemo te ngena jewenenige, nää toraca gyene coo lipu. Tabé apu jengenige egä, “Cane

pama wama ogrenine.” <sup>10</sup> Teepi niinäce sigu awamuta biname bine sisuplenge-mäsi, puma cita ca nuuja sigu ne sisuplengemäsi, siige ceräcerägääbu tatyaramtäsi ayana grana gome me cewerage abacitame. Pui gaabe te teemämu äpäcutige, siige teepi asatäsi, mete me otni gaabe cabu aalige, piba taatu mename seemo te Peteru ne ebmalige.

<sup>11</sup> Peema cita ca Peteru toraca umle äbitige ngena te bääbitige teeme tääpume. Tabe jiicige egä, “Ai lui toraca ge! Yageyame te teeme mename seemo ne tityepige, cebine Heroda me ime cabu ca nasatige piiyepu iyeta niiya gwidape cabu ca Israela biname cina lui singi gemi käme bau wawename.”

<sup>12</sup> Peteru pui ingwe ca ädige Yoane-Mareko me mage Mariya teeme mete me. Bucurage biname puga tabasecretnumi, irecu ätumutanisi. <sup>13</sup> Peteru puutucu gaabe ne seyäjige, piba mete kaakesea ngulebägrä ngii Rooda toclige ireme. <sup>14</sup> Tabe liba Peteru me tagepogogo opo ewatnige, tabe gege name pi uuwamige, puutucu gaabe ne lica jiitnige, yepä mete me cääri abacitige, jejemige egä, “Peteru pisi nyene puutucu je.” <sup>15</sup> Teepi jojisi egä, “Buduma gäte maane!” Yepä, Rooda jejemige, “Ai lui toraca mene gyene!” Puma cita ca teepi jowecnistisi, “Peei lui pama teeme mename seemo gyene!”

<sup>16</sup> Iyeta pui padare Peteru gaabe ne seyäjanige. Siige, teepi liba gaabe ne jiitnisi, cälu te jitemige Peteru ne päpäname. <sup>17</sup> Peteru teebibine ime ca bojä jewenemige, jejemige Yageyame te lipu teebine sisatige krokeciyiye mete cabu ca. Peteru

piba jejemige egä, “Yakobu\* naabibine jejemep-eye ai mule poto cidi me.” Siige, tabe teebibine ebmalemige, nuuja gome me ädige.

<sup>18</sup> Krokerage liba, awamuta biname cina mage teemeteme äcnechinisi egä, “Peteru liiyeme bädige?” <sup>19</sup> Piba Heroda teebibine jejemige Peteru ne ärngime, yepä teepi lica jepänisi. Puma cita ca Heroda awamuta biname bine itemlemige, siige teeme cubu biname bine jejemige pui awamuta biname budre me acraname.

Pui ingwe gaabe ca, Heroda Yuudea gawe cabu ca ädige Kesarea gawe cabu me puma matikolä lenajame.

### *Heroda me Budre poto cidi me*

<sup>20</sup> Heroda mage claabe ge Turo piiyepu Sidona cewe biname cama, peeiname pi teepi gigri otnini-isi Heroda cama mene me. Teepi Heroda me mete ire atwiyame ngii Blasto bau me niinäce seclige, teebine teeme biname me jewenisi. Siige, piba Heroda bau me eclige, teebine itemlisi poode ten cama äbitame, ingle naace popi teepi teeme deedei gwidape yaawadanemusi Heroda me gawecewe cabu ca.

<sup>21</sup> Puma cita ca Heroda bimu ne ecitige, siige teeme mararage cäbletääpe ne pui bimu cabu asigrärige, adnatige teeme atrana puupu cabu, puma cita ca biname bine mene jejajanemige.

<sup>22</sup> Biname cina ala cama jiicemisi egä, “Biname pana mene lica gyene pee, yepä uuje gyene!”

<sup>23</sup> Piba taatu Yageyame te mename seemo ne tityepige. Tabe Heroda ne budre pita ecäridge, ingle

---

\* **12:17:** Yakobu: Pui Yakobu lui Yeesu me igane gyene. Ire Matayo 13:55.

naace popi Heroda singi lica ge Acejiyame ne opo gaabe me acitame, yepä biname bime awepyeräja bine tabe ewademige teeme täüpume. Cuple cina teeme tääpe erwisi, budre me itwitisi.

<sup>24</sup> Yoo siige, iyeta padare bucurage biname cina Acejiyame me Miji Mene yäätecijemuge, Yeesu ne piba jäätprungusi.

<sup>25</sup> Banaba naabi Saulo rarekaake waadena ne liba epiräsi, teepi Yerusalem ca tacnenutäsi, mamye biname ngii Yoane-Mareko ne ten cama secanäsi.

## 13

*Antiyoka Ätrunga Biname cina Banaba Saulo naabibine Kaakesea täüpume Jäätyepisi*

<sup>1</sup> Puga ge Antiyoka ätrunga biname cama poto Acejiyame me tagepogogo mene iicana biname piiyepu abiberäja biname: Banaba; Simeona, lui yaainusi cäsäcäsä tääpe biname ca; Lukiyus, lui Kurene ceweyame ge; Manena, lui Mopeyame Heroda me keege ge teepi liba bägrä je; cuta piiyepu Saulo. <sup>2</sup> Teepi liba Yageyame ne ewepyeräjisi piiyepu deedei cäco icrajige Acejiyame ne ngene apecname, Aceji Seemo piba teebibine jemige egä, “Weene Banaba Saulo naabibine cäme gome tääyeblingteye kaakesea wawename cane lui täüpume teebibine ituge jaji.”

<sup>3</sup> Peei ingwe ca teepi iyeta deedei cäco cuta cääri icrajige, irecu ätumutanininisi, piba ime icrane-misi Banaba Saulo naabibime papa cabu, piba jäätypisi teebibine.

*Kupro Curäje*

<sup>4</sup> Aceji Seemo te Banaba Saulo naabibine jäätylepige. Teepi asatäsi Selukiya malu cewe me, puma cita ca poo gaabe aaclige Kupro curä me. <sup>5</sup> Teepi liba pui curä cabu Salami cewe me atyaramtäsi, teepi puga Acejiyame me mene Israela biname bime abasecretna mete cabu jejajanemäsi. Puga ge ten cama Yoane-Mareko teeme kaakesea cabu ätityerame.

<sup>6</sup> Teepi curä ne piba jeclänutäsi nuuja poto malu me, Paapos cewe me atyaramtäsi. Teepi puga opopa jewenäsi yepä piiseba biname lui me ngii Bar-Yeesu. Tabi Israela biname ge lui te walya jiicuge egä, “Cane Acejiyame me mename biname gäne.” <sup>7</sup> Bar-Yeesu lui curä Mopeyame Sargiyu-Paulu me biname ge. Mopeyame Sargiyu-Paulu lui mage ngene atwanena biname ge. Tabi Banaba Saulo naabibine taasoglicige teeme opo gaabe otni-me, ingle naace popi tabe singi Acejiyame me mene ätecijame. <sup>8</sup> Yepä, pui piiseba biname, teeme nuuja ngii Griik mene ca lui Eluma, tabe singi Saulo Banaba naabibime mene iibename, cuta singi Mopeyame Sargiyu-Paulu me gaabe armime Yeesu bau ätrungame. <sup>9</sup> Saulo lui teeme nuuja ngii Paulo, Aceji Seemo me kokre te babo äbitige teeme cabu. Paulo piba pui piiseba biname conocäco ire jetwige, <sup>10</sup> jejige egä, “Maane Satani me bägrä gäte! Maane cubuyame gäte iyeta conocäco mule täüpume. Määme angletneja mule bucurage gemi. Maane singi gäte cime Yageyame me toraca mene aboclomtame walya mene me! <sup>11</sup> Yageyame te teeme ime yaacitege määme cabu me, siige määme irecu cina määsumäsu page läbitäsi. Teeme singi padare ngalebora maane bimu apaclyera ne lica

pa jepänanepi.”

Siige, piba taatu krokeciyiye pana klokakloka te teeme irecu aacwabige. Tabe otnetnäjige biname ne ärngime teebine ime ca aweclujame. <sup>12</sup> Mopeyame Sargiyu-Paulu liba pee i ne jepänige, Paulo me mene jitprungige. Tabe ngenecu jelonicige mime Yageyame poto cidi me abiberäja name pi.

### *Antiyoka Cewe Pisidiya Gawe cabu je*

<sup>13</sup> Paulo piiyepu ten cama lui biname, teepi Paapos cewe ca poo gaabe eclige cewe ngii Perga me, lui Pampuliya gawe cabu. Puga teeme ätityerayame Yoane-Mareko teebibine taabmalige, Yerusalem me acnenutige. <sup>14</sup> Teepi Perga cewe ca doro gaabe aaclige, Antiyoka cewe me atyaramtäsi, lui Pisidiya gawe cabu. Sabade bimu cabu teepi abasecretna mete me abacitäsi, adnatäsi. <sup>15</sup> Puga biname cina poto cotre mene ecnemisi Oogäräneji Mene cabu ca, Moose lui mene sogäremuji, cuta piiyepu poto Oogäräneji Mene mename biname cina lui sogäremujisi. Peei liba siige, abasecretna mete modamoda biname cina piba mene jityepisi Paulo Banaba naabibime bau me egä, “Cime biname, cine singi weene biname bine bäärmä agedname, weeme mene liba pisi nyene cibibine kokre ceerame.” <sup>16</sup> Puma cita ca Paulo jeclajutige, ime ewejängtige, piba gije abacitige mene jajanename. Agesa teeme mene:

### *Paulo me Mene Israela biname bime tääpume*

“Ama lui Israela biname piiyepu iyeta nuuja gawecewe biname lui cina Acejiyame bau me irecu lätumutanininusi, weene käme mene

nätecijeye! <sup>17</sup> Acejiyame lui ne Israela biname cina yaawejanusi, mime sasa kaakesaare bine jejäcremuji, teebibine piba ablime jewenemuji pui padare cabu teepi liba säärpe biname icrajuji Aikupito gawe cabu je. Acejiyame teeme babo kokre ca teebibine Aikupito cabu ca sewademuji. <sup>18</sup> Footi kämäge ngalebora Israela biname ätecija cäco icrajuji, yepä tabe teebibine cängena ire jetwemuji pui daapo taatu cewe cabu je. <sup>19</sup> Tabe seben maramara biname tomi bine Kanana gawe cabu ca iyecräjemuji, piba teeme Israela biname bine yageyame me jewenemuji Kanana gawe tääpume. <sup>20</sup> Tabe pama fooa hanred fifti kämäge ngalebora peei bine epiremuji.

Pui padare ingwe ca tabe ablaweja biname ecäranemuji Israela biname bine teeme ire atwime, ngälu mename biname Samwela me padare te tatyaramtuji. <sup>21</sup> Siige, teepi liba Acejiyame ne mope biname tääpume itinärujisi, tabe piba Saulo teeme mopeyame tääpume ecäremuji. Saulo lui Kiisa me bägrä ge Benjamin me ingle cabu ca. Tabe Israela biname bime mopeyame enajuji footi kämäge cama, <sup>22</sup> siige Acejiyame teebine iyebilng-tuji, piba Daawida ne mopeyame me jewenuji. Age Acejiyame me mene Daawida poto cidi me: ‘Cane asicnantine Yese me bägrä Daawida lui căme singirage biname gyene, lui te iyeta căme singi jaawenemuge.’ <sup>23</sup> Yepä Daawida me kaakesaare Yeesu peese nyene, Acejiyame lui ne jewenuji Israela biname bine niiya mule cabu ca äsecrerame, tabe lipu itu jiicuji. <sup>24</sup> Yeesu liba camuge giye abacita teeme kaakesea, piba Yoane niiye ca

äciseja biname te iyeta Israela biname bine bäärmí mene jegednemuji teeme niiyaniya mule cabu ca atatrongärärame piiyepu niyiye ca äciseja ne acatame. **25** Yoane teeme kaakesea ne apirame liba äbitige, tabe biname bine jejemuji egä, ‘Weene lipu ngene jotwaniniye egä cane laasi näne? Weene lui ne jewagrijeniye, cane tabe lica gäne. Yepä, weene ire! Tabe tädenige cäme ingwe poto ca. Cane miji lica gäne teeme ernge gwidape iirecame teeme ernge cabu ca.’ Siige.

**26** Yoo, cäme binamewale, weene lui Abrahamo me kaakesaare gemi, piiyepu weene lui cina Acejiyame ne yaawejanuye, yepä Abrahamo me kaakesaare lica gemi, mime tääpume Acejiyame te mene tityepuji egä äsecrera pisi nyene niiyaniya mule cabu ca. **27** Peei mene lui mime tääpume, ingle naace gyene Israela biname lui cina Yerusalema ngalebora icrajenige piiyepu teeme mutre biname, teepi umle lica ge egä Yeesu peese nyene pui biname teebibine niiya cabu ca äsecrerame. Cuta piiyepu teepi cängena umle lica ge mename biname bime mene, teepi lui Oogäräneji Mene cabu yaacnemusi iyeta Sabade bimu cabu. Yepä, teepi pui mename biname bime mene toraca me jewenemujisi, teepi liba Yeesu ne jigyujisi. **28** Ngänu gyene teepi äblicäco toraca ingle ne päpäna Yeesu me agli tääpume, yepä teepi Pilato ne itemlujisi teebine budre me acitame. **29** Teepi liba iyeta mene ibibi jewene-mujisi, lui pití nemí sasa Oogäräneji Mene cabu Yeesu poto cidi me, piba teebine baarge uli cabu ca itrungantujisi, gape me ecitujisi. **30** Yepä, Acejiyame teebine budre cabu ca erpinantuji, **31** siige

bucurage bimu cabu tabe tabocloclomtanuji teeme bau me, lui cina Galilaya ca itu ecluji ten cama Yerusalem me. Pui cina page ire arbi biname gemi teebine aitname mime Israela biname bine umle wawename. <sup>32-33</sup> Cine age temi page, ai mene cuta weeme bau acaname egä Acejiyame lui mene mime kaakesaare bine jejemuji tabe pagege wawena, tabe mime padare cabu itu jewenuji mime tääpume, lui teeme kaakesaare gemi, tabe liba Yeesu ne budre cabu ca erpinantuji. Pui poto cidi me mene pisi nyene Salamo uupera peba poce neenenii cabu egä,

‘Maane käme bägrä gät;

cane page määme Babe me bäbitine.’

<sup>34</sup> Cuta agesa nuuja mene Acejiyame lui jiicuji Yeesu me budre cabu ca arpinenta piiyepu teeme tääpe ocwäwa cäco poto cidi me egä,

‘Cane weebibine toraca kängena miji cire jiwipene, cane lipu mene Daawida ne jejujine.’

<sup>35</sup> Daawida pee mene jeitnuji egä,

‘Maane käme trupa ne licarage cirege abmala gape cabu ocwåwame, cane lui määme miijirage kaakesea biname gäne.’

<sup>36</sup> Daawida lui padare cabu ireclota enajuji, tabe Acejiyame me singi jewenemuji, piba budre äbituji. Teepi gape me teebine ecitujisi teeme kaakesaare gome, siige teeme tääpe gape cabu ocwåwuji. <sup>37</sup> Yepä, pepu lica äbituji teeme tääpume Acejiyame lui ne budre cabu ca erpinantuji. Peei lui Yeesu sine. <sup>38-39</sup> Yoo, käme binamewale, weene iyeta miji toraca umle egä pee mene Yeesu me cabu ca gyene cane weebibine jijenininine ai Miji

Mene niiyaniya mule cabu ca kälyä äbita poto cidi me. Weene miiji umle egä iyeta biname lui cina Yeesu ne jäätprungusi, teepi iyeta äseji gemi teeme niiyaniya mule cabu ca, lui mule cabu ca Moose me cotre äblicäco weebibine äsecrera.  
<sup>40-41</sup> Oogäräneji Mene te apu jiicenige egä,  
 ‘Ire, weene laatibi Acejiyame ne jäägyuye!

Cäro, weene călu te pa jitipi, piba budre päbitipeye,  
 ingle naace popi page cane ngena jewenenine,  
 weene lica jitrunjeniye,  
 ngänu gyene cuta nuuja te liba weebibine  
 ibiberäjininuge!’

Yoo, weene cängena inajininige, piba peei mename biname bime sasa mene weeme bau lica pa läbitepi!

<sup>42</sup> Siige mene, Paulo naabi Banaba liba abasecretna mete ne sebmaläsi, biname cina teebibine jaajisi acnenutame nuuja Sabade cabu teebibine cuta cerämu abiberäjame peei mene poto cidi me.  
<sup>43</sup> Ingwe ca biname cina abasecretna mete ne liba sebmalisi, poto Israela biname piiyepu poto nuuja gawe biname lui cina Israela biname bime irecu ätumuta mule itu yaacatepesi, teepi Paulo Banaba naabibine ingwe ääcwisi. Peei neeneni ätyepäneji biname piba teebibine mene jejemäsi piiyepu bäärmi jegednemäsi teepi Acejiyame me baborage miiji cabu cängena lenajame.

*Paulo piiyepu Banaba bime Mene Acejiyame  
 Umle căco biname bime tääpume*

<sup>44</sup> Nuuja Sabade bimu cabu, pama iyeta biname pui cewe cabu tabasecretnige mime Yageyame

poto cidi me mene ätecijame. <sup>45</sup> Yepä, poto Israela biname cina biname tomi ne liba jepänisi, teepi ire patre eglemisi egä, "Cime biname bine bewadimige," piba Paulo me mene jeclanisi, tee-bine jicnecisi. <sup>46</sup> Yepä, Paulo naabi Banaba wälu cäco jejemäsi egä, "Miiji ge cine Acejiyame me mene niinäce weeme bau iicana, yepä ingle weene jiggyeniye peei mene ne, apu egä weene ibibi lica gemi iyeteta ireclota tääpume, peei name pi cine weebibine ibmalininago, nuuja gawe biname bime bau me niclenige. <sup>47</sup> Cine apu jewenenago, ingle Yageyame cibibine ituge jaji egä,  
 'Cane weebibine apaclyera pana icitenine nuuja  
 gawe biname bime tääpume,  
 toraca ireclota gaabe iyeta gawecewe biname  
 bine awabame.' "

<sup>48</sup> Siige, nuuja gawe biname liba peei mene jitecijisi, teepi gege ge, Yageyame me mene ewepy-eräjisi. Laati bine Acejiyame ituge jäjacra toraca ireclota lui ngälu cäco päpäname, teepi Yeesu ne jitrungisi.

<sup>49</sup> Bucurage biname lui cina Antiyoka cewe mameta icrajige, mime Yageyame me mene itecijemige. <sup>50</sup> Yepä, poto Israela biname cina cewe modamoda biname bine ngenecu alonecame jewenemisi, cuta piiyepu poto dogwe magebi bine ngenecu alonecame jewenemisi, lui cina Acejiyame ne yaawejanusi. Pui Israela biname piba gije abacitinisi Paulo Banaba naabibine mäpu cabu acitame, siige teeme gawe cabu ca ääyecräjisi. <sup>51</sup> Pui neeneni ätyepäneji biname cina teeme ernge cabu ca secre äglubejäsi. Teepi singi pepu mule ca awabame egä biname bime ätrunga cäco mule

name pi teepi cewe ne sebmaläsi. Teepi puma cita ca Ikoniya cewe me aaclige. <sup>52</sup> Siige, Paulo me mene name pi Antiyoka ätrunga biname cina mage gege cama icrajige, piiyepu Aceji Seemo me kokre ten cama ge.

## 14

### *Ikoniya Cewe je*

<sup>1</sup> Peei yepä mule te äbitige Ikoniya cewe je. Paulo naabi Banaba aaclige Israela biname bime abasecretna mete cabu me, puga mene jejana nemäsi kokre cama. Siige, bucurage Israela biname piiyepu nuuja gawe biname piba Yeesu ne jitprungisi. <sup>2</sup> Yepä, poto Israela biname lui cina singi lica ge Yeesu ne ätrungame, teepi poto nuuja gawe biname bine ngenecu alonecame jewenemisi, niiya mene ca teeme ngene atwanena jetatrongtemisi ätrunga biname bime bau ca. <sup>3</sup> Yoo, Paulo naabi Banaba puga aanajige lecaleca padare cama. Teepi mene wälu cäco jejana nemäsi Yageyame poto cidi me. Tabé te kokre ääcärige teebibine ciitaca mule bine wawename. Tabé pepu jewenige awabame egä teeme mene lui toraca ge, egä Acejiyame owecu gyene biname bime tääpume cuta singi teebibine ätyyerame. <sup>4</sup> Ikoniya cewe biname cina äplinisi: poto cina singi Israela modamoda biname bime tääpume; poto cina singi pui neenenä ätyepäneji biname bime tääpume.

<sup>5</sup> Puma cita ca poto Israela biname piiyepu poto nuuja gawe biname teeme modamoda biname cama mene jitranisi ätyepäneji biname bine niiya wawename piiyepu kula ca budre me äbyecrame. <sup>6</sup> Paulo naabi Banaba peeí poto cidi me liba umle

äbitäsi, teepi uucräsi Lukaniya gawe cabu me, luga ge neeneni cewe ngii Lustra piiyepu Derbe cuta piiyepu poto matimati cewe. <sup>7</sup> Teepi puga Miji Mene biname bine jejananemäsi.

### *Lustra Cewe piiyepu Derbe Cewe je*

<sup>8</sup> Puga ge Lustra cewe je yepä biname lui teeme ernge niiyaniya ge. Tabé pepu aplimpläneji ge, äblicäco otinetneja. <sup>9</sup> Tabé adnatäneji ge, Paulo me mene jitecijige. Paulo teebine opo ewatnige egä tabe teeme mene jitrunenige, siige pee iätrunga name pi tabe miji ge miji me äbita. Paulo piba teebine conocäco ire jetwige, <sup>10</sup> babo tage ca jie jige, “Abujängti, määme ernge ca conocäco naacla jutege!” Peei rooriye te wata abujängtige, siige otinetnäjige. <sup>11</sup> Biname cina jepänisi Paulo lui ne jewenige, teepi piba ala abayisi teeme Lukaniya gawe mene ca egä, “Cabucewe uuje cina ai gawe cewe biname pana me bateplengtäsi, täinäsi mime bau me!” <sup>12</sup> Teepi Banaba ne ngii ecärisi Jeeu piiyepu Paulo ne ngii ecärisi Hermes, ingle Paulo te mene jiicige. Teepi apu jewenisi, ingle teepi jengemige egä cabu je piti nemí neenení uuje Jeeu piiyepu Hermes. <sup>13</sup> Yoo, Jeeu me iiwäreja mete puga ge cewe wajwa je. Siige, Jeeu tääpume iiwäreja biname te rooriye kau bine piiyepu uli popo sewadige cewe grana gome me. Piba pui iiwäreja biname piiyepu biname tomi cina singi kau aglime ätyepäneji biname bine iiwärejame, ingle teepi apu jengemige egä Paulo piiyepu Banaba lui Jeeu piiyepu Hermes naabi tegi.

<sup>14</sup> Banaba naabi Paulo biname bime mene liba äätecijige, teepi ngenecu mäpu name pi teeme

cäbletääpe iderecmäsi piiyepu uwamäsi biname tomi cabu me, siige baborage tage ca mene jemisi egä, <sup>15</sup> “Biname, weene ngena jeweneniye? Cine ai gawe biname gegi, weene liiyepu! Cine age tegi Miji Mene aitname, weebibine ai walya gwidape cabu ca atatrongärame Acejiyame bau me opire wawename, tabe lui toraca ireclota gyene. Peese nyene Acejiyame lui te cabucewe, gawecewe, piiyepu malu bine jewenemuji iyeta teeme gwidape cama. <sup>16</sup> Sasa cabu ca tabe biname bine ire ta jaacitanemuge teepi biname cina teeme singi gaabe cabu otnejame. <sup>17</sup> Yepä, iyeta padare tabe teemämu conocäco taboclomtuge teeme miji ätityera mule cabu. Tabe ngupe ne weeme bau me täätyleuge dume cabu ca, piiyepu gije bine jaawenemuge kuu wawenecame teeme maramara äyi padare cabu kämäge ngalebora. Tabe pepu weebibine deedei icäraninuge weeme ngenecu ne gege wawename.” <sup>18</sup> Paulo ai mene ca jiibemige biname bine lui cina singi teebibine kau ca iiwärejame, yepä plowa lica ge teebibine iibaname peei mule cabu ca.

<sup>19</sup> Piba seclige poto Israela biname cina Pisidiya gawe Aniyoka cewe cabu ca piiyepu Ikoniya cewe cabu ca. Teepi biname bine giri jecitanemisi teeme singi wawename. Teepi Paulo ne kula ca jibyecrisi, piba teebine elädnisi pui babo cewe Lustra cabu ca. Teepi apu jengemige tabe budre ge. <sup>20</sup> Yepä, ätrunga biname cina liba seclige, Paulo ne jewaclomtisi, tabe piba arpinantige, acne-nutige pui cewe me. Siige, nuuja bimu Paulo naabi Banaba aalige Derbe cewe me.

***Paulo naabi Banaba Suriya Gawe Antiyoka  
Cewe me Acnenutäsi***

<sup>21</sup> Paulo naabi Banaba Derbe cewe biname bine Miji Mene jejana nemäsi. Puga bucurage biname teeme mene jitprungisi. Teepi piba acnenutäsi Lustra cewe me, puma cita ca Ikoniya cewe me, puma cita ca matikolä Antiyoka cewe me Pisidiya gawe cabu. <sup>22</sup> Iyeta peei cewe cabu teepi ätrunga biname bine ngenecu kokre ecäremäsi piiyepu teebibine bäärmä jegednemäsi conocäco Yeesu bau ätrungame. Teepi biname bine ebiberäjemäsi egä, “Ai ireclota cabu mine iyeta bucurage mäpu cabu ca täsinago, ingwe ca piba Acejiyame me biname bine waadena cabu me cire yääbäcnepepsi.”

<sup>23</sup> Ätrunga ingle yepäyepä cabu Paulo naabi Banaba biname bine jejäcremäsi mope biname me äbitame ätrunga biname bine waadename. Iyeta cewe cabu teepi irecu ätumutanäsi piiyepu deedei cäco aanajige Acejiyame ne ngene apecname, piba pui cewe ätrunga biname bine mime Yageyame me ime cabu icranemäsi, teepi lui bau me teeme ngenecu ituge acita.

<sup>24</sup> Pisidiya gawe liba jeläcnutäsi, teepi cääri at-yaramtäsi Pampuliya gawe cabu me. <sup>25</sup> Teepi Miji Mene Perga cewe cabu jejana nemäsi, puma cita ca Ataliya cewe me aacliffe. <sup>26</sup> Teepi puma cita ca poo gaabe abyemeräsi Antiyoka babo cewe otnime, luma ätrunga biname cina teebibine Acejiyame me miji ire atwi cabu ituge acita peei kaakesea tääpume, page lui ne bii jimlitäsi.

<sup>27</sup> Teepi liba Antiyoka babo cewe me at-yaramtäsi, ätrunga biname bine tebasecretnemäsi, jejana nemäsi iyeta Acejiyame te ten cabu ca lui

itu jaawenemepi, piiyepu tabe gaabe ne lipu itu jiitnepi gawe maramara biname bime tääpume Yeesu ne ätrungame. <sup>28</sup> Siige, teepi leca padare cama Antiyoka ätrunga biname cama aanajige.

## 15

### *Babo Abasecretna Puga Ge Yerusalemaje*

<sup>1</sup> Poto biname Yuudea ca seclige Antiyoka me, puga giye abacitinisi ätrunga biname bine walya abiberäjame egä, “Weene äblicäo weeme niiya mule cabu ca äsi weene liba lica acata Israela biname bime cotre Moose lui sogäremuji, egä imäbägrä bime tääpe matikolä iirpeclame Acejiyame me cewecu acitame.” <sup>2</sup> Siige, Paulo naabi Banaba pui Yuudea ca biname bime mene jisädemäsi, ten cama mage äciseräjinini tääpe iirputa mule poto cidi me. Siige, teepi iyeta mene jitranisi Paulo Banaba naabibine piiyepu poto nuuja Antiyoka ätrunga biname bine Yerusalemaje ätyepame, puma ätyepäneji biname piiyepu nuuja ätrunga mope biname cama mene atraname tääpe iirputa cotre poto cidi me egä lui biname cina miji acatame.

<sup>3</sup> Siige, ätrunga biname piba teebibine jityepemisi Yerusalemaje me otnime. Teepi gaabe cabu eclige, Poenikiya piiyepu Samariya gawe liba ääsuplangtisi, gaabegabe ätrunga biname bine jejemisi egä, “Gawe maramara biname cina Acejiyame bau me ituge atatrongära.” Ai mene te babo ngenecu gege me jewenemige iyeta ätrunga biname bine. <sup>4</sup> Teepi liba atyarige Yerusalemaje me, ätyepäneji biname piiyepu nuuja mope biname, piiyepu iyeta ätrunga ingle biname cina teebibine

jewacletnäjemisi. Teipi teebibine jeitnemisi iyeta Acejiyame te ten cabu ca ngena bine ituge wawena. <sup>5</sup> Yepä, poto ätrunga biname lui Parisea sigu biname gemi, teipi jeclajutemige, jejemige egä, “Cuta nuuja gawe ätrunga biname miiji teeme tääpe matikolä iirpecla. Weene miiji teebibine jaji iyeta Moose me cotre mene wawename.”

<sup>6</sup> Ätyepäneji biname piiyepu nuuja ätrunga mope biname cina piba abasecretnige mene atraname pui tääpe iirputa cotre poto cidi me. <sup>7</sup> Lecarage padare teipi mene äciseräjininisi.

### *Peteru me Mene*

Peei ingwe ca Peteru abujängtige, jejemige egä, “Cäme ätrunga binamewale, weene umle gemi egä ujarage Acejiyame te cebine weeme cabu ca nätränutuji Miiji Mene Yeesu poto cidi me ja-janame nuuja gawe biname bine teipi ätecijame piiyepu ätrunga-me. <sup>8</sup> Acejiyame lui iyeta biname bime ngene atwanena umle gyene. Tabé Aceji Seemo ne jityepuji cuta nuuja gawe biname bime bau me, tabé teebine mime bau me lipu itu tityepuji. Tabé pepu jewabuji egä, cuta nuuja gawe biname miiji gemi teeme bau otnime. <sup>9</sup> Tabé nuuja mara lica jewenemuji cime tääpume piiyepu teeme tääpume. Tabé cuta teeme ngenecu cabu ca niiya mule iyeblengemuji teeme ätrunga name pi. <sup>10</sup> Yoo siige, weene page ngenome singi gemi Acejiyame ne apicetnäramē? Lui ätrunga biname Israela biname lica gemi, teeme palace cabu weene cotre bine icranemeye, lui bine mine piiyepu mime kaakesaare äblicäco ge wawena. <sup>11</sup> Pepu gone! Mine jäätprungusi egä pui lui Yeesu

Keriso me owecu piiyepu miijirage ätyera miji pi mine niiyaniya mule cabu ca läsecräringo, teepi liiyepu, lica cotre wawena name pi.”

**12** Siige, teepi iyeta bojäcu piba icrajige Banaba Paulo naabibime mene ätecijame, teepi liba mene jeitnemäsi iyeta ciitaca mule piiyepu kokre mule gwidape poto cidi me, Acejiyame lui bine ten cabu ca itu jewenemuji nuuja gawe biname bime tääpume.

### *Yakobu me Mene*

**13** Teeme mene liba siige, Yakobu piba abujängtige mene me egä, “Cäme ätrunga binamewale, käme mene nätecijeye! **14** Simona-Peteru bii nijinige, Acejiyame teeme owecu niinäce lipu jewabemuji pui biname bine lui Israela biname lica gemi, teeme poto bine liba sewademuji teeme biname me äbitame. **15** Ai Simona-Peteru me mene ibibi gyene Acejiyame me sasa mename biname bime mene cama, ingle Oogäräneji Mene cabu pisi nyene egä,

**16** ‘Yageyame te Daawida me ingle ne mete ca etonärigie, jiicige egä:

Ingwe ca cane liba cire tacnepene,  
cane piba Daawida me atramäneji mete cire  
yaawejängtepene;  
poto pui sasa pargi cama cääri cire  
yaarangepene;  
kokrerage me cire jaawenepene.

**17** Piba iyeta nuuja biname käme bau cire saaclepi,  
iyeta lui Israela biname lica gemi,  
cane lui bine ituge äjäcra käme biname me  
äbitame.

**18** Apu jiicenige Yageyame te, lui ujarage biname bine umle jwenemuji ai poto cidi me.’”

**19** Siige, Yakobu piba jejemige ätrunga biname bine egä, “Cäme ngene atwanena apu egä mine miiji lica ngenecu mäpu ceera pui biname bine lui Israela biname lica gemi, lui cina Acejiyame bau tatatröngärinini. **20** Yepä, mine miiji mene oogära teeme bau teebibine jajime egä: Gone deedei yäärwäjimuye lui cude ge, ingle iiwäräneji ge uuje bine; piiyepu gone cibu yäärnäjimuye lui teeme mäju cabu uudi yaanajuge; piiyepu gone uudi yääänäjuye; cuta piiyepu sargi mule gone wawena. **21** Siige, teepi miiji ai cotre bine wawena, ingle naace popi bucourage kämäge ngalebora biname cina Moose me Cotre bine yaacnemusi iyeta Israela biname bime abasecretna mete cabu iyeta Sabade bimu, cuta piiyepu Moose me Cotre mene jajanäneji ge iyeta cewe cabu ta.”

### *Teepi Nuuja Gawe Ätrunga Biname bime bau Mene Jityepemisi*

**22** Siige, pui ätyepäneji biname piiyepu nuuja ätrunga mope biname cina iyeta ätrunga ingle biname cama mene jitranisi poto biname bine äjäcrame teeme cabu ca, teebibine ätyepame Antiyoka cewe me Paulo naabi Banaba cama otnime. Teepi neeneni biname bine jaajisi: yepä lui Yuda, lui ne yaainusi Barsaba ca, cuta nuuja lui Siila. Pui neeneni cina lui modamoda ätrunga biname gegi. **23** Teepi apu leta ne yoogärisi, ten cama jityepisi egä:

“Ätrunga biname lui Israela biname lica gemi, lui cina icrulenige Antiyoka babo cewe cabu,

piiyepu Suriya, Kilikiya gawe cabu je, cine weebibine sebore jiweninago.

Cine weeme biname gemi, ätyepäneji biname piyepu nuuja mope biname.

<sup>24</sup> Cine mene nitecijinige egä cime poto biname weeme bau me itu saaclepi, lui cina teeme kokre mene ca weebibine ngenecu mäpu itu icäripesi. Yepä, teepi cime bau ca lica mene jääpänepesi peeи ne wawename. <sup>25</sup> Yoo, cine pui name pi yepä gome tabasecret-ninago. Cine yepä ngene atwanena cama mename biname bine jaajisi weeme bau ätyepame. Teepi Banaba naabi Paulo cama aaclenige, lui cime ngenecurage biname gegi, <sup>26</sup> lui cina mäpu ireclota jepänanujäsi mime Yageyame Yeesu Keriso me kaakesea name pi. <sup>27</sup> Yoo, cine Yuuda naabi Siila jäätyepenisi weeme bau me. Teepi weeme opo gaabe pa jiicepäsi cine lui mene ne yoogärenago. <sup>28</sup> Cine Aceji Seemo cama mene jitranisi nuuja mäpu cotre lica weebibine ceerame, yepä ai taatu cotre egä: <sup>29</sup> Gone deedei yäärwäjimuye lui iiwäräneji ge uuje bine; gone uudi yääänäjuye; gone cibu yäärnäjimuye lui teeme mäju cabu uudi yaanajuge; piiyepu sargi mule gone jaawenuye. Siige, weene miiji pagege lenaja, weene liba ai cotre bine cängena jaawenemuye.

Mene peese. Äto.”

<sup>30</sup> Yerusalemä ätrunga biname puma cita ca Yuuda Siila naabibine pui mene cama jäätyepisi An-

tiyoka me. Puga teepi iyeta ätrunga biname bine jebasecretnemäsi, teebibine pui oogäräneji mene ecäremäsi. <sup>31</sup> Antiyoka ätrunga biname pui mene liba ecne-misi, teepi mage gege ge, ingle naace popi peei mene te teeme ngene atwanena plowa me jewanemige. <sup>32</sup> Yuuda naabi Siila lui Acejiyame me tagepogogo mene iicema biname gegi, teepi leca padare cama ten cama mene jiicemäsi teebibine kokre piiyepu miji ngenecu ceerame. <sup>33</sup> Teepi poto bimu ten cama liba aanajige, piba Antiyoka ätrunga biname cina teebibine aawecnisti poode cama. Teepi teeme bau me acnenutäsi lui cina teebibine ituge ätyepa. <sup>34</sup> Yepä, Siila ngene jotwanige puma lenajame Antiyoka cewe cabu je.

<sup>35</sup> Paulo naabi Banaba poto mabye cama aanajige Antiyoka je. Teepi piiyepu poto nuuja ätrunga biname teta cama mene jejananemisi piiyepu biname bine ebiberäjemisi Yageyame Yeesu poto cidi me.

### *Paulo naabi Banaba Maramara me Äbitäsi*

<sup>36</sup> Poto mabye ingwe ca Paulo jejige Banaba ne egä, "Mine biiri, lacnenutago, mime ätrunga biname bine yäängräremago iyeta cewe cabu ta, mine luma mene tejanenumago mime Yageyame Yeesu poto cidi me. Mine miji umle äbita teepi page lipu icrajenige." <sup>37</sup> Siige, Banaba singi Yoane, teeme nuuja ngii Mareko, ten cama ot-nime. <sup>38</sup> Yepä, Paulo ngene jotwanige egä miji lica gyene teebine acana, ingle pui niinäce otni cabu Yoane-Mareko lica ten cama enajuji teeme kaakesea ngälu gaabe oomlaname, yepä tabe atta-trongtuji, teebibine aabmaluji Pampuliya gawe

cabu je. <sup>39</sup> Paulo naabi Banaba mene äciseräjäsi, siige maramara me äbitäsi. Banaba Mareko cama poo gaabe Kupro curä me ädige. <sup>40</sup> Paulo Siila ne je-jige, siige ten cama abyemärige. Antiyoka ätrunga biname teebibine mime Yageyame me ime cabu aacitisi teebibine ire atwime. <sup>41</sup> Paulo doro ta ädige, Suriya piiyepu Kilikiya gawe cabu ta otnige, ätrunga ingle bine kokre me jewenemige.

## 16

### *Timoti te Paulo naabi Siila cama Otnetnäjige*

<sup>1</sup> Paulo puma cita ca ädige Derbe piba Lustra cewe me. Puga ge Lustra cewe cabu yepä ätrunga biname ngii Timoti. Teeme mage cuta ätrunga magebi gwene, piiyepu Israela cabu ca gwene, yepä teeme babe lui Griik biname gyene. <sup>2</sup> Iyeta ätrunga biname Lustra piiyepu Ikoniya cewe cabu miiji taatu mene jiicusi Timoti poto cidi me. <sup>3</sup> Paulo singi ge Timoti ten cama otnime, tabe pee name pi Timoti me tääpe ne matikolä jiirputige Acejiyame me cewecu acitame. Tabee peei ne jewenige, ingle iyeta Israela biname lui cina icrajinige pui cewe maramara cabu, teepi umle ge egä Timoti me babe lui Griik biname gyene. <sup>4</sup> Teepi liba otnänisi cewe gaabegabe ta, Paulo naabi Siila ätrunga biname bine ecäremäsi pui cotre lui poto cidi me ätyepäneji biname piiyepu ätrunga mope biname cina Yerusalema je itu jaatranepesi. Teepi biname bine jejemäsi pui cotre bine ätrungame. <sup>5</sup> Yoo, ätrunga ingle cina pee äityera name pi ätrunga kokre äbitininisi, piiyepu

iyeta bimu cerämu poto biname sebäcnisi peeи ingle yepäyepä ngalebora me.

### *Trooasi Cewe je Paulo Wama Ogrige*

<sup>6</sup> Teipi Pirugiya piiyepu Galatiya gawe cabu ta aalige, ingle naace popi Aceji Seemo teebibine lica jäätylepige Asiya Probins ngalebora Miji Mene puma iicemame. <sup>7</sup> Teipi liba atyaramtäsi Musiya gawemutre, Bituniya Probins liga abacitäsi, Yeesu me Seemo te gaabe äbäclige teeme otni tääpume. <sup>8</sup> Peeи name pi teipi gaabe ta aalige Musiya gawe cabu, ngälu malu cewe Trooasi ne joomläsi. <sup>9</sup> Peeи ciiye cabu Paulo wama ogrige, lui wama cabu yepä Makedoniya gawe biname ne jepänige. Tabе jeclajutige, teebine itinärigе egä, “Tädi Makedoniya gawe cabu me cibibine ätityerame!” <sup>10</sup> Paulo liba peeи wama ogrige, cine\* piba taatu amacetnäjinago poo gaabe otnime Makedoniya me, ingle naace popi cine mene jitranisi egä Acejiyame pui wama cabu nijinige Miji Mene puma iicemame.

### *Pilipi Cewe je: Ludiya te Ätrungayame me Äbitige*

<sup>11</sup> Cine Trooasi ne sebmalisi, poo gaabe conocäco naalige Samotrake curä cabu me, puma cita ca nuuja bimu naalige, ärpinago malu ligi cewe Neapoli me. <sup>12</sup> Cine puma cita ca doro ta naalige Pilipi cewe me. Yoo, Makedoniya Probins me pui cube cabu Pilipi cewe lui niinäce gaabe cewe gyene. Pilipi cudecewe gyene Rooma cabu ca, yepä Rooma biname cina itu jewenujisi peeи cewe ne, piiyepu cewe mopeyame cina lui Rooma ca

---

\* **16:10:** cine: Luuka puma Paulo cama abasutige.

taacluji. Siige, cine nesae bimu cama Pilipi cewe cabu ninajige. <sup>13</sup> Sabade bimu cine cewe cabu ca naclige baduge ligi me. Cine apu ningенинige egä Israela biname bime irecu ätumuta puupu pisi nyene puma. Cine puga adnatärinago, mene abaitninago magebi cama lui cina babasecretнige baduge ligi me irecu ätumutame. <sup>14</sup> Teeme yepä lui te cibibine nitecijenigne Ludiya tage. Tabе Tiyatira cewe magebi gwene, lui alename yaawademuge mage daremu cama ciriyäciriyä ududi cäbletääpe bine. Ai magebi te Acejiyame ne yaawejanuge Israela biname bime mule ca. Yageyame te teebine ngene atwana tocärigе Paulo me mene ätecijame piiyepu ätrunga-me. <sup>15</sup> Tabе piiyepu teeme mete biname cina niiye ca äciseja liba ecatisi Yeesu me ngii cabu, tabe piba cibibine nisoglicnigne egä, “Naclege cime mete cabu lenajame, weene liba ngene jotwa-naniniye egä cane lui Yageyame ne toraca jäätrungune.” Siige, cine teeme singi ne becatisi, teeme mete me naclige.

*Pilipi je Paulo naabi Siila Krokecikiye Mete cabu Aanajige*

<sup>16</sup> Yepä bimu cine pui irecu ätumuta puupu me liba naclige, cine kaakesea täpume aletnäneji ngulebägrä cama opopa oyisi, lui me cabu niiya cable puga ge. Peei cable te teebine mene iicemame jwaawenuge ciige gwidape poto cidi me. Teeme yageyame cina bucurage rarekaake jääpänemusi teeme pui mule cabu ca. <sup>17</sup> Siige, pui ngulebägrä te Paulo cama cibibine ingwe nicwenige, ala abayige egä, “Age tema biname

lui cina Caburage Acejiyame me kaakesea jaawenusi! Teepi mene jiicenemisi niiyaniya mule cabu ca äsecrera poto cidi me!” <sup>18</sup> Tabe bucourage bimu pepu mule tewenäjumi, ngälu Paulo babo ngenecu mäpu äbitige teeme poto cidi me. Tabe atatrongtige, niiya cable ne jejige egä, “Yeesu Keriso me ngii cabu cane meebine naajenine egä tasati ai ngulebägrä cabu ca!” Siige, niiya cable te peeirage padare cabu asatige.

<sup>19</sup> Ngulebägrä me yageyame cina liba umle äbitininisi egä teeme rarekaake päpäna gaabe lui sabe bääbitige, teepi Paulo Siila naabibine joomlisi, äälädnisi neeneni cewe mope biname bime bau me cole puupu cabu me. <sup>20</sup> Teepi liba teebibine aacanisi pui neeneni cewe mope biname bime cabu me, jaajisi egä, “Ai biname lui Israela biname gegi. Teepi niiya bii jewenäsi mime cewe cabu. <sup>21</sup> Teepi biname bine mule ebiberäjemäsi lui cotre gemi mime tääpume. Mine lui Rooma biname gemi, mine teeme mule äblicäco acata piiyepu wawena.” <sup>22</sup> Biname tomi cabu teebibine claabe cama joomlisi, piba cewe mope biname cina teeme cubu biname bine jejemisi Paulo Siila naabibime cäblettääpe äderecame, teebibine adnaname. <sup>23</sup> Teepi Paulo Siila naabibine oräre jaadna-nisi, piba krokeciyiye mete awamuta biname ne jejisi teebibine cängena ireme. <sup>24</sup> Awamuta biname peezi mene liba itecijige, tabe teebibine aacanige mete cole puupu me, borabora uli cabu ernge ääsinglantige, siige jäätäyige.

*Paulo naabi Siila Krokeciyiye Mete cabu ca  
Asatäsi*

<sup>25</sup> Ciiye duusa mameta Paulo naabi Siila irecu ätumutäsi piiyepu uupera etangäsi Acejiyame bau me. Nuuja krokeciyi mete biname cina jäätjecijisi teebibine. <sup>26</sup> Piba taatu babo ocneja te krokeciyi mete me kula caage bine jekocnäjemige. Puirage padare cabu iyeta grana cina iitnetnäjinisi, piiyepu ayana seea cina gawe me itrametnemige iyeta krokeciyi mete biname cabu ca. <sup>27</sup> Awamuta biname te ute cabu ca arpinantige. Tabe liba jepänemige mete grana bine iitnemäneji, tabe apu jengenige egä krokeciyi mete biname iyeta buucratnige. Siige, tabe teeme cubu turikä ne isatige teemämu aglime, ingle naace popi pee krokeciyi mete biname cina liba uucratna, piba teebine pa yaaglepesi. <sup>28</sup> Yepä, Paulo babo tage ca jejige, “Gone laglute maane! Cine iyeta age tema!”

<sup>29</sup> Puma cita ca pui awamuta biname te ngale tääpume ala abayige, puupu cabu me wata abacitige, tääpe aloneca cama kokorare ääpednutige Paulo Siila naabibime ernge gome. <sup>30</sup> Tabe piba teebibine taasatige, äätemlige egä, “Babo biname, cane miji ngena ne wawena käme niiya mule cabu ca asatame?”

<sup>31</sup> Teepi jewecnistäsi egä, “Jitrungi Yageyame Yeesu ne, piba niiya cabu ca pa asatepi, maane piiyepu määme mete biname cama.” <sup>32</sup> Teepi piba Yageyame poto cidi me mene jejanemäsi teebine piiyepu iyeta biname bine lui teeme mete cabu puga ge. <sup>33</sup> Pui padare ciiye cabu, krokeciyi mete awamuta biname te Paulo Siila naabibine nuuja puupu cabu me aacanige teeme adnana dupe äcisejame. Siige, Paulo naabi Siila pui awamuta

biname piiyepu iyeta teeme mete biname bine niiye ca jicisäjämäsi Yeesu me ngii cabu. <sup>34</sup> Puma cita ca tabe Paulo Siila naabibine aacanige teeme mete cabu me, teebibine deedei ääcärige loolome. Tabe teeme mete biname cama mage gege ge, ingle teepi pui ciyye cabu Acejiyame ne jitprungisi. Siige, deedei kaake poto ca Paulo naabi Siila cääri abacitäsi krokeciyiye mete bora me.

<sup>35</sup> Nuuja krokerage pui neeneni cewe mope biname cina teeme cubu biname bine jityepemäsi krokeciyiye mete awamuta biname bau me mene cama egä, “Peei neeneni biname bine aasatepi!”

<sup>36</sup> Puma cita ca awamuta biname te Paulo ne jejige egä, “Cewe mope biname cina mene tityepäsi cäme bau me maane Siila cama asatame. Weene miji asateye, siige poode cama laaclege.”

<sup>37</sup> Yepä, Paulo pui cubu biname bine jejemige egä, “Birice cibibine nuuja niiya cabu lica nipänumesi, yepä atrana cäco cibibine sobe cabu mage nidnanumesi, ngänu gyene cine Rooma ngii cama biname gegi. Teepi miji cibibine cängena ire atwi iyeta nuuja Rooma ngii cama biname bine liiyepu, yepä teepi cibibine nisinglantumesi krokeciyiye mete bora me. Nää, page teepi singi cibibine ogä ätyepame? Eewe, äblicäco! Cewe mope biname cina miji teepirage te otni cibibine asatame.”

<sup>38</sup> Siige, cubu biname cina Paulo me mene jeitnisi cewe mope biname bime bau me. Teepi liba äätecijige egä Paulo naabi Siila lui Rooma ngii cama biname gegi, teepi wälu ge, ingle naace gyene teeme cotre pisi nyene egä Rooma ngii cama biname ne atrana cäco gone niiya

jaawenuye. <sup>39</sup> Teepi pee name pi Paulo Siila naabi bau me aalige poode mene jajime. Teepi piba tee-bibine aasatäsi krokeciyi mete cabu ca, teebibine äatemli cewe ne gomalame. <sup>40</sup> Siige, Paulo naabi Siila krokeciyi mete cabu ca piba asatäsi, aalige Ludiya me mete me. Puga teepi ätrunga biname bine edäremäsi, mene jejemäsi cängena ätrungame Yeesu ne, siige cewe ne ebmaläsi.

## 17

### *Tesalonika Cewe je*

<sup>1</sup> Paulo naabi Siila neeneni cewe Amapipoli piyyepu Apoloniya tääsuplingtäsi, aalige Tesalonika cewe me, luga ge Israela biname bime abasecretna mete. <sup>2</sup> Paulo ädige pui abasecretna mete cabu me, ingle teeme mule pepu ge. Puga nesa Sabade bimu cabu tabe biname cama mene äciseräjige Oogäräneji Mene cabu ca. <sup>3</sup> Tabe pui mene teebibine ebiberäjemige, piyyepu pui cabu ca eboclomtige egä Keriso te miji mäpu padare piyyepu budre päpäna, piba budre cabu ca arpinenta. Paulo jejemige egä, "Ai Yeesu cane lui poto cidi me jijenininine, tabe peese nyene Keriso, biname bime niiya cabu ca äsecrerayame." <sup>4</sup> Poto pui biname cina Paulo me mene jecatisi piyyepu Paulo naabi Siila cama abasutininisi. Bucurage Griik biname lui cina Acejiyame bau irecu lätumutininisi piyyepu bucurage mope magebi teepi cuta Paulo me mene jecatisi.

<sup>5</sup> Yepä poto Israela biname cina ire patre jeglisi, ingle bucurage biname Paulo bau me otninisi. Teepi jebasecretnemisi poto kaakesea umle cäco niiya biname bine gaabe gome ca, tomi jewenisi.

Teepi cewe biname bine giri jecitemisi, piba Yasona me mete me claabe cama eclige, ebäcnisi. Teepi singi Paulo Siila naabibine oomlaname, biname tomi cabu me acaname,<sup>6</sup> yepä lica jäätäni teebibine. Teepi piba Yasona piiyepu poto nuuja ätrunga biname bine oomleji ewademisi babo cewe mope biname bime bau me, piiyepu babo tage ca jiicemisi egä, “Peei biname Paulo naabi Siila, lui cina mage niiya mule jaawenemepäsi iyeta poto ta, teepi mime cewe me taaclumi.<sup>7</sup> Siige, Yasona te teebibine ire jaatwenige teeme mete cabu. Teepi iyeta cina Rooma Mopeyame me cotre bine jetropengäjenemisi, jiicenemisi egä kirece mope biname pisi nyene, teeme ngii Yeesu sine.”<sup>8</sup> Siige, biname tomi piiyepu cewe mope biname ai mene liba itecijemige, teepi ngenecu niiya me äbitininisi.<sup>9</sup> Siige, cewe mope biname cina asata rarekaake bine etomlecmissi Yasona piiyepu ten cama lui biname teeme bau ca, piba teebibine jityepemisi.

### *Berea Cewe je*

<sup>10</sup> Ciiye te liba tuumlige, piba taatu Tesalonika cewe ätrunga biname cina Paulo Siila naabibine jäätäyepisi Berea cewe me claabeclabe biname wälu name pi. Teepi liba atyaramtäsi Berea cewe me, Israela biname bime abasecretna mete me aaclige.<sup>11</sup> Berea cewe cabu lui Israela biname teepi lica Tesalonika cewe cabu Israela biname pana ätecija cäco ge. Teepi babo singi Paulo me mene ätecijame, piiyepu iyeta bimu teepi Acejiyame me Oogäräneji Mene labiberäjininus umle äbitame egä Paulo me mene liba toraca ge.<sup>12</sup> Teeme bucurage cina teeme mene jitrungi-si, cuta piiyepu

bucurage dogwe Griik magebi piiyepu bucurage Griik rooriye. <sup>13</sup> Yepä, Tesalonika cewe cabu lui Israela biname, teepi liba itecijemige egä Paulo Acejiyame me mene jiicemuge Berea cewe cabu je, teepi piiyeme eclige, puga biname bine ngenecu jalonecmisi piiyepu tomi cabu lui biname bine claabe me jwenemisi Paulo täüpume. <sup>14</sup> Siige, Berea cewe ätrunga biname cina Paulo ne wata jityepisi malu me, yepä Siila naabi Timoti Berea je aanajige. <sup>15</sup> Lui ätrunga biname cina Paulo ne malu me jewecitisi, teepi ten cama poo gaabe eclige ngälu Atena babo cewe me atyarige. Puma cita ca teepi Berea me täcnäriga Paulo me mene cama egä Siila naabi Timoti miji wata teeme bau otnime.

### *Atena Babo Cewe je*

<sup>16</sup> Paulo liba jaawagrijige Siila Timoti naabibine Atena cewe cabu je, tabe ngenecu mäpu äbitige, liba jepänemige ime ca wawenäneji uuje, biname cina lui bine yaawejanusi piiyepu yi-iwäräjemu. Tabe ngenecu mäpu gyene, ingle pui gwidape lui bucurage ge Atena cewe ngalebora je. <sup>17</sup> Tabe mene läciseräjuge Israela biname cama piiyepu nuuja gawe biname cama lui cina Acejiyame ne yaawejanusi, tabe liba Israela biname bime abasecretna mete cabu. Cuta piiyepu iyeta bimu gaabegabe tabe eei biname cama mene läciseräjuge cewe cole puupu cabu, lui cina piyyeme yaacluge. <sup>18</sup> Poto abiberäja biname lui cina Epikuro sigu cabu piiyepu poto lui cina Stowika sigu cabu, teepi Paulo cama mene äciseräjinini.

Poto cina jiicisi egä, “Ai biname te ngena buduma mene singi iicaname?”

Yepä, nuuja cina jiicisi egä, “Teeme mene lui nuuja gawe biname bime uuje poto cidi me.” Teepi naace name pi pepu jiicemisi, ingle Paulo lui Yeesu poto cidi me jiicige, cuta piiyepu teeme budre cabu ca alotnenta poto cidi me.<sup>19</sup> Teepi puma cita ca Paulo ne ecanisi Atena cewe modamoda biname bime abasecre-tna cabu me Areo podo cabu me. Puga teepi Paulo ne jejisi egä, “Cine singi umle me ai kirece abiberäja maane lui jiicenenenite.<sup>20</sup> Poto määme mene cine lui nitecijinige, mara opo gemi cime tääpume. Cine singi umle me teeme abocломta lipu ge.”<sup>21</sup> Yoo, iyeta Atena cewe biname piiyepu ten cama lui catecewe biname, teepi singi iyeta padare mene iicaname piiyepu ätecijame ciitaca kirece ngene atwanena poto cidi me.

### *Paulo me Mene Cewe Modamoda Biname bime Abasecretna cabu*

<sup>22</sup> Paulo jeclajutige cewe modamoda biname bime abasecretna cabu, teebibine jejemige egä, “Atena cewe biname, cane jepänemine egä weeme uuje iiwäreja mule nesae lica gemi.<sup>23</sup> Cane liba totnumene weeme cewe cabu piiyepu weeme uuje iiwäreja puupu bine sengrääräjemumene, cane yepä iiwäreja dade tepänumene apu oogäräneji mene cama egä, MINE LUI BABO BINAME POTO CIDI ME CAMUGE UMLE ÄBITA, TEEME TÄÄPUME AI DADE. Yoo, weene lui ne yiiwäräjuye, yepä lui poto cidi me weene camu gemi umle äbita, cane page umle jiwenininine.<sup>24</sup> Acejiyame lui te gawecewe ne tewenuji iyeta teeme gwidape cama,

tabe peese nyene Yageyame cabucewe piiyepu gawecewe tääpume. Tabe lica yaanajuge uuje iiwäreja mete cabu, biname cina lui ne yaarangusi. <sup>25</sup> Cuta piiyepu tabe nuuja singi lica ge gwidape tääpume biname cina lui teeme ime ca yääcärusi, ingle tabe peese nyene lui te iyeta biname bine yääcäremuge teeme ireclota, piiyepu buuwemope, piiyepu iyeta nuuja gwidape. <sup>26</sup> Tabe yepä biname cabu ca iyeta tääpe maramara biname bine jewenemuji, siige eplidnärujisi iyeta gawe maramara cabu lenajame. Camuge biname bine wawena, tabe ngene ca egluji lui padare piiyepu lui gawe cabu teepi cirege lenaja. <sup>27</sup> Tabe apu jewenuji naace tääpume iyeta biname cina teebine ärngime piiyepu teeme bau me awetentame, teepi piba pama teebine päpäname. Yepä, toraca gyene egä Acejiyame cudecewe lica gyene mime yepäyepä cabu ca, <sup>28</sup> yepä biname te lipu jiicuji egä:

‘Mine teeme kokre cabu ninajininige, otnetnäjininago, piiyepu ireclota jepäninisi.’  
Yoo, poto weeme oogära biname cina ai poto cidi me jiicuji egä,

‘Cuta mine teeme bägrä gemi.’

<sup>29</sup> Yoo, ingle naace popi mine Acejiyame me bägrä gemi, mine miji lica gemi apu angi egä tabe lui gol, silba, coo kula ca wawenäneji uuje pana ge, lui bine biname cina yootonutemusi, cängena jäämyeremusi. <sup>30</sup> Yoo, lui padare cabu biname cina umle cäco Acejiyame poto cidi me, tabe piba teeme niiyaniya mule bine lica yaacnemuge, yepä page tabe iyeta biname bine iyeta poto ta jejananemige teeme niiya mule cabu ca atatrongärame,

<sup>31</sup> ingle naace popi tabe bimu ne ngene ca itu egluji, lui cabu tabe iyeta gawecewe biname bine cirege conocäco atrana. Tabe peei täüpume teeme biname ne ituge jaji, cuta peei biname ne itu eboclomäjuji iyeta biname bime täüpume, tabe liba teebine budre cabu ca erpinantuji.”

<sup>32</sup> Siige, teepi liba Paulo me mene itecijemige biname budre cabu ca arpinenta poto cidi me, poto cina teebine jitutanisi, yepä poto cina teebine jejisi egä, “Cine singi cääri ätecijame ai poto cidi me nuuja padare cabu.” <sup>33</sup> Siige, puma cita ca Paulo peei abasecretna ne sebmalige. <sup>34</sup> Poto biname cina ten cama abasutanininisi, teeme mene jitrungisi. Teeme yepä, ngii Diyonisiyus, lui peei modamoda biname bime abasecretna cabu ca, cuta nuuja lui magebi gwene, teeme ngii Damari, cuta piti nemi cerämu poto biname.

## 18

### *Korinito Babo Cewe je*

<sup>1</sup> Peei ingwe ca Paulo Atena cewe ne sebmalige, ädige Korinito babo cewe me. <sup>2</sup> Puga tabe jepänige yepä Israela biname ngii Akwila, lui me ärngi gawe Pontus ge. Tabe Rooma babo cewe Italiya gawe cabu ca piba taatu tädige coga ngii Prisila cama, ingle Rooma Mopeyame Klaudiyus mene itu jiicepi iyeta Israela biname cina Rooma babo cewe ne gomalame. Yoo, Paulo teebibine äädärige, <sup>3</sup> siige ten cama enajanige, kaakesea ten cama jewenemige, ingle naace popi Paulo teeme rarekaake jääpänuge yepä kaakesea cabu ca Akwila naabi Prisila lui kaakesea jaawenäsi. Teepi kokre cäbletääpe bine yaaterutäjemusi watawata mete

wawena tääpume. <sup>4</sup> Iyeta Sabade bimu gaabegabe, Paulo ädige Israela biname bime abasecretna mete me, puga mene iciseräjemige. Tabé singi ge Israela piiyepu Griik biname cina teeme mene acatamé.

<sup>5</sup> Siila naabi Timoti Makedoniya gawe cabu ca liba taaclige, tatyaramtäsi Korinito cewe me, Paulo pui rarekaake tääpume kaakesea ne sebmalige, piba iyeta padare Miiji Mene jaajananemuge, Israela biname bine cängena yaabiberäjemuge egä Yeesu peese nyene Keriso, teepi lui ne jewagrijenisi otname teebibine niiya cabu ca äsecrerame. <sup>6</sup> Israela biname cina liba teeme mene lica jecatisi piiyepu teebine jelwisi, tabe teeme cäbletääpe bine jiglubäjemige, piba teebibine kokre mene ca jejemige egä, “Weene Acejiyame bau ca liba cudecewe läbitininuye, peei lui weeme niiya birige. Weene liba cäme mene tääpume ätecija cäco läbitaninuye, peei lui cäme ingle lica ge! Page cabu ca cane ädenine nuuja gawe biname bime bau me.” <sup>7</sup> Siige, tabe pui abasecretna mete ne ebmalige, ädige nuuja mete cabu lenajame, lui peei abasecretna mete wajwa jage. Pui mete yageyame, ngii Titiyu-Yuustus, tabe Israela biname lica ge, yepä nuuja gawe biname, lui te Acejiyame ne yaawejanuge. <sup>8</sup> Yepä Israela biname ngii Krispo, lui pui abasecretna mete mope biname ge, tabe piiyepu iyeta teeme ingle biname cina Yageyame ne jitprungisi. Cuta piiyepu bucourage nuuja Korinito cewe biname lui cina Miiji Mene itecijemige puga, teepi jitprungisi, piba niiye ca äciseja ne ecatisi Yeesu me ngii cabu.

<sup>9</sup> Nuuja ciiye Yageyame te Paulo ne wama ca je-

jige egä, "Wälu gone läbitute, yepä mene jiicemepi! Gloose te gone noomluge, <sup>10</sup> ingle cane maane cama gäne. Nuuja biname te äblicäco ge mee-bine niiya wawena, ingle naace gyene bucurage biname ai cewe cabu lui käme biname gemi." <sup>11</sup> Peei mene name pi Paulo puga enajige yepä kämäge cebo cama, biname bine yaabiberäjemuge Acejiyame me mene poto cidi me.

<sup>12</sup> Rooma Babo Mope Biname te liba biname ngii Galiyo ne mopeyame me jewanige Griik biname bime Akaya gawe täüpume, Israela biname cina piba Paulo ne gigri joomlisi, ecanisi teebine atrana puupu me. <sup>13</sup> Teepi jejisi egä, "Ai biname singi biname bine atatrongärame Acejiyame ne awejena mara mule ca, lui mule te Rooma cotre ne jaatropangtuge."

<sup>14</sup> Paulo mene me liga äbitige, Mopeyame Galiyo te piba Israela biname bine jejemige egä, "Ai biname te liga babo niiya mule ne jaaweneji, coo Rooma biname bime cotre liga jaatropangteji, cane piba weene Israela biname bine cängena jitecijinejine, <sup>15</sup> yepä ai gwidape lui weeme papa abaja mene gemi, weeme mule, weeme ngii, pi-iyepu weeme cotre poto cidi me. Peei name pi weene weemämu jewaneye atraname. Cane singi lica gäne atraname pepu mule poto cidi me!"

<sup>16</sup> Tabé puma cita ca teebibine siiyeblengemige atrana puupu cabu ca. <sup>17</sup> Siige, teepi iyeta piba Israela biname ngii Sostene ne joomlisi. Tabé lui kirece mopeyame ge pui Israela biname bime abasecretna mete täüpume. Teepi teebine eglisi atrana puupu opo gaabe je, yepä Mopeyame Galiyo tabé nuuja singi lica ge teebibine iibaname.

*Paulo Babo Antiyoka Cewe me Acnenutige*

<sup>18</sup> Peei ingwe poto ca Paulo Korinito cewe cabu enajanige bucurage bimu ätrunga biname cama, teebibine piba sebmalemige, Akwila naabi Prisila cama ädige poo gaabe Suriya gawe me. Puga Kenekrea malu cewe je, teepi liba camuge babo poo cabu me acetnera, Paulo teeme edingäli jeclanemige, ingle naace popi Israela biname bime mule apu ge egä biname te padare yaacituge, lui cabu tabe mage ngene jotwananuge Acejiyame poto cidi me. Tabe edingäli lica äläcnuta ngälu peei padare te lapiruge, siige piba edingäli jaaclanimuge piiyepu gwidape Acejiyame ne yiwiäräjuge.

<sup>19</sup> Yoo siige, teepi liba atyarige Epeso cewe me, tabe Israela biname bime abasecretna mete me abacitige, mene äciseräjige Israela biname cama.

<sup>20</sup> Biname cina teebine tesoglicisi tabe leca padare ten cama lenajame, yepä tabe singi lica ge. <sup>21</sup> Pätä tabe liba sebmalemige, jejemige teebibine egä, “Liba Acejiyame singi gyene, cane cire tacnepene weeme bau me.” Siige, tabe Akwila naabi Prisila puga taabmalige, poo gaabe Epeso cewe ca abyemäridge.

<sup>22</sup> Tabe liba atyaramtige Kesarea malu cewe me, tabe doro ta ädige Yerusalem me, ätrunga biname bine jewablemige, piba ädige Antiyoka cewe me. <sup>23</sup> Tabe poto bimu enajige Antiyoka cewe je, piba abyemäridge, otnige Galatiya piiyepu Pirugiya gawe cabu ta, puga iyeta ätrunga biname bine ngene atwana kokre jewanemige.

*Apolo te Ädige Epeso piiyepu Korinito Cewe me*

**24** Yepä Israela biname, teeme ngii Apolo, lui aplimpläneji ge Aleksandriya cewe je Aikupito gawe cabu, tabe tädige Epeso cewe me. Tabé lui mopemuli biname ge piiyepu babo umle ge Acejiyame me Oogäräneji Mene poto cidi me. **25** Tabé ituge abiberäja mime Yageyame me gaabe poto cidi me. Tabé mene jiicuge drämä cama, piiyepu biname bine conocäco ebiberäjemige Yeesu poto cidi me. Yepä gwidape, tabe umle Yoane me niiye ca äciseja mule taatu; tabe nuuja umle lica ge egä biname cina äciseja yaacatusi Yeesu Keriso me ngii cabu. **26** Yoo, Apolo gije abacitige mene wälu cäco iicemame Israela biname bime abasecretna mete cabu Epeso je. Prisila naabi Akwila liba äätecijige teeme mene, teepi piba teebine teeme mete me ecanäsi, teebine cängena pajecurage ebiberäjäsi Acejiyame me gaabe poto cidi me. **27** Yoo, Apolo liba singi ge Griik biname bime Akaya gawe cabu otnime, Epeso ätrunga biname cina teebine itityärisi. Teepi teeme Griik ätrunga binamewale bime bau me mene yoogärisi egä teepi Apolo ne awacletnäjame. Siige, Apolo liba Griik biname bime gawe cabu atyaramtige, tabe babo ätityeräja biname ge teeme täüpume, lui cina Acejiyame me owecu piiyepu ätityera ca Yeesu ne ituge ätrunga. **28** Tabé kokre mene ca Israela biname bine epremalemige sobe cabu. Tabé eboclomtige Yeesu ne Oogäräneji Mene cabu ca egä tabe peese nyene Keriso, lui ne Israela biname cina jaawagrijusi teebibine niiya cabu ca äsecrerame.

<sup>1</sup> Apolo liba Korinito cewe cabu enajige, Paulo doro gaabe ädige Pirugiya probins cabu ta, ngälu atyaramtige Epeso cewe cabu me. Tabepuga jepänemige poto ätrunga biname bine,  
<sup>2</sup> itemlemige egä, “Nää, Aceji Seemo weeme bau itu labacitanepi, weene lui padare cabu niinäce liba jäätungepeye?”

Teipi jejisi egä, “Cine nuuja umle lica gemi Aceji Seemo poto cidi me.”

<sup>3</sup> Puma cita ca Paulo teebibine itemlemige egä, “Weene ngena ätrunga ne piba yaacatepeye, weene liba niiye ca äciseja ne yaacatepeye?”

Teipi jejisi egä, “Pui niiye ca äciseja biname Yoane, cine teeme mene yaacatepesi.”

<sup>4</sup> Paulo piba jejemige egä, “Yoane me äciseja eei bime tääpu myene, lui cina teeme niiya mule cabu ca latatrongärininusí Acejiyame bau me. Tabé Israela biname bine jaajemuge ätrungame teeme bau me lui te teeme ingwe ca tädenige. Peei lui Yeesu sine.”

<sup>5</sup> Epeso ätrunga biname cina liba pee mene itecijemige, teipi niiye ca äciseja ne ecatisi Yageyame Yeesu me ngii cabu. <sup>6</sup> Siige, Paulo liba ime aacitanige teeme papa cabu, piba Aceji Seemo te abacitanige teeme yepäyepä trupa cabu. Teipi teeme umle cäco mene ca jiicemisi, cuta piiyepu Acejiyame me tagepogogo mene jiicemisi. <sup>7</sup> Teipi iyeta pama twelb rooriye ge.

<sup>8</sup> Nesae mabye ngalebora Paulo Israela biname bime abasecre-tna mete me labacitanuge, mene wälu cäco jiicemuge biname cama, piiyepu teebibine mene yääciseräjemuge, ingle tabe singi teebibine umle wawename Acejiyame te lipu biname

bine yaawademuge. <sup>9</sup> Yepä, poto cina ätecija cäco ge. Teepi singi lica ge ätrungame, piiyepu niiya mene jiicemusi abasecretna cabu je mime Yageyame me gaabe poto cidi me. Paulo pee name pi teebibine ebmalemige, siige ätrunga biname bine ewademige ten cama. Puma cita ca iyeta bimu gaabegabe tabe läduge biname ngii Turanus me abiberäja mete cabu, puga biname cama mene labaitnuge. <sup>10</sup> Tabe pee ne jaawenuge neeneni kämäge cama. Peei name pi iyeta biname lui cina yaacrajuge Asiya probins ngalebora, Israela biname piiyepu nuuja gawe cabu ca lui biname iyeta, teepi yäätecijemuge mene Yageyame poto cidi me.

### *Sekewa me Imäbägrä*

<sup>11</sup> Acejiyame te mararage ciitaca mule bine jaawenemuge Paulo me ime ca. <sup>12</sup> Nuuja taje biname cina Paulo me cäbletääpe pläsu bine yaawademusi, lui bine ituge äitäya teeme mope cabu coo ibi cabu, siige pita biname bime cabu me yaarpetnemusi. Piba teeme pita cina teeme bau ca läyeblenguge, piiyepu niiya cable cina teeme trupa cabu ca läsuge. <sup>13</sup> Yoo, poto Israela biname lui cina waatne-tnäjinusi niiyaniya cable bine äyecrejame biname bime trupa cabu ca, teepi läbitininusi Yageyame Yeesu me ngii jajime pee mule wawename. Teepi jejemisi niiya cable bine egä, “Cine weebibine jijenininago Yeesu me ngii cabu, lui ne Paulo jeitnäjenige, weene äyeblingineye!” <sup>14</sup> Yoo, puga ge seben naniganewale lui cina pee mule ne jaawenusi. Teepi yepä Israela iiwäreja babo biname Sekewa me bägrä gemi.

**15** Teepi liba niiya cable cama biname ne Yeesu me ngii cabu pepu mene jejisi, tabe niiya cable te teebibine jejemige egä, “Cane umle gäne Yeesu, piiyepu cane umle gäne Paulo poto cidi me, yepä weene baa laati bemi?”

**16** Lui biname niiya cable cama ge, tabe giri-gale cama ädige pui seben naniganewale cabu me, teebibine iyecräjemige. Teepi iyeta teeme mete cabu ca uucratnige dupe cama, teeme cäbletääpe mage äsupleceji ge. **17** Israela biname piiyepu Griik biname Epeso cewe ngalebora, teepi liba itecijemige peeи poto cidi me, iyeta mage wälu ge, siige Yageyame Yeesu me ngii te babo äbitige teeme tääpume. **18** Bucurage ätrunga biname cina totninisi Paulo naabibime bau me, sobe cabu teepi teeme piiseba mule aitnäjinisi. **19** Bucurage lui cina piiseba tääpume labiberäjininus teepi teeme oogäräneji mene piiseba mule poto cidi me se-wademisi, sobe cabu juubuderäjemisi. Teepi elenglecäjemisi pui peba bime daremu iyeta, ngälu fiftytausen silba rarekaake bine joomlemisi. **20** Pepu kokre mule ca Yageyame me mene te babo äbitige iyeta poto ta, cuta piiyepu cerämu kokre me äbitige.

### *Claabeclabe Biname Epeso je*

**21** Ai mule cina liba täbitimesi, Paulo ingwe ca piba ngene jotwanige Griik biname bime gawe Makedoniya piiyepu Akaya cabu me otnime, puma cita ca piba Yerusalem me otni. Tabe jii-icige egä, “Peeи padare ingwe ca cane miji Rooma babo cewe ne päpäname.” **22** Tabe jäätylepige Makedoniya gawe me neenen teeme ätityera biname

Timoti Erasto naabibine, yepä tabe cerämu enajige Asiya probins cabu.

<sup>23</sup> Yoo, puga ge Epeso cewe cabu pui padare mäpurage mule Yageyame me gaabe poto cidi me.

<sup>24</sup> Yepä biname puga ge teeme ngii Demetriyus lui te silba ca ceegecege gwidape bine jaawenemuge. Tabé silba iiwäreja mete ceegecege bine jaawenemuge teeme uuje magebi täüpume, ngii Artemi. Demetriyus piiyepu teeme kaakesea biname cina bucourage rarekaake jäätänemusi peeai mete ceegecege wawena cabu ca. <sup>25</sup> Yoo, Demetriyus tesoglecemige teeme kaakesea biname bine piiyepu poto nuuja biname lui cina yepä pana kaakesea jaawenusi, teebibine jejemige egä, “Binamewale, weene umle gemi egä mine ai kaakesea name pi dogweyame gemi. <sup>26</sup> Page weene jepäneniye, jitecijeniye ai biname Paulo te ngena jewenenige. Tabé jiicenemige egä, ‘Ime ca wawenäneji uuje lui toraca lica gemi.’ Bucourage biname cina peeai mene bii jitprungisi mime cewe Epeso je piiyepu Asiya probins iyeta poto ta. <sup>27</sup> Pama mime kaakesea te niiya ngii pagege päpäna Paulo me mene name pi, cuta piiyepu pama niiya pa tädepi mime uuje magebi Artemi bau me. Biname cina pama ngene pa jäätimalemepi teeme iiwäreja mete poto cidi me. Puma cita ca Artemi, lui täüpume iyeta Asiya biname piiyepu biname cina iyeta gawecewe cabu ta yiiwäräjusi, teeme babo ngii pama pa lapesarepi.”

<sup>28</sup> Biname cina liba Demetriyus me mene itecijemige, teepi claabe me äbitininisi, babo tage ca jiicemisi egä, “Baborage gwene mime Epeso biname bime uuje magebi Artemi!” <sup>29</sup> Biname

cina teeme guugla itecijemige Epeso cewe iyeta poto ta. Tomi cabu lui biname cina neeneni Makedoniya biname bine claabe cama joomli-si, teeme ngii Gayus naabi Aristakus, lui cina Paulo cama totnumäsi. Teepi teebibine wata aacanisi Epeso cewe babo abasecretna puupu me. <sup>30</sup> Paulo singi otnime abasecretna biname bime opo gaabe me, yepä ätrunga biname cina teebine jiibisi. <sup>31</sup> Cuta piiyepu poto Epeso cewe modamoda ngii biname, lui cina singi gemi Paulo täüpume, teepi mene jittepisi teeme bau me egä, “Gone lädute peei claabe biname bime opo gaabe!” <sup>32</sup> Peei padare biname cina abasecretna puupu cabu mage guugla ecisi, yepä bucurage pui biname cina nuuja umle lica gemi teepi ngena täüpume babasecretnige. Poto singi gemi yepä gwidape täüpume; nuuja cina singi nuuja gwidape täüpume. <sup>33</sup> Poto biname cina apu jengemige egä yepä Israela biname ngii Aleksanda name pi peei tomi bääbitininisi, ingle naace gyene Israela biname cina teebine jewenisi niinäce gaabe otnime. Puma cita ca Aleksanda te singi gyene biname bine ime ca bojä wawename. Tabé ligi gije abacitige mene me egä peei guugla lui teeme ingle lica ge, <sup>34</sup> biname cina teebine opo ewatnisi egä tabe lui Israela biname ge, piba lecaleca padare cabu teepi gigri jiicanisi babo tage ca egä, “Baborage gwene mime Epeso cewe biname bime uuje magebi Artemi!” Teepi peei yepä mene jiicanisi mage leca padare ngalebora.

<sup>35</sup> Ingwe ca yepä cewe mope biname te pui biname tomi ne bojä jewenige. Tabé biname bine walya mene jejemige egä, “Epeso ceweyame, iyeta biname umle gemi egä Epeso lui ire atwi

cewe gyene Artemi me iiwäreja mete tääpume piyepu pui cudege kula tääpume, lui te sitramuji dume cabu ca. <sup>36</sup> Nuuja biname te äblicäco aina ai poto cidi me. Pipu pi weene miji bojä agi, cängena ngene atwana cama inajipi. <sup>37</sup> Weene ai neeneni biname bine aima bii taacaniye, yepä teepi nuuja gwidape lica ero ca isatäsi iiwäreja mete cabu ca, piyepu lica niiya mene jiicemäsi mime uuje magebi poto cidi me. <sup>38</sup> Demetrius piyepu ten cama lui kaakesea biname cina liba singi gemi mene aitname nuuja biname poto cidi me, atrana bimu piti nempiyepu cuta ablaweja biname. Teepi miji puma teemeteme pa latranipesi. <sup>39</sup> Yepä, weene liba cerämu nuuja gwidape tääpume singi, weene miji cewe ngii biname bime abasecretna cabu pee iicana. <sup>40</sup> Page ai guugla mule te lui babitige, mäpu gyene mime tääpume, ingle Rooma biname cina pama mibibine pa niyitnipesi ai mule poto cidi me. Mime nuuja ingle lica gyene ai guugla tääpume. Mine äblicäco teebibine miji ingle ceera ai mule poto cidi me.” <sup>41</sup> Yoo, teeme mene liba siige, tabe biname bine jityepäjemige.

## 20

*Paulo Ädige Makedoniya piyepu Akaya Gawe cabu me*

<sup>1</sup> Siige, Epeso cewe biname liba bojä icrajige, Paulo piba ätrunga biname bine tebasecretne-mige, mene jejemige teeme ngene atwana kokre wawename, siige yewo jewenemige. Puma cita ca tabe sebmalemige teebibine, poo gaabe ädige

Makedoniya gawe me. <sup>2</sup> Tabé pui gawe cabu ta otnige, bucurage mene jejajanemige ätrunga biname bine kokre ceerame. Puma ciتا ca tabé ädige Akaya gawe cabu me, <sup>3</sup> puga enajige nesae mabye cama. Tabé liga abyemerame äbitige poo gaabe Suriya gawe cabu otnime, piba umle äbitige egä poto Israela biname cina mene jitranenisi teebine gaabe cabu aglime, pee name pi tabe tacnenutige Makedoniya gawe cabu me, piba puma cita ca otni Suriya me. <sup>4</sup> Yoo, ätrunga biname ngii Sopata, lui Purus me bägrä ge Berea cewe cabu ca, tabe Paulo ne jewecitige. Cuta puga ge ten cama Aristakus naabi Sekundu, lui Tesaloniaka cewe biname, piiyepu Gayus lui Derbeyame, piiyepu Tukikus naabi Tropimus, lui Asiya probins cabu ca, cuta piiyepu Timoti. <sup>5</sup> Teepi iyeta ni-inäce eclige, cibibine niwagrijinisi Trooasi cewe je. <sup>6</sup> Israela biname bime Uutneca cäco Buludu Trii kaake poto ca, cine poo gaabe naclige Pilipi cewe cabu ca. Siige, faib bimu ingwe ca cine ten cama abasecretninago Trooasi cewe cabu. Cine puga Trooasi je seben bimu ninajininige.

*Paulo Trooasi Ätrunga Biname bine  
Ceräcerägääbu Edäremige*

<sup>7</sup> Sabade mämleteca me cine tabasecretninago deedei matikolä gigri äbitame. Paulo biname bine mene jejemige ngälu ciiye duusa, ingle naace popi nuuja kroke tabe singi teebibine abmaläcemame. <sup>8</sup> Cine lui caburage puupu cabu tabasecretninago, bucurage lampa cina puma ayenininisi. <sup>9</sup> Yepä mamye rooriye, teeme ngii Yuutikus adnatäneji enajige mete traapi uli cabu. Paulo liba mene

camu jiicemige, Yuutikus ute me jicriranige, ngälu tabe toraca ute te jwenige, siige pui caburage puupu cabu ca puma cita ca sitramige gawe me. Biname cina liba teebine ecatisi, piba jepänisi egä tabe budre ge. <sup>10</sup> Yepä, Paulo äinige gawe me, budre biname papa cabu ätwitige, teebine jejecletnäjige. Tabé biname bine jejemige egä, "Ngenecu mäpu gone. Tabé ireclota gyene!" <sup>11</sup> Siige, Paulo piba jegelige, pui caburage puupu cabu me cääri abacitige, puma buluduun ne itrecige, biname cama erwäjige. Tabé piba cääri mene abaitnige lecarage padare cabu ngälu bimu te tacitige, piba abyemärigie. <sup>12</sup> Teepi jewecitisi pui mamye rooriye ne ireclota cama teeme mete me, siige babo ngenecu miji äbitininisi.

### *Paulo Trooasi Cewe ca Ädige Miletu Cewe me*

<sup>13</sup> Cine babo poo cabu me niinäce acetnärinago, abyemärinago Asos cewe me, Paulo luma singi ge poo cabu me acenutame. Tabé cibibine itu nijipi pepu gaabe wawename, ingle tabe singi ge doro ta otnime Asos cewe me. <sup>14</sup> Tabé liba cibibine opopa niwenininige Asos cewe je, cine teebine ecenutisi, piba naclige Mitulene curä me. <sup>15</sup> Cine puma cita ca naclige, nuuja bimu Kiyosa curä mameta me atyarinago, cuta nuuja bimu Samo curä me atyarinago, piba cuta nuuja bimu cabu atyarinago Miletu malu cewe me. <sup>16</sup> Paulo mene itu titranumi Epeso cewe ne äsuplengtame, ingle naace popi tabe singi lica padare te apirame Asiya probins ngalebora, yepä tabe singi ge Yerusalem ne wata oomlaname Pentikos bimu tääpume, liba ibibi ge poo me uuwama.

*Paulo Yewo Mene Jejemige Epeso Ätrunga Ingle  
Mope Biname bine*

<sup>17</sup> Miletu cewe ca Paulo mene jityepige Epeso me, ätrunga ingle mope biname bine jajime ten cama opopa ayime Miletu je. <sup>18</sup> Teepi liba atyarige, tabe teebibine jejemige egä, "Yoo, weene umle gemi egä iyeta padare cane liba weene cama itu nanajepi, pui niinäce bimu cabu ca cane itu latyaramtepene Asiya probins cabu, ngälu cane probins ne saabmalepene, <sup>19</sup> cämämu awepyeräja cäco piiyepu ele cama, cane Yageyame me kaakesea jaawenune mäpu padare cabu, lui bine jäätämäne Israela biname bime cabu ca, teeme ämugetna mule name pi. <sup>20</sup> Weene umle gemi egä cane durau äbita lica weebibine mene jajanename lui weeme miji täüpume birige, cane liba mene jijananipene piiyepu weebibine ibiberäjipene biname sobe cabu cuta piiyepu weeme maramara mete cabu ta. <sup>21</sup> Israela biname piiyepu nuuja gawe biname bine cane kokre cama bäärmi jaagednemepene teeme niiya mule cabu ca Acejiyame bau me atatrongärame piiyepu mime Yageyame Yeesu ne ätrungame. <sup>22</sup> Siige, page cane Yerusalem me ädenine, ingle Aceji Seemo nätyepenige cebine. Cane umle lica ngena pa läbitepi puma käme täüpume. <sup>23</sup> Cane pui taatu umle gäne egä iyeta cewe cabu ta Aceji Seemo cebine itu najananumi egä krokeciyiye mete piiyepu poto mäpu cina puma nawagrijenisi. <sup>24</sup> Yepä, cane ngene jotwanenine egä käme ireclota lui babo gwidape lica gyene, cane liba taatu epirenine pui kaakesea ne Yageyame Yeesu lui itu nääruji wawename. Peei kaakesea lui Miji Mene

iicaname Acejiyame me owecu piiyepu singi poto cidi me.

<sup>25</sup> Yoo, cane iyeta weeme bau waatnetnäjepene, biname bine mene jaajananemepene Acejiyame te lipu biname bine yaawademuge. Siige, page cane umle gäne egä weeme nuuja te lica cääri pa näpänepi cebine. <sup>26</sup> Cane pee name pi page ai bimu cabu jijenininine weebibine egä weeme yepä te Acejiyame bau ca liba lapesaruge, pee lui cäme ingle lica ge, <sup>27</sup> ingle naace popi cane lica durau läbitune weebibine mene jajanename, yepä cängena jijinune iyeta Acejiyame lui singi gyene wawename. <sup>28</sup> Weene cängena ire atwip-eye weeme ireclota poto cidi me, cuta piiyepu pui biname bime ireclota cängena ire jetwemep-eye Aceji Seemo te lui bine weeme bau me itu yaawademepi weene ire atwime. Yoo, maamoi ire atwi biname pana, weene ätrunga ingle biname bine cängena ewademepeye, ingle naace popi Acejiyame teebibine itu jaaletnemepi teeme bägrä Yeesu me uudi piiyepu budre ca. <sup>29</sup> Cane umle gäne egä cäme otni ingwe gaabe ca, niiyaniya biname cina weeme bau me pa twaatnipesi, girigale drego pana teipi niiya pa jaawenemepesi poto biname bine weeme tomi cabu. <sup>30</sup> Yoo, padare cire tädepi, poto biname cina weeme tomi cabu ca piba walya mene cire jiicemepesi poto ätrunga biname bine teeme bau me äyeble-ngame. <sup>31</sup> Peei name pi ire! Cuta piiyepu ngene napecnepeye cane lipu ciiye bimu ele mäcu cama iyeta weebibine ibiberäjipene nesae kämäge cama.

<sup>32</sup> Yoo, page cane weebibine icranininine Acejiyame me ime cabu. Pisi nyene weene cama Miji

Mene Acejiyame me owecu piiyepu singi poto cidi me, lui mene ibibi gyene weeme ngene at-wana kokre wawename piiyepu weebibine teeme miji cabu acraname. Peei miji lui pisi nyene iyeta Acejiyame me biname bime tääpume.<sup>33</sup> Yoo, weene miji cäme mule ingwe äcwime. Cane singi lica ituge äbita nuuja biname bime silba coo gol rarekaake, piiyepu cäbletääpe tääpume.<sup>34</sup> Weene weemämu umle gemi cane lipu rarekaake kaakesea cäme ime ca itu jaawenepene iyeta gwidape päpäname, cane piiyepu lui biname cane cama cime tääpume.<sup>35</sup> Iyeta cäme mule ca cane weebibine ibiberäjininune egä lui biname pisi nyene kokre cäco, mine miji pepu kokre kaakesea cama teebine ätityerame. Mine miji ngene jwaatwananinago lui mene Yageyame Yeesu teemämu itu jejuji egä, ‘Lui biname te gwidape yääcäruge, teeme gege baborage gyene pee me gege cabu ca lui te saacatuge.’”

<sup>36</sup> Paulo me mene siige liba, teepi iyeta kokorare ipednemisi, Acejiyame bau me irecu ätumutinisi.  
<sup>37</sup> Teepi iyeta ele engenetne-mige teebine liba yewo tääpume jejecletnäjisi, jetecnisi.<sup>38</sup> Teepi mage owecu jewenisi, ingle tabe bii jejemige egä, “Weene ingwe ca opo lica pa näpänepeye.” Pipu pi teepi Paulo ne englecitisi babo poo cabu me.

## 21

### *Paulo Yerusalem me Ädige*

<sup>1</sup> Cine ätrunga biname bine yewo jewenemisi Miletu je, piba teebibine ebmalemisi. Cine babo poo gaabe malu ne conocäco yuurisi, Kosa curä

je atyarinago. Nuuja bimu cine Roos curä ne joomlisi. Puma cita ca malu cewe Patara me naclige. <sup>2</sup> Puga cine jepänisi yepä babo poo ne lui te Poenikiya gawe me ädenige. Cine pee i babo poo cabu me acetnärinago, malu cabu naclige. <sup>3</sup> Poto bimu ingwe ca cine Kupro curä ne jepänisi, yepä poo te malu gaabe ta ädige Suriya gawe me. Turo malu cewe je cine ärpetañjinago, pui padare tääpume poo biname cina liba gwidape bine irpetnäjemisi. <sup>4</sup> Cine poto ätrunga biname puga jepänemisi, seben bimu ten cama ninajininige poo trämä. Aceji Seemo me umle cabu teipi Paulo ne jejisi egä, “Gone lädute Yerusalem me!” <sup>5</sup> Yepä, cime padare ten cama liba apirige, piba cine gaabe cabu abyemärinago. Iyeta ätrunga biname teeme coga bägrä cina cine cama äsige cewe cabu ca malu me. Cine iyeta kokorare koriyo cabu ipednemisi, irecu ätumutinago. <sup>6</sup> Puma cita ca cine yewo äbitinago, siige babo poo cabu cääri acetnärinago, cuta teipi äcnärige cewe me.

<sup>7</sup> Cine Turo ca poo gaabe naclige Petolemaisa cewe me. Puga cine ätrunga biname bine se bore jewenemisi, piiyepu yepä bimu ten cama ninajininige. <sup>8</sup> Nuuja bimu cine teebibine seb malemisi, Kesarea cewe me atyarinago. Puga ge yepä biname ngii Pilipo lui te Miiji Mene jiic muge. Cine teeme bau naclige teeme mete cabu lenajame. Tabi lui yepä ge pui seben\* cabu ca Yerusalem ätrunga biname lui bine jejäcremu jisi ätyepäneji biname bine ätityerame. <sup>9</sup> Teeme puga ge fooa ngulebägrä lui cina Acejiyame me tage-

---

\* **21:8:** pui seben: Pui seben biname bime ngii tääpume ire Apostolo 6:1-6.

pogogo mene jiicemusi. <sup>10</sup> Cine puga liba poto bimu cama ninajininige, piba yepä mename biname te tatyaramtige Yuudea gawe cabu ca, teeme ngii Agabu. <sup>11</sup> Tabe cime bau me tädige, Paulo me baagi ecatige, peei ca teeme ernge ime ätäyige, piba nijinige egä, “Aceji Seemo te apu jiicenige: Ai baagi yageyame ne Israela biname cina Yerusalema je apu pana pa jäätäyepesi, siige pa yaacitepesi nuuja gawe biname bime ime cabu.” <sup>12</sup> Ai mene liba nitecijininige, cine piiyepu puga lui biname, cine iyeta Paulo ne ele cama jehjanisi egä, “Gone otni Yerusalema me!” <sup>13</sup> Yepä, tabe mene niwecnistinige egä, “Weene ngena jewenenkiye? Ele ingeni-tninige, cebine ngenecu mäpu me naweniye! Cane amacetnäjäneji gäne lica ätäya taatu me, yepä cuta budre äbitame Yerusalema je Yageyame Yeesu tääpume.”

<sup>14</sup> Cine liba äblicäco ge teebine mara ngene atwanena ceera, piba mene ebmalisi, jiicisi egä, “Mime Yageyame me singi pa läbitepi.”

<sup>15</sup> Cine poto bimu ninajininige Kesarea cewe je, piba cime gwidape emacetnäjemisi doro ta otni Yerusalema me, siige abyemärinago. <sup>16</sup> Poto Kesarea ätrunga biname cina cine cama eclige, cibibile niwadininisi mete me, cine luma pa ninajipi. Pui mete yageyame ngii Manasona, tabe Kupro curä cabu ca ge, lecarage padare ätrunga cama yaanajepi.

### *Paulo te Ätrunga Mope Biname Yakobu ne Edäridge*

<sup>17</sup> Cine liba atyarinago Yerusalema me, ätrunga biname cina cibibile niwacletnäjininisi gege cama. <sup>18</sup> Nuuja bimu Paulo cibibile niwecitinige,

Yakobu ne edärisi. Iyeta modamoda ätrunga biname cine cama puga ge. <sup>19</sup> Paulo teebibine sebore jewanemige, iyeta cängena jeitnäjemige Acejiyame te ngena bine ituge waweneca teeme Paulo me kaakesea cabu ca nuuja gawe biname bime täüpume. <sup>20</sup> Teeme mene liba itecijemige, teepi iyeta cina Acejiyame ne ewepyeräjisi, puma cita ca Paulo ne jejisi egä, "Cime biname, maane jepänenite lija tausen Israela biname cina Yeesu ne ituge ätrunga, piiyepu teepi iyeta mime Israela biname bime cotre bine cängena jaawenemusi. <sup>21</sup> Teepi idre ituge äteciajä määme poto cidi me egä, iyeta Israela biname lui cina yaacrajuge nuuja biname bime gawe maramara cabu, maane teebibine yaabiberäjimute Moose me cotre mule gomalame, piiyepu jaajanemute teeme imäbägrä bime matikolä tääpe lica iirputame Acejiyame me cewecu acatame, coo piiyepu teebibine jaajanemute Israela biname bime mule lica wawename. <sup>22</sup> Yoo, teepi pama pa yäätecijemepi egä maane age säte cewe je. Mine ngena ne pa jaawenepesi piba? <sup>23</sup> Yoo, maane miji apu wawena cine lipu naajenisi! Pitti nämi cine cama fooa biname, lui cina Acejiyame ne mene ituge jaji mime Israela biname bime mule ibibi, egä poto mabye ngalebora teepi singi gwidape wawena Acejiyame täüpume. Siige pui padare cabu teepi edingäli äswi cäco yaacrajuge. <sup>24</sup> Maane ten cama ädepi, gigri Acejiyame ne cibu ca yiwäräjepeye teepi teeme mene ibi wawename, siige kälyä äbitame. Maane te peei cibu bine teeme täüpume jeletnemepi! Siige, iiwäreja ingwe gaabe ca teepi piba miji gämi teeme edingäli äswime. Yoo, maane

liba apu jewenenite, piba iyeta biname cina pa jäätänepesi egä toraca lica gyene teepi lui mene ituge ätecija määme poto cidi me, yepä teepi umle pa läbitipesi egä maane Moose me Cotre Mene cabu naanajuge. <sup>25</sup> Yepä, lui biname Israela cabu ca lica gemi, lui cina Yeesu ne jäätprungusi, cine teeme poto cidi me ituge atrana, piiyepu mene teeme bau me itu jäätäyepepesi teeme umle me egä: Gone deedei yäärwäjemu ye lui cude ge, ingle uuje tääpume iiwäräjeji gemi, piiyepu gone cibu yäärnägäjemuye lui bime mäju cabu uudi yaanajuge, piiyepu uudi gone yääänäjuye, cuta piiyepu sargi mule gone jaawenimuye. Siige.”

<sup>26</sup> Yoo, puma cita ca nuuja bimu Paulo pui fooa biname bine ewademige, ten cama Acejiyame ne yiwiäräjisi kälyä äbitame. Peei liba siige, Paulo piba Acejiyame me iiwäreja mete gomerage me ädige. Tabu puga mene jejemige lui bimu cabu pui fooa biname bime kälyä wawena padare pagege apira, piiyepu jejemige egä tabe pui bimu cabu pagege cibu bine aletna teeme yepäyepä iiwäreja mule bine apirame.

### *Teepi Paulo ne Joomlisi Iiwäreja Mete cabu*

<sup>27</sup> Seben bimu ingwe ca teeme kälyä äbita padare te liba mameta ge apira, poto Israela biname lui Asiya Probins cabu ca ge, teepi Paulo ne jepänisi Acejiyame me iiwäreja mete cabu je. Teepi biname bine giri jicranemisi, siige Paulo ne joomlisi, <sup>28</sup> babo tage ca jiicemisi egä, “Israela biname, nitityärineye! Agesa biname lui te iyeta poto ta waatnetnäjuge, biname bine yaabiberäjemuge Israela biname bine äciseräjame, piiyepu Moose me

cotre bine, cuta piiyepu ai iiwäreja mete ne. Cuta piiyepu page tabe poto Griik biname bine iiwäreja mete caale bora me sewademige, siige pepu pi niiya bii jwenige ai cudege puupu ne!”<sup>29</sup> Yoo, teepi apu jiicisi, ingle naace popi teepi yepä Epeso cewe biname ne, ngii Tropimus, Paulo cama jepänisi Yerusalem cewe ngalebora, piiyepu teepi apu jengemige egä Paulo teebine ecanige iiwäreja mete caale bora me.<sup>30</sup> Siige, babo cewe iyeta poto ta biname cina buduma äbitininisi, yepä gome uuwametnige iiwäreja mete caale bora me. Teepi Paulo ne joomlisi, piba elädnisi pui puupu cabu ca. Piba taatu iiwäreja mete caale grana bine ermemisi, ingle teepi singi lica uudi wawename pui puupu ne.<sup>31</sup> Claabe biname bime tomi cina ligä Paulo ne budre me jwenisi, piba cubu biname lui Rooma cewe cabu ca, teeme mope biname te itecijige egä iyeta Yerusalem ngalebora teepi cubu jiicenisi.<sup>32</sup> Piba taatu peei cubu mope biname te poto cubu modamoda biname piiyepu poto cubu biname bine sewademige, wata eclige pui tomi cabu me. Biname cina liba cubu mopeyame jepänisi teeme cubu biname cama, teepi ebmalisi Paulo ne aglime.<sup>33</sup> Cubu mope biname te piba Paulo bau me ädige, joomlige, mene jejemige teebine ätäyame neenen ayana seea ca. Puma cita ca tabe biname bine itemlemige egä, “Laasi nyene ai biname; tabe ngena bii jwenige?”<sup>34</sup> Poto biname yepä mene jiicisi; nuuja cina mara mene jiicisi. Mene maramara name pi, cubu mopeyame äblicäco cängena umle äbita ngena bii bätig. Tabee peei name pi teeme biname bine jejemige Paulo ne acaname teeme cubu biname bime kokre mete

cabu me. <sup>35</sup> Paulo cama cubu biname cina mete bâbleta ne liba joomlisi, teepi piba teebine cabu ta ecanisi, ingle puga ge poto mage drowäyame biname. <sup>36</sup> Teepi iyeta teebine ingwe icwisi, ala cama jiicisi egä, “Egleye teebine budre me!”

### *Paulo Teeme poto cidi me Mene Jejemige*

<sup>37</sup> Paulo cama lui cubu biname cina teeme kokre mete me mameta liba äbâcna, Paulo piba mene jejige cubu mopeyame ne egä, “Nää, cane mene naajene?”

Puma cita ca mopeyame te itemlige, “Baa, maane Griik mene umle gäte? <sup>38</sup> Maane piba pui Aikupitoyame lica gäte, lui te ai padare niinäce gaabe je gije itu labacitepi Rooma gabmani cama cubu iicaname. Tabé lui fooa tausen girigale biname bine cubu turikä cama ewademige daapo taatu cewe cabu me.”

<sup>39</sup> Paulo jejige egä, “Eewe lica, cane Israela biname gäne, aplimlujine Taasu cewe je Kilikiya gawe cabu. Cane ngii biname gäne pui babo cewe Taasu cabu je. Owecu, cane singi gäne mene jajime biname bine.”

<sup>40</sup> Piba cubu mopeyame teebine mene me padare ecärigé. Puma cita ca Paulo mete bâbleta cabu jeclajutige, teeme ime ca biname bine bojä jewenemige. Teepi liba bojä jegemige, Paulo teebibine jejemige Israela biname bime Heberu mene ca egä:

## 22

<sup>1</sup> “Cäme babewale, käme binamewale, cebine nätecijeye! Cane cämämu ai jiicenine egä käme mule niiya lica gyene.” <sup>2</sup> Siige, biname cina liba

itecijemige tabe Heberu mene ca teebibine jaji, teepi piba toraca bojä äbitininisi. Paulo piba jejemige egä,

<sup>3</sup> “Cane Israela biname gäne, aplimlujine Taasu cewe je Kilikiya gawe cabu, yepä aimä Yerusalem me tädujine abiberäja täüpume. Cane Gamaliya me abiberäja bägrä gäne. Tabe cebine cängena nabiberäjuji mime kaakesaare bime cotre cabu, piiyepu cane babo singi Acejiyame täüpume, weene page liiyepu. <sup>4</sup> Cane cuta niiya jaawenemune ngälu budre me biname bine, lui cina ai Gaabe cabu waatnininus. Cane magebi piiyepu rooriye bine ewademujine krokeciyiye mete cabu me. <sup>5</sup> Iiwäreja mope biname piiyepu iyeta mutre biname teepi ibibi gemi ire arbime egä cäme mene toraca gyene. Cane teeme bau ca peba bine jepänemujine Damaseko je lui Israela biname bime bau me waadename, naace täüpume puma Keriso lui cina jäätprungusi, pui bine oomlemame. Cane piiyeme ädujine teebibine oomläjecame, ayana seea cama Yerusalem me awecname mäpu daremu päpäname teeme mara ätrunga täüpume.”

### *Paulo Jejemige Tabe Lipu Äbitige Ätrunga Biname me*

<sup>6</sup> “Yoo, cane liba gaabe cabu ädenujine, Damaseko cewe me mameta atyaramta, piiba taatu bimu duusa padare cabu, babo apacyera te dume cabu ca tuungepmaluji cäme gome. <sup>7</sup> Cane natramuji gawe me, siige tagepogogo te cebine najuji egä, ‘Saulo, Saulo! Maane ngenome cebine mäpu näcäranenite?’ <sup>8</sup> Cane itemlu-jine, ‘Babo

biname, maane laasi näte?’ Tabé najuji egä, ‘Cane Yeesu Nasareta ceweyame gäne, maane lui ne mäpu näcäranenite.’<sup>9</sup> Lui biname cane cama secluji, apaclyera te jepänujisi, yepä teepi lica itecijemuji peei tagepogogo lui te mene cebine najanuji.<sup>10</sup> Puma cita ca cane itemlujine egä, ‘Babo Biname, cane ngena jewenenine?’ Yageyame piba cebine najuji egä, ‘Arpinanti, ädi Damaseko cewe cabu me. Puma yepä biname te meeblee iyeta gwidape pa naajepi Acejiyame lui ituge jaji maane te wawename.’<sup>11</sup> Pui babo apaclyera name pi cane äblicäco ge pui padare cabu gwidape päpäna. Cane cama lui biname cina cebine ime ca nacanujisi Damaseko cewe cabu me.

<sup>12</sup> Yoo, puga ge Damaseko cewe je yepä biname, teeme ngii Ananiya. Tabé mime cotre bine cängenarage jaawenemuge. Tabé baborage ge Damaseko cewe Israela biname bime ngene atwanena cabu.<sup>13</sup> Tabé käme bau me täduji, käme gome jeclajutuji, najuji egä, ‘Käme biname Saulo, maane irecu ca jepänil?’ Piba taatu cane miji ge teebine päpäname.<sup>14</sup> Tabé najuji egä, ‘Acejiyame lui bau me mime kaakesaare cina irecu lätumutanininusi, meeblee ituge jaji teeme singi poto cidi me umle äbitame, teeme Conocäco Kaakesea Biname ne päpäname, piiyepu teemerage tagepogogo mene ätecijame.<sup>15</sup> Maane peei name pi ire arbi biname me pa päbitipi teeme tääpume iyeta biname bine jajime, maane ngena itu tepänumete piiyepu näätecijumi.<sup>16</sup> Siige, maane ngena tääpume jewagrijenite? Arpinanti, niiye ca äciseja ne ecati teeme ngii cabu määme niiya

mule äyeblingtame, maane liba Yageyame me ngii ne yaawejanute.’”

*Acejiyame Paulo ne Jejige Nuuja Gawe Biname bime bau Otnime*

<sup>17</sup> “Yoo, cane Yerusalem me acnenutujine, egäcäro iiwäreja mete cabu irecu ätumutujine, piba wama pana jepänujine Yageyame ne. <sup>18</sup> Tabé cebine najuji egä, ‘Wata Yerusalem ne page sebmali, ingle naace popi ama biname cina lica pa yaacatepesi määme aitneja mene käme poto cidi me.’ <sup>19</sup> Cane teebine jejujine, ‘Yageyame, teepi umlerage gemi egä cane cime Israela biname bime abasecretna mete cabu ta waatnetnäjune, meebleine lui cina näätprungusi, teebibine joomläjecmune, yaaglecimune. <sup>20</sup> Piiyepu, määme miji aitneja biname Setepano ne liba budre me jewenujisi, cane puga ge, “yoo” mene jajime teebine budre me acitame, teeme cubuyame bime käbletääpe bine cane ire jetwemujine.’ <sup>21</sup> Piba Yageyame cebine najuji egä, ‘Äte, ädi, cane meebleine cudeerewe me pa näätvepepene biname bime bau me lui cina Israela biname lica gemi.’ ”

<sup>22</sup> Siige, biname cina Paulo ne jitecijanisi ngälu tabe pee mene jiicige, yepä teepi piba gije abacitinisi ala cama mene me egä, “Iyeblingteye! Egleye budre me! Miji lica tabe ireclota me lenaja!” <sup>23</sup> Teepi ala abayaninisi, käbletääpe bine ewewutäjemisi, piiyepu secre bine cabu me eyäremisi. <sup>24</sup> Siige, pui cubu mopeyame te piba mene jejemige teeme biname bine Paulo ne acaname cubu biname bime kokre mete cabu me. Tabé teebibine jejemige Paulo ne adnaname

teeme bau ca umle päpäname Israela biname cina ngena täüpumeala abayaninisi teeme poto cidi me. <sup>25</sup> Yepä, teepi ligat eebeejetäysi adnaname, Paulo puma cita ca jejige yepä cubu babo biname ne, lui te teeme gome aclajuteji ge egä, “Nää, cotre lica gyene weene Rooma ngii cama biname ne adnaname, teebee liba căro camuge atrana teeme mule täüpume?”

<sup>26</sup> Cubu babo biname te liba peei mene itecijige, tabe teeme mopeyame bau me ädige, teebee itemlige egä, “Maane ngena jewenenite? Tabelui Rooma ngii cama biname gyene!”

<sup>27</sup> Puma cita ca pui cubu mopeyame te Paulo bau me ädige, itemlige egä, “Maane naji, nää maane Rooma ngii cama biname gäte?”

Paulo jejige egä, “Yoo!”

<sup>28</sup> Cubu mopeyame te piba jejige, “Cane babo rarekaake itu ecärujine Rooma ngii cama biname me äbitame.”

Paulo jejige egä, “Yepä, cane Rooma ngii cama aplimlujine.”

<sup>29</sup> Cubu biname lui cina singi Paulo ne mene me wawename, teepi piba taatu teeme bau ca äyeblingige. Siige, cubu mopeyame wälu te joomlige liba umle äbitige egä Paulo Rooma ngii cama biname enajenige, piiyepu tabe ayana seea ca teebee bii besigrige.

*Paulo Jeclajutige Israela Mutre Biname Tomi  
cabu je*

<sup>30</sup> Cubu mopeyame te singi toraca umle äbitame ngena niiya täüpume Israela biname cina Paulo ne jeitnäjisi. Tabee peei name pi nuuja bimu cubu

biname bine jejemige Paulo ne iibirame. Tabe jejemige modamoda iiwäreja biname piiyepu iyeta Israela mutre biname abasecretname. Tabe piba Paulo ne ecanige teeme opo gaabe aclajutame.

## 23

<sup>1</sup> Paulo conocäco ire acitige pui Israela mutre biname bime bau me, teebibine jejemige egä, “Cäme binamewale, cane ngene ca begline egä cäme mule lui conocäco gyene, ingle iyeta padare cane cängenarage watnetnäjenune Acejiyame me opo gaabe je ngälu page.” <sup>2</sup> Siige, puma cita ca iiwäreja mope biname ngii Ananiya tabe Paulo me mameta lui biname bine jejemige teebine tage ayemeltame. <sup>3</sup> Siige, Paulo teebine jejige egä, “Meebine Acejiyame pa naayemaltep! Maane peema adnatenite cebine cotre ibi atraname, yepä maane määmämu peezi cotre ne jetropangtite, maane mene liba jejite cebine ayemeltame! Maane epu pana gäte bulubulu atreji liiyepu, biname te lui ne yaaganuge jugijugi ne acwabame, yepä pui jugi cerämu pisi nyene sungabe je.”

<sup>4</sup> Siige, Paulo gome biname cina teebine jejisi, “Maane jicnecite Acejiyame me iiwäreja mope biname ne!”

<sup>5</sup> Paulo jejemige egä, “Cäme binamewale, cane umle lica ge egä tabe iiwäreja mope biname gyene. Oogäräneji Mene te jiicenige egä, ‘Gone niiya mene jiicute määme biname bime mopeyame poto cidi me.’ ”

<sup>6</sup> Yoo, Paulo liba ngene ca eglige egä pui mutre biname tomi cabu poto lui Sadukea sigu biname

ge, piiyepu nuuja poto lui Parisea sigu biname ge, tabe piba babo tage ca jejemige teebibine egä, “Cäme binamewale, cane Pariseayame gäne piiyepu Parisea biname bime bägrä gäne. Cebine nacanisi weeme bau me atraname, ingle naace gyene cäme ngene atwanena pisi nyene egä budre biname cina cirenera arpinera ireclota tääpume!”

<sup>7</sup> Tabé liba peei mene jiicige, piba Parisea sigu piiyepu Sadukea sigu biname cina gije abacitinisi mene abajame. Pui mutre biname cina neeneni sigu äbitininisi. <sup>8</sup> Yoo, Sadukea sigu biname cina apu jiicusí egä budre biname lica cirege budre cabu ca arpinera, piiyepu teepi jiicusí egä Acejiyame me mename seemo piiyepu iyeta poto seemo toraca lica gemi, yepä Parisea sigu biname cina iyeta peei gwidape bine jitrungemisi. <sup>9</sup> Teeme guugla te baborage me äbitige, siige poto cotre abiberäja biname lui cina Parisea sigu biname ge, teepi abujängige, kokre cama peei mene ne jisädanemisi egä, “Cine äblicäco nuuja niiya päpäna ai biname cabu. Pama toraca gyene egä mename seemo te coo nuuja seemo te mene tejumi teebine.”

<sup>10</sup> Siige, mene äsädena te epu babo me äbitige egä cubu mopeyame wälu äbitige egä biname cina pama Paulo ne piicwapi-cwa jaawenusi. Tabé peei name pi teeme cubu biname bine pui mutre biname bime tomi cabu me jityepemige Paulo ne teeme bau ca asatame, teebine cääri acaname cubu biname bime kokre mete cabu me.

<sup>11</sup> Nuuja ciiye Yageyame te Paulo gome jeclarutige, teebine jejige egä, “Wälu gone! Maane

cebine lipu ituge aitna Yerusalema je, maane miji  
cuta cebine pepu aitname Rooma babo cewe je.”

*Israela Biname cina Gläämu Jicrajige Paulo ne Aglime*

<sup>12</sup> Nuuja krokerage poto Israela biname cina abasecretnige, gläämu jicrajige. Teepi mene yepä gome ecitisi Acejiyame me opo gaabe je egä teepi deedei lica äbita piiyepu niiye lica nääja, ngälu liba Paulo ne pa yaaglepesi. <sup>13</sup> Teepi iyeta footi biname cuta cerämu, lui cina icrajige pee i gläämu cabu. <sup>14</sup> Teepi piba eclige modamoda iiwäreja biname piiyepu nuuja modamoda biname bime bau me, teebibine jejemisi egä, “Cine mene Acejiyame me opo gaabe jejisi egä cine deedei lica äbita, ngälu cine Paulo ne liba pa yaaglepesi. <sup>15</sup> Yoo, weene piiyepu iyeta lui cina mutre biname tomi cabu, weene mene jityepepeye pee cubu mopeyame bau me tabe Paulo ne ätyepame weeme bau me, epu tääpume egä weene singi gemi cängena umle äbitame teeme poto cidi me. Cine pa lamacetnäjipago teebine gaabegabe aglime budre me.”

<sup>16</sup> Yepä, Paulo me ngango bägrä te ai gläämu mene itecijige. Tabé piba ädige cubu biname bime kokre mete me, Paulo ne pui mene jejige. <sup>17</sup> Puma cita ca Paulo ala tesoglicige yepä cubu babo biname ne, jejige teebine egä, “Ecani mopeyame bau me ai mamye biname ne. Teeme mene pisi nyene jajime.” <sup>18</sup> Siige, pui yepä hanred cubu biname bime babo biname te teebine ecanige teeme mopeyame bau me, jejige egä, “Ama lui krokeciyi mete biname ngii Paulo, tabe cebine nätemlige ai

mamye biname ne määme bau acaname, ingle teeme mene pisi nyene meebine jajime.”

**19** Siige, cubu mope biname te teebine ime joomlige, ecanige teeme taatu puupu me, piba itemlige egä, “Maane cebine ngena mene tääpu mäte singi jajime?”

**20** Tabe jejige egä, “Israela modamoda biname cina mene yepä cabu becitsi. Ciiyeciye teepi meebine näätinärenisi Paulo ne cääri acaname Israela mutre biname tomi cabu me, epu tääpume egä teepi singi gemi teeme poto cidi me cerämu cängena umle äbitame. **21** Yepä, gone jäätécijemute, ingle naace popi footi biname, cerämu poto piti nem, teepi ämletnäreji icrulenige, Paulo ne jewagrienisi. Teepi gläämu bii jicrajige deedei lica äbita piiyepu niiye lica nänäja, ngälu teepi liba Paulo ne pa yaaglepesi. Teepi amacetnäjäneji gemi pee i ne wawename, yepä määme mene ne jewagrienisi.”

**22** Siige, cubu mope biname te piba pui mamye biname ne jejige, “Gone nuuja biname ne jaajute maane lui mene bii tiicite cäme bau.” Siige, pui mamye biname ne jityepige.

### *Paulo ne Jityepige Yuudea Probins Mopeyame Peliki bau me*

**23** Puma cita ca cubu mope biname te ala taasoglicige teeme neeneni cubu sigu babo biname bine, teebibine jaajige egä, “Weene jeje-mepeye neeneni hanred cubu biname bine, piiyepu sebenti cubu biname bine cooso cama, cuta piiyepu neeneni hanred cubu biname bine kalaku cama, teepi Kesarea cewe me otnime.

Amacetnäjineye, weene nain oklok ciiye abyemerame. <sup>24</sup> Cooso bine cuta ewadeniye Paulo me otni tääpume, teebine cängena ecaneye Mope Biname Peliki bau me.” <sup>25</sup> Cubu mope biname te piba apu mene yoogärige:

<sup>26</sup> “Sebore, Yuudea Probins Mope Biname Peliki!

Cubu mope biname Klaudiyus-Lusiyus, cane määme bau me yoogärenine.

<sup>27</sup> Israela biname cina ai biname ne toomlumesi, piiyepu mameta ge teebine budre me agli. Cane umle täbitumene egä tabe Rooma ngii cama enajenige. Siige cane peei name pi käme cubu biname cama tädumene, teebine teeme bau ca sewepläcitumene.

<sup>28</sup> Yoo, cane singi ge umle äbitame, teepi ngenome tiicetnumesi teebine, cane peei name pi secanumene teeme Israela mutre biname tomi cabu me. <sup>29</sup> Cane puga umle täbitumene egä tabe nuuja niiya mule lica itu jaawenepi lui tääpume budre me wawename, coo krokeciyi mete me acitame. Teepi teebine tiicetnumesi teemerage cotre atropengta poto cidi me.

<sup>30</sup> Siige, cane liba umle äbitine egä poto Israela biname cina singi Paulo ne ngatna wawena budre me, cane piba ngene jotwanine teebine wata määme bau ätyepame. Cane teeme iicetna biname bine jejemine määme opo gaabe teeme mene iicemame. Siige.”

<sup>31</sup> Cubu biname cina teeme mopeyame me mene jewenisi. Teepi pui ciiye cabu Paulo ne

ecanisi cewe ngii Antipatiri me. <sup>32</sup> Nuuja bimu lui cubu biname cina ernge ta waatninusi, teepi äcnärige cubu biname bime kokre mete me. Teepi cooso cama lui cubu biname bine sebmalemisi Paulo ne piiyeme acaname. <sup>33</sup> Teepi teebine ecanisi Kesarea cewe me, puma pui Mopeyame ne peba ecärisi, piba Paulo ne ecitisi teeme ime cabu. <sup>34</sup> Siige, Peei Mopeyame te peba cabu lui mene bine ecnemige, piba Paulo ne itemlige egä, "Maane ngena probins cabu ca gäte?" Tabe liba umle äbitige egä Paulo lui Kilikiya probins cabu ca ge, tabe jejige egä, <sup>35</sup> "Cane määme mene pa näätecijepene, määme iicetna biname cina liba pa tatyarepi." Tabe piba poto cubu biname bine mene jejemige Paulo ne awamutame Mopeyame Heroda me babo mete cabu.

## 24

### *Israela Biname cina Paulo ne Jeitnäjisi*

<sup>1</sup> Faib bimu ingwe ca iiwäreja mope biname Ananiya atyaramtige Kesarea cewe je, poto modamoda biname cama piiyepu teeme mene iicema biname, ngii Teretus. Teepi Mopeyame Peliki me opo gaabe jeclajutemige Paulo ne aitnejame. <sup>2</sup> Mopeyame te piba Paulo ne tesoglicige teeme bau otnime, puma cita ca Teretus te gije abacitige Paulo ne aitnejame egä,

"Babo Biname Peliki, cine poode cama ninajininige leca padare määme muijirage ire atwi name pi, cuta piiyepu weene poto cotre bine cängena itu yaamacetnäjemepeye cime gawecewe miji täüpume. <sup>3</sup> Cine singi pepu miji mule täüpume

iyeta padare cabu iyeta poto ta, peeи name pi baborage eso! <sup>4</sup> Yoo, cane singi lica määme babo padare acata, peeи name pi cane näätelenine cime matikolä mene cängena äteciame. <sup>5</sup> Cine umle äbitinago egä ai biname te niiya mule jaawenuge ai gawecewe täüpume. Tabe Israela biname bine claabe me jaawenemuge iyeta maramara gawe cabu ta. Tabe mopeyame gyene Nasareta sigu biname täüpume, <sup>6</sup> piiyepu tabe liga tapicetnärumi iiwäreja mete ne sabe wawename, siige cine piba teebine toomlumesi. Yoo, cine singi ge teebine atraname cimerage cotre ibibi, <sup>7</sup> yepä cubu mopeyame Lusiyus piba tädumi, babo drowä cama teebine secatumi cime bau ca. <sup>8</sup> Lusiyus puma cita ca mene tiicumü egä aitneja biname cina miiji määme opo gaabe me otnime. Maane liba ai biname ne yäätemläjute, maane teeme bau ca piba umle päbitipi iyeta gwidape poto cidi me, cine lui täüpume jeitnäjenisi.” <sup>9</sup> Yoo, Teretus me mene liba siige, pui Israela biname cina piba jejisi egä iyeta pui aitneja mene lui toraca ge.

### *Paulo Mene Jicige Peliki me Opo Gaabe je*

<sup>10</sup> Probins Mopeyame Peliki puma cita ca Paulo ne ime ca jewenige mene me. Paulo piba jejige egä,

“Babo Biname Peliki, cane umle gäne egä maane ai gawe biname bine jaatranemute bucurate kämäge cama. Cane peeи name pi ngenecu miiji gäne cämämu aitname määme opo gaabe. <sup>11</sup> Maane liba singi, maane ibibi gäte umle äbitame egä twelb bimu ingwe gaabe ca, cane piba itu lädepene Yerusalem me puma iiwäreja mete cabu irecu

äatumutame. <sup>12</sup> Cane liba iiwäreja mete cabu jage, Israela biname cina lica puma itu näpänepesi nuuja biname cama äcela je, piiyepu cuta lica itu näpänepesi biname bine giri acrana cabu Israela biname bime abasecretna mete cabu ta coo cewe nuuja poto ta, <sup>13</sup> piiyepu teepi äblicäco gemi teeme pui aitneja mene ne toraca me wawena. <sup>14</sup> Yoo, page cane määme bau me cämämu aitnenine. Cane cime kaakesaare bime Acejiyame ne mara mule ca yaawejanune, teepi lui mule ne yaainusi egä toraca mule lica gyene. Yepä, cane cuta iyeta Oogäräneji Mene jäätprungemune, lui pisi nyene Cotre Mene ngalebora piiyepu sasa mename biname bime oogäräneji mene ngalebora. <sup>15</sup> Cane piiyepu iyeta nuuja Parisea biname cine Acejiyame me padare ne jewagrijenisi, lui padare cabu iyeta miji mule biname piiyepu iyeta niiya mule biname piba budre cabu ca cirege arpinera. <sup>16</sup> Cane pui name pi cängenarage nanajuge cämämu conocäco me ngene ca agli biname bime opo gaabe piiyepu Acejiyame me opo gaabe je.

<sup>17</sup> Cane nesae kämäge cama Yerusalema ca itu äyeblingtujine. Cema cane piiyeme cääri lädepene poto rarekaake käme binamewale bime bau me waadename, cuta piiyepu Acejiyame ne iiwärejame. <sup>18</sup> Ai neeneni mule bine liba jaawenepene, teepi cebine näpänepesi iiwäreja mete cabu. Cane niinäce kälyä läbitepene iyeta cudege gwidape cabu ca, ingwe ca piba Acejiyame me mete puupu cabu me labacitepene. Biname tomi lica ge käme gome, cuta piiyepu guugla lica ge piba. <sup>19</sup> Yepä, puga ge poto Israela biname Asiya probins cabu ca. Teepi teemämu määme

opo gaabe cire saacleji, teeme liba pisi nyene mene cebine aitnejame. <sup>20</sup> Coo, age temi lui biname, teepi miji jiicesi teepi ngena conocono ne käme cabu tepänumesi, cane liba naclajutumi atrana tääpume pui mutre biname tomi cabu je. <sup>21</sup> Coo, pama teeme tääpume conocono gyene pui yepä mene babo tage ca lui tiicumene, cane liba teeme opo gaabe naclajutumi. Agesa pui mene: ‘Cebine nacanisi weeme bau atraname, ingle naace gyene cane jitrungenine egä budre biname cirege arpinera ireclota tääpume.’ ”

<sup>22</sup> Siige, Peliki lui te cängena umle ge ätrunga gaabe poto cidi me, tabe piba peeि atrana padare ne epirige. Tabе pui Israela modamoda biname bine jejemige egä, “Cane ingwe ca atrana pagege weeme poto cidi me, cubu mopeyame Lusiyus te liba pa tatyaramtepi.” <sup>23</sup> Siige, tabe mene yepä cubu babo biname ne jejige Paulo ne awamutame, yepä Paulo miji ge asatame abacitame pui mete cabu, piiyepu teeme binamewale miji ge teeme singi gwidape teebine ceerame.

### *Paulo Jeclajutige Peliki naabi Drusila Teeme Opo Gaabe je*

<sup>24</sup> Poto bimu ingwe ca Peliki coga cama taaclige. Teeme coga, ngii Drusila, lui Israela magebi gwene. Mopeyame Peliki Paulo ne tesoglicige, teeme mene jitecijige Yeesu Keriso ne ätrunga poto cidi me. <sup>25</sup> Yepä, Paulo liba teebibine mene jaajanige conocäco mule poto cidi me, piiyepu tääpe singisingi abmala poto cidi me, cuta piiyepu atrana bimu poto cidi me, lui te cirege otni, Peliki

wälu te piba joomlige, tabe Paulo ne jejige, “Sige, page ai padare cabu maane cibibine nibmali! Cane liba miji padare ne pa jäätüepene, cane piba cääri pa naasoglecepene.” <sup>26</sup> Yoo, Peliki apu jengenige egä, “Paulo pama rarekaake cebine näärenige teeme asata täüpume.” Tabe peei name pi poto padare Paulo ne taasoglicuge ten cama mene abaitname.

<sup>27</sup> Neeneni kämäge ingwe ca, kirece biname teeme ngii Porokiyo-Peesto, tabe Peliki me puupu jecatige Probins Mope biname täüpume. Peliki liba äyeblingtige puma cita ca, tabe Paulo ne sebmalige puga awamuta biname cama krokeciyi mete cabu, ingle naace popi tabe singi Israela biname bine ngenecu miji me wawename teeme poto cidi me.

## 25

### *Paulo Singi Rooma Babo Mope Biname te Tee-bine Atraname*

<sup>1</sup> Peesto atyaramtige peei probins ngalebora, piba nesae bimu ingwe ca ädige Kesarea ca Yerusalem me. <sup>2</sup> Puga modamoda iiwäreja biname piyyepu Israela mutre biname cina kirece Mopeyame Peesto bau eclige Paulo ne aitnejame. Teepi mene itu titranumesi Paulo ne gaabegabe aglime, peei name pi teepi Peesto ne itemlisi <sup>3</sup> teeme singi wawename egä Paulo ne awecnistame Yerusalem me. <sup>4</sup> Peesto jejemige egä, “Paulo ne jewamutenisi krokeciyi mete bora Kesarea je. Cane mameta gäne acnenuta piyyeme. <sup>5</sup> Weene miji ge weeme poto mutre biname cane

cama ätyepame Kesarea me puma Paulo ne aitnejame, tabe liba niiyaniya mule ituge wawena.”

<sup>6</sup> Peesto Yerusalemä je enajige cerämu eit coo ten bimu cama, piba acnenutige Kesarea me. Nuuja bimu tabe adnatige atrana puupu cabu, mene jejemige Paulo ne teeme bau acaname. <sup>7</sup> Paulo liba puma atyaramtige, Yerusalemä ca lui Israela biname cina seclumi, teipi teeme gome jeclajutemige, gije abacitinisi mäpu mene iicemame Paulo poto cidi me, yepä teipi äblicäco ge teeme mene awaba egä toraca gyene. <sup>8</sup> Siige, Paulo piba teemämu aitnäjige egä, “Cane nuuja niiya lica ituge wawena Israela biname bime cotre poto cidi me, cuta piiyepu nuuja niiya ne lica ituge wawena iiwäreja mete tääpume, cuta piiyepu Rooma Babo Mope Biname tääpume.”

<sup>9</sup> Siige, Peesto singi Israela biname cina ngenecu miji äbitame teeme poto cidi me, pee name pi Paulo ne itemlige egä, “Nää, maane singi gäte Yerusalemä me otni, puma käme opo gaabe mee-bine atraname ai biname bime aitneja mene poto cidi me?”

<sup>10</sup> Paulo jejige, “Cane page naclajutenige Rooma Babo Mope Biname bime yepä atrana puupu cabu, lui cabu cebine miji pa natranepeye. Cane nuuja niiya lica ituge wawena Israela biname bine. Maane pee umlerage gäte! <sup>11</sup> Cane liba cotre ne jaatropangtune niiya mule wawename, cuta pui niiya mule cabu ca cane liba ibibi ge budre daremu pääname, cane piba singi lica uu-craname. Yepä, teeme aitna mene toraca lica gyene, pee name pi nuuja biname te lica cebine

pa nacitepi teeme ime cabu. Cane singi gäne Rooma Babo Mope Biname te cebine atraname.”

<sup>12</sup> Siige, Peesto teeme atrana ätityera biname cama mene ajanininisi, piba Paulo ne jejige egä, “Maane singi gäte Babo Mope Biname te meebine atraname, yoo siige, maane Babo Mope Biname bau pa ädepi.”

*Paulo Jeclajutige Agripa naabi Berenike bime Opo Gaabe*

<sup>13</sup> Poto bimu ingwe ca Israela biname bime mopeyame Agripa piiyepu teeme ngule Berenike teepi Kesarea me taaclige pee probins me kirece mopeyame Peesto ne ängrärame. <sup>14</sup> Teepi nesa bimu icrajige, piba Peesto Paulo poto cidi me mene jejanige Agripa ne egä, “Ama pisi nyene yepä biname Peliki lui ne saabmalepi awamuta biname cama, tabe liba ama cita ca läyeblingtepi. <sup>15</sup> Cane liba Yerusalema me itu lädepene, Israela modamoda iiwäreja biname piiyepu teeme nuuja modamoda biname cina teebine jaaitnäjepesi, nätemlepesi cane teebine mäpu cabu acitame. <sup>16</sup> Yepä, cane teebibine jaajemepene egä cime Rooma biname bime mule lica gyene, biname ne teeme aitneja biname bime ime cabu papa acitame, yepä niinäce tabe miji teeme aitneja biname cama opopa ayi piiyepu padare päpäna teemämu aitname. <sup>17</sup> Yoo, teepi liba aima cane ama saaclepi, cane padare ne papa lica yaapirepene, yepä nuuja bimu cabu atrana puupu cabu ladnatepene, mene jaajemepene Paulo ne acaname. <sup>18</sup> Siige, teeme aitna biname cina

piba jaaclajutemepi mene me, yepä teepi epu ni-iyarage mule poto cidi me lica jaaitnepesi. cane lipu nangenepi. <sup>19</sup> Iyeta teeme aitna lui äciseräja mene teemerage iiwäreja mule poto cidi me pi-iyepu yepä biname ngii Yeesu poto cidi me, lui budre ge, yepä Paulo jiicenige egä tabe ireclota gyene. <sup>20</sup> Cane liba umle lica gäne lipu umle mene päpäname peeи poto cidi me, cane piba Paulo ne yäätemlepene tabe lipu gyene Yerusalem me otnime puma atraname teebine teeme aitneja poto cidi me. <sup>21</sup> Yepä, Paulo singi lica ge. Tabе cebine nätemlepi awamuta tääpume cuta Rooma Babo Mope Biname te teebine atraname. Siige, cane peeи name pi mene jaajemepene teebine awamutame ngälu gaabe ne liba päpäna teebine Babo Mope Biname bau me ätyepame.”

<sup>22</sup> Siige, Agripa te Peesto ne jejige egä, “Cane singi gäne ätecijame ai biname me mene.”

Peesto jejige egä, “Yoo, ciiyeciye maane pa näätecijepi.”

<sup>23</sup> Nuuja bimu Agripa naabi Berenike mage awaml aama aaclige, babo abasecretna puupu me abacitäsi; cubu modamoda biname piiyepu cewe modamoda biname ten cama ge. Peesto piba mene ecäremige Paulo ne äsinglentame. <sup>24</sup> Peesto jejemige egä, “Israela biname bime mopeyame Agripa piiyepu iyeta lui cina cine cama tabase-cretnininiye, weene ai biname ne jepäneye. Ama iyeta Israela biname cuta piiyepu Yerusalem je iyeta Israela biname, teepi aitna mene käme bau itu saawademepesi ai biname poto cidi me. Teepi cuta ala cama mene jiicanemepesi teebine budre me wawename. <sup>25</sup> Yepä, cane jääpänepene egä tabe

nuuja niiya mule lica ituge wawena lui tääpume teebine budre me agli. Siige, tabe cebine nätemlepi Rooma Babo Mope Biname bau otnime, peeи ingle pi cane ngene jotwanine piiyeme ätyepame. <sup>26</sup> Yepä, käme nuuja cängenarage mene lica gyene teeme poto cidi me Rooma Babo Mope Biname bau me oogärame. Cane peeи name pi teebine secanenine weeme bau me, piiyepu toraca määme bau me, Agripa, teeme mene äteciјame, pipu pi mene pisi nyene ingwe ca oogärame, <sup>27</sup> ingle naace gyene cane äblicäco biname ne papa ätyepa, liba peba mene lica ge teeme aitna poto cidi me.”

## 26

### *Paulo Teemämu Aitnige Agripa bau me*

<sup>1</sup> Agripa te Paulo ne mene jejige egä, “Yoo, maane miji määme poto cidi me mene iicana.” Paulo piba ime uutige, gije abacitige teemämu aitnejame egä:

<sup>2</sup> “Agripa Mopeyame, page babo mijirage gyene käme tääpume egä cane määme opo gaabe je naclajutenige käme ngii cängena wawename Israela biname bime aitneja poto cidi me, <sup>3</sup> ingle naace popi maane babo umle gäte Israela biname bime mule piiyepu teeme äciseräja mene poto cidi me. Peeи name pi cane meeбине näätemlenine käme mene cängenarage äteciјame.

<sup>4</sup> Iyeta Israela biname umle gemi käme ireclota lipu ge matikolä bägrä cabu ca. Teepi umle gemi cane lipu nanajuji niinäce käme gawecewe cabu cuta piiyepu ingwe ca Yerusalem je. <sup>5</sup> Teepi sasa cabu ca umle gemi cane, siige teepi liba singi

gemi, teepi miji gemi aitname egä cane lipu niinäce cabu ca yepä sigu cabu nanajuji, lui Parisea sigu biname cina Acejiyame ne yaawejanusi mäpu cotre mule ca. <sup>6</sup> Yoo, page cane naclajutenige atrana täüpume, ingle cane ngene atwana ne ecitenee pee mene cabu Acejiyame cime kaakesaare bine lui mene itu jejemuji. <sup>7</sup> Yoo, cime biname lui iyeta twelb ingle cabu ca gemi, teepi liba Acejiyame ne ciiye bimu yaawejanusi, teepi cuta jaawagrijusi pee jajeji mule ne päpäname. Yoo, Mopeyame, käme pee ngene atwana name pi Israela biname cina cebine naitnenisi. <sup>8</sup> Nää, weene ngena name pi äblicäco gemi ätrunga egä Acejiyame te biname bine budre cabu ca cire yaarpinäremepi?

<sup>9</sup> Yoo, cane cuta piiyepu apu nanguji egä cane miji iyeta gwidape wawena Yeesu Nasareta ceweyame me ngii ne äyeblingtame. <sup>10</sup> Cane pepu jewenanujine Yerusalem je. Cane mene ecanujine modamoda iiwäreja biname bime bau ca, bucurage Acejiyame me biname bine icranemujine krokeciyiye mete cabu me. Ingwe ca biname liba singi ge teebibine budre me acraname, cane cuta singi ge teepi budre me. <sup>11</sup> Bucurage padare cane teebibine mäpu cabu yaacranune iyeta Israela biname bime abasecretna mete cabu ta. Cane pepu pi singi teebibine giri acraname teeme mara ätrunga mule ne abmalame. Yoo, cane epu mage claabe teeme täüpume egä cane nuuja gawe biname bime cewe cabu ta otnujine teebibine mäpu cabu acraname.”

*Paulo Jejemige Tabe Lipu Ätrungayame me Äbituji*

**12** “Cane peeи name pi Damaseko me ädujine modamoda iiwäreja biname bime peba mene cama. **13** Yoo, Mopeyame, bimu duusa gaabe cabu jage, cane apaclyera ne jepänujine lui baborage ge bimu cabu ca, dume cabu tuungepmaluji käme gome piiyepu teeme gome lui cina cane cama secluji. **14** Cine iyeta gawe me nitramitnimuji. Cane tagepogogo nätecijuji, Heberu mene ca lui najuji egä, ‘Saulo, Saulo! Maane ngenome cebine mäpu näcäranenite? Maane määmämu niiya cabu äbitenite peeи mule cabu ca, ingle maane toraca gaabe ne jigyenite, nuuja gaabe cabu otnenite.’ **15** Cane puma cita ca itemlujine egä, ‘Babo Biname, maane laasi näte?’ Yageyame te najuji egä, ‘Cane Yeesu sâne, maane lui ne mäpu näcäranenite. **16** Maane abujängti, ernge ca naaclajutege. Cane määme bau baboclomtine meeбine jajime käme kaakesea biname me äbitame. Maane biname bine cire jejanemepi, maane ngena page bii jepänite käme poto cidi me, piiyepu ciige cane ngena cire nawabepene. **17** Cane määme Israela biname bime ime cabu ca meeбine cire naasatepene, piiyepu nuuja gawe biname bime ime cabu ca, cane lui biname bime bau me cire näätyepepene. **18** Maane teeme irecu cire jiitnemepi, teebibine etatrongäremepi krokectiye cabu ca apaclyera cabu me, cuta piiyepu etatrongäremepi Satani me kokre cabu ca Acejiyame bau me. Pipu pi teeme käme bau ätrunga name pi, teepi teeme niiya mule cabu ca cire läsecräripesi, teepi puupu ne piba cire jääpänepesi Acejiyame me miji biname cama.’ ”

*Paulo Teebibine Cuta Jejemige Teeme Kaakesea*

*poto cidi me*

**19** “Yoo, Agripa Mopeyame, cane lica ibwärujine ätecijame cäme Babo Biname cabucewe ca lui mene seboclomtuji. **20** Yepä, cane mene jiicemune niinäce Damaseko je, puma cita ca Yerusalem je, puma cita ca iyeta Israela biname bime gawe cabu ta, piba cuta piiyepu nuuja gawe biname bime bau me. Cane apu jiicemune egä, ‘Weeme niiya mule ebmalemepeye, Acejiyame bau me atatrongäripeye. Piba miji mule jwenemepeye awabudnitame egä weene niiya mule bine ituge abmala.’ **21** Peei mene pi Israela biname cina cebine itu noomlepesi, cane liba iiwäreja mete cabu jage, siige läbitipesi cebine aglime. **22** Yepä, iyeta padare ngälu page ai bimu Acejiyame cebine nätinyäruge. Pipu pi cane page naclajutenige toraca mene iyeta biname bine jajanename, matimati biname cuta piiyepu modamoda biname. Piiyepu cane nuuja mene lica jijenininine, yepä pui mene taatu Moose piiyepu mename biname cina lui poto cidi me jiicemujisi egä toraca me cirege äbita. **23** Peei mene apu egä, ‘Israela biname bime niiya cabu ca äsecrera biname te miji mäpu päpäna, budre äbita, siige niinäce me cirege äbita budre cabu ca arpinentame, mene iicemame piiyepu ireclota gaabe pepu apaclyerame Israela biname bime tääpume piiyepu nuuja gawe biname bime tääpume.’”

**24** Siige, Paulo liba pepu teemämu aitnäjige, Probins Mopeyame Peesto babo tage ca jejige, “Paulo, maane buduma grote; määme oräre abiberäja te buduma me naawenige!”

<sup>25</sup> Paulo jejige egä, “Mopeyame, cane buduma lica gäne. Cane toraca mene miiji ngene atwana cama jiicemenine. <sup>26</sup> Yoo, Agripa Mopeyame, cane wälu lica gäne ai mene meeble jajime, ingle maane umle gäte ai mule poto cidi me, ingle naace gyene ai mule ämlitänéji lica gyene, yepä biname bime sobe cabu wawenänéji ge. <sup>27</sup> Agripa Mopeyame, nää maane Acejiyame me sasa mename biname bime mene jitrungenemite? Cane umle gäne, maane peei ne jewenenite!”

<sup>28</sup> Siige, Agripa Paulo ne jejige, “Nää, maane apu naangenenige egä ai matikolä padare cabu cebine Yeesu Keriso me biname me nawenenite?”

<sup>29</sup> Paulo jejige egä, “Ngänu gyene liba matikolä padare coo leca padare, cane Acejiyame ne ewejanenine egä maane piiyepu weene iyeta lui cina page cebine nätecjeniye, weene käme pana ätrungayame me äbitame, yepä cane singi lica weeme tääpume ai ayana seea!”

<sup>30</sup> Mene liba siige, Mopeyame Peesto, Mopeyame Agripa, Berenike, piiyepu iyeta cina abujängige. <sup>31</sup> Teepi liba abyemärige, teemeteme ajananinisi egä, “Ai biname nuuja niiya lica ituge wawena lui daremu me teebine miiji budre me acita coo krokeciyiye mete me äsinglenta.” <sup>32</sup> Puma cita ca Agripa te Peesto ne jejige egä, “Ai biname cire lasateji, yepä tabe Rooma Babo Mope Biname bau me otnime meeble itu näätlemepi.”

## 27

*Paulo Poo Gaabe Ädige Rooma me*

<sup>1</sup> Teepi mene liba jitranisi egä cine Rooma cewe Italiya gawe me poo gaabe pa naclepi, piba Paulo piiyepu poto nuuja krokeciyiye mete biname bine yepä biname, ngii Juliyo, me ime cabu icranemisi. Yoo, Juliyo lui cubu babo biname ge yepä hanred cubu biname teeme sigu tääpume, peei sigu lui ne yaainusi ‘Rooma Babo Mope Biname me Sigu’ ca.

<sup>2</sup> Siige, cine Kesarea cewe cabu ca babo poo cabu me acetnärinago, lui poo ne Adramutiyu cewe cabu ca emegisi otnime poto malu cewe me Asiya probins ngalebora. Siige, cine abyemärinago. Yoo, cine cama puga ge poo cabu yepä Makedoniya gawe biname Tesalonika cewe cabu ca, teeme ngii Aristakus. <sup>3</sup> Siige, nuuja bimu cine Sidona cewe je atyarinago. Cubu babo biname Juliyo owecu ge Paulo tääpume, teebine jejige egä tabe otnime teeme binamewale ädärame gaabegabe deedei waadename teeme bau ca. <sup>4</sup> Siige, cine puma cita ca malurage naclige, piba Kupro curä uuwa cabu naclige, ingle opopo buuwe te kokrerage tipwäjige. <sup>5</sup> Cine Kupro ca malu ne yuurisi Kilikiya piiyepu Pampuliya gawe mameta me, siige Muura cewe me atyarinago lui Lukiya gawe cabu je. <sup>6</sup> Puga cubu babo biname Juliyo nuuja poo ne jepänige Aleksandriya cewe cabu ca, lui poo te äbitenige Italiya me otnime. Puma cita ca tabe peei cabu cibibine nicetneräjininige.

<sup>7</sup> Cine däägu naclige poto bimu cama, mage mäpu padare ne jepänisi ngälu matikolä cewe Nido mameta me atyarinago. Peei opopo buuwe te cime gaabe ne jiibige piiyeme otnime, peei name pi cine Krete curä uuwa cabu ta naclige, Salamone Mubä ne sisuplingtisi. <sup>8</sup> Cine doro ligi ta naclige,

cuta cääri mage mäpu padare ne jepänisi, ngälu cewe me atyarinago lui ne yaainusi ‘Mijirage Poo Lenaja Puupu’, lui cudecewe lica ge Lasea cewe ca.

<sup>9</sup> Cine puga babo padare ninajininige, ngälu babo buuwe me padare te tatyaramtige. Yoo, pui bimu ituge otni lui cabu Israela biname cina ngene jaapecnusi teeme niiyaniya cabu ca äsecrera poto cidi me. Pui bimu kaake poto ca biname cina äblicäco poo gaabe otni buuwe name pi. Yoo, peei name pi Paulo teebibine umle mene jejemige egä, <sup>10</sup> “Biname, cane umle bäbitine egä mine mage wälu cama pagege otni ama cita ca. Babo niiya te pa tädepi mime poo piiyepu gwidape tääpume, cuta piiyepu mime ireclota tääpume.” <sup>11</sup> Yepä, cubu babo biname Juliyo poo waapo biname piiyepu poo yageyame bime mene jäätprungige, lica Paulo me mene ne. <sup>12</sup> Pui poo lenaja puupu toraca miji lica ge buuwe padare cabu puma lenajame, peei name pi bucurage pui poo biname cina singi poo ne malu ta acaname Poenika cewe ne oomlaname, buuwe liba ibibi gyene. Yoo, puga ge Poenika cewe cabu babo mijirage lenaja puupu poo tääpume Krete curä cabu, ingle naace gyene kokre ciiye buuwe piiyepu baarge buuwe cina peei puupu ne lica joomlus. Siige, teepi puma ibibi gemi awagrijame buuwe me apira padare ne.

### *Malu cabu Kokre Buuwe te Tipwäjige*

<sup>13</sup> Lädrirage buuwe te liba gije abacitige äpwäjame uule poto ca, biname cina apu jengenemige egä, “Ibibi gyene cime otni tääpume.” Teepi peei name pi cangka ne tesweclisi, Krete

curä wajwa ta eclige. <sup>14</sup> Matikolä padare ingwe ca, babo kokre buuwe te, lui ne yaainusi ‘Baarge Buuwe’ ca, tädige curä poto ca. <sup>15</sup> Pui kokrerage buuwe te poo ne liba toomlige, cine äblicäco buuwe ne äträja. Cine gloose te niglinige, siige ire ta jeitisi poo ne, buuwe te liba secwenistige. <sup>16</sup> Cine matikolä uuwa ne jepänisi, liba sisuplingtige uule poto ca yepä matikolä curä ne, ngii Kauda. Puga peeи uuwa cabu cine baborage poo me tataku ne cängena joomlisi, yepä mäpu ge peeи wawename. <sup>17</sup> Teepi tataku ne setecwantisi babo poo cabu me, piba poo ne jetäysi seea ca kokre wawename, ingle uli ca wawenäneji ge peeи poo. Teepi wälu äbitininisi egä poo te pama yäätyecnuge koriyo doro cabu Libiya malu je. Teepi peeи name pi äwä bine iyinetnemisi gawe me, poo ne ire ta jecitisi eewaname. <sup>18</sup> Kokrerage buuwe te tipwäjanige, siige nuuja bimu teepi gije abacitinisi acenetna gwidape bine niiye cabu me iisabejame, <sup>19</sup> cuta nuuja bimu teeme ime ca yiisabäjemisi poorage me gwidape bine. <sup>20</sup> Bucurage bimu cama cine äblicäco bimu piiyepu wale päpäna, piiyepu buuwe te cääri tipväjanige kokre cama. Siige, cine iyeta apu ninginige egä cine budre memi.

<sup>21</sup> Biname cina liba leca padare icrajenige deedei cäco, piba Paulo teeme opo gaabe jeclajutige, jejemige egä, “Binamewale, weene cebine cire nätecijesi, piiyepu Krete ca lica cire naacleji. Piba mime gwidape cina lica sabe läbitinejisi. <sup>22</sup> Yepä, page cane weebibine jijenini-nine, wälu gone! Weeme nuuja me ireclota te lica

sabe äbitinige, yepä poo taatu te niiya äbitenige.  
 23 Cane peei umle gäne, ingle birice ciiye cabu Acejiyame lui cäme yageyame, cane lui ne yaawejanune, teeme mename seemo te cäme bau tädumi,  
 24 cebine najumi egä, ‘Paulo, wälu gone! Maane miji Rooma Babo Mope Biname me opo gaabe je aclajuta, cuta piiyepu iyeta lui cina maane cama eclenige, Acejiyame te owecu name pi teeme ireclota meebee nääcärenige.’ 25 Yoo, binamewale, weene peei name pi wälu gone, yepä ngenecu kokre äbitipeye! Cane ätrunga ne ecitenine Acejiyame cabu me egä peei te pa läbitepi, tabe lipu cebine itu najumi. 26 Yepä, buuwe te mibibine pa niwadipi yepä curä cabu me.” Siige.

27 Teetin ciiye kaake poto ca, pui babo buuwe te cibibine cääri niwadininige Meditareniya Malu cabu. Liba ciiye duusa mameta ge, poo cabu kaakesea biname cina apu jengenemige egä, “Cine doro mameta me naclenige.” 28 Teepi peei name pi mäpu gwidape ne seea ca jemlemaltisi, niiye bora me englecantisi, piba jepänisi niiye lui yepä hanred twenti ngälu uugle ge. Matikolä padare ingwe ca teepi cääri tesweclisi, cabu me secenutisi, jepänisi niiye lui nainti ngälu uugle ge. 29 Teepi wälu äbitininisi egä poo te latecwamtuge kula cabu, peei name pi teepi poo waapo cabu ca fooa cangka bine niiye ngalebora me iyinetnemisi, siige teepi irecu ätumutinisi awala tääpume. 30 Yoo, poo cabu lui kaakesea biname cina singi uucratname babo poo cabu ca. Teepi tataku ne iyinisi niiye cabu me seea ca, piba sinäme jewenisi egä teepi singi poto cangka bine äinetname cuta poo me niinäce

gaabe ca. <sup>31</sup> Yepä, Paulo jejemige cubu babo biname Juliyo piiyepu teeme cubu biname bine egä, “Poo cabu kaakesea biname cina liba poo cabu lica yaacrajuge, weene äblicäco doro ne oomlana ireclota cama.” <sup>32</sup> Cubu biname cina peei name pi tataku oomlana seea bine jeclanemisi, siige tataku ne ire ta jecitisi eewaname.

<sup>33</sup> Bimu äpula mameta liba, Paulo giri jicrane-mige teebibine deedei äbitame. Tabe jejemige egä, “Weene page footin bimu wälu cama inajininige, piiyepu iyeta pui padare weene deedei cäco inajipi. <sup>34</sup> Page cane weebibine jijenini-nine deedei äbitame. Weene deedei äbitineye ireclota cama lenajame. Yoo, weeme nuuja te niyya lica jepänenige, weeme yepä edingäli te lica apesarenige.” <sup>35</sup> Teeme mene ingwe ca, Paulo bulduu ne ecatige, Acejiyame ne eso ecärige iyeta biname bime opo gaabe, peei deedei piba itremaltige, erwige. <sup>36</sup> Peema cita ca iyeta biname cina ngenecu kokre äbitininisi, piba deedei erwäjisi. <sup>37</sup> Yoo, cine iyeta lui neenen hanred sebenti siks biname ge pui babo poo cabu. <sup>38</sup> Iyeta biname liba erwäjisi ibibi ge, teepi piba wiiti kuu bine malu me yiisabemisi poo ne plowa wawename.

### *Babo Uule te Poo ne Iplegicige*

<sup>39</sup> Bimu liba tädige, poo cabu kaakesea biname cina peei doro ne lica opo ewatnisi, yepä teepi miji poo lenaja puupu ne jepänisi, niiye te luma labacituge cube cabu me, cuta piiyepu koriyo puga ge. Teepi mene jitranisi poo ne acaname koriyo cabu me, liba ibibi ge peei ne wawename.

<sup>40</sup> Teepi pee name pi cangka seea bine jeclane-misi, cangka bine ebmalemisi niiye bora je. Pui yepä padare cabu nuuja cina pui seea bine jiitne-misi lui cina waapo joomlisi. Teepi piba niinäce gaabe äwä ne jecitisi, ingle naace popi buuwe te poo ne niinäce gaabe me ecanige, siige cine doro me abyemärinago. <sup>41</sup> Yepä, poo te koriyo doro cabu me atecwamtige, ityecnige. Siige, poo niinäce gaabe te koriyo cabu lipu batecwamtige, teepi äblicäco poo ne älädna. Poo waapo ne kokre uule kuu cina luma jidnanisi, iyeta iplegicisi poo ne, siige.

<sup>42</sup> Yoo, cubu biname cina mene jitranisi iyeta krokeciyi mete biname bine aglecame, ingle naace popi teepi singi lica teepi atwangetna doro oomlaname, puma cita ca uucratname. <sup>43</sup> Yepä, cubu babo biname Juliyo tabe singi lica ge Paulo ne budre me aglime. Tabé pee name pi teebibine jiibemige pee ne wawename. Tabé mene jiicemige egä, “Laatibi atwangetna umle gemi, weene niinäce uupletnärineye doro me atwanetname. <sup>44</sup> Iyeta nuuja weene teebibine ingwe icwemeye. Weene ime icranemeye uli cabu, coo poto poo cabu ca agabceji uli bine joomläjecmeye!” Yoo, cine iyeta pepu naclige, siige doro ne cängena joomlisi.

## 28

### *Malta Curä cabu je*

<sup>1</sup> Cine liba cängenarage doro me atyarinago, cine umle äbitinago egä curä ngii lui Malta ge. <sup>2</sup> Pui curä biname cina cibibine biname me niwenini nisi. Teepi muye ne yuungisi, piba cibibine pui

gome me ala nisoglicninisi, ingle ngupe te gije tabacitige atramame piiyepu gäbu ge. <sup>3</sup> Paulo uli pargi bine ime cabu ewademige, siige muye cabu liba icranemige, niiya cobyame te piba tasatige nuunu name pi. Siige, cobyame te Paulo me ime ne bii jetäyige. <sup>4</sup> Curä biname cina liba cobyame ne jepänisi Paulo me ime cabu je, teipi teemeteme ajananinisi egä, “Ai biname pama niyyarage agliagli biname gyene, siige Daremu te singi lica tabe ireclota cama lenajame. Ngänu gyene tabe malu ca uucrana, budre pa jäätänege.” <sup>5</sup> Yepä, Paulo cobyame ne ijarige, muye cabu eceratige. Tabé pita ne lica jesicnantige. <sup>6</sup> Curä biname cina liga teebine ire jetwisi teeme ime ädrime coo tabe budre tama atramame, teipi liga lecaleca padare ire jetwanisi, nuuja gwidape ne lica jepänisi teeme bau äpletnutame. Teipi piba ngenecu atatrongäjininisi, jiicisi egä, “Tabé pama uuje biname gyene.”

<sup>7</sup> Puga ge yepä biname me calwacupi gawe, lui cudecewe lica ge pui muye puupu cabu ca. Pui gawe yageyame, ngii Publiyo, tabe cuta peei curä biname bime mopeyame ge. Tabé cibibine niwacletnäjininige, cängena niwadininige teeme cewe cabu me. Cine ten cama ninajininige nesae bimu cama. <sup>8</sup> Yoo, Publiyo me babe ute puupu cabu jage. Tabé pita cama enajige, gebale piiyepu ecni cama ge. Paulo abacitige teeme ute puupu cabu me, Acejiyame ne ewejanige, ime piba aacitige teeme papa cabu, siige teebine miiji me jwenige. <sup>9</sup> Peei te liba äbitige, iyeta pita biname pui curä cabu piba totninisi, siige Paulo teebibine miiji jwenemige. <sup>10</sup> Teipi nicärininisi bucourage owecu gwidape, cuta

piiyepu ingwe ca cine liba abyemärinago, teepi ecetnäremisi nuuja poo cabu cine lui gwidape gaabegabe tääpume singi ge.

### *Cine Malta Curä ca Naclige Rooma me*

<sup>11</sup> Nesae mabye ingwe ca, cine nuuja babo poo gaabe abyemärinago. Peei poo cuta Aleksandriya cewe cabu ca ge, lui te kokre buuwe padare ne jewagrijige Malta curä cabu. Poo me ngii lui 'Uuje Päädepäde' ge. <sup>12</sup> Cine malu cabu naclige, Surakusa cewe me atyarinago, puga ninajininige nesae bimu cama. <sup>13</sup> Puma cita ca cine cääri naclige, siige Regiyo cewe me atyarinago. Nuuja bimu uule buuwe te gije tabacitige äpwäjame, siige neeneni bimu ingwe ca cine atyarinago Puteoli matikolä cewe me. <sup>14</sup> Puga cine poto Yeesu ne ätrunga biname bine edäremisi. Teepi cibibine ni-wadininisi ten cama lenajame seben bimu cama. Cine piba doro ta abyemärinago Rooma cewe me otnime. <sup>15</sup> Rooma ätrunga biname cina liba iteci-jemige cime poto cidi me, cine cama opopa ayime seclige neeneni cewe mameta me, cewe ngii Aapi Aletna Puupu piiyepu Nesae Ute Mete. Paulo liba pui ätrunga biname bine jepänemige, Acejiyame ne eso ecärige binamewale tääpume, siige ngenecu kokre me äbitige.

### *Babo Cewe Roomaje*

<sup>16</sup> Cine liba atyarinago Rooma cewe me, Rooma krokeciyi mete ire atwi biname te jicige egä Paulo miiji ge mara mete cabu lenajame, yepä cubu biname te teebine awamutame.

<sup>17</sup> Rooma cewe cabu lui Israela modamoda biname cina icrajige, nesae bimu ingwe gaabe

ca Paulo teebibine ala tesoglecemige teeme bau abasecretname. Teepi liba abasecretnige, tabe jejemige teebibine egä, "Cäme binamewale, cane nuuja niiya ne lica ituge wawena mime biname täüpume, piiyepu nuuja niiya ne lica mime babewale bime mule poto cidi me, yepä teepi cebine noomlujisi, krokeciyiye mete cabu nacituji Yerusalema je, piba Rooma biname bime ime cabu nacituji. <sup>18</sup> Pui liba cebine nätemlepesi käme ireclota poto cidi me, teepi singi cebine asatame, ingle peeи ne jääpänepesi egä cane lica ituge nuuja niiya ne wawena lui täüpume cebine budre me wawename. <sup>19</sup> Yepä, poto Israela biname cina singi lica ge cane papa asatame. Cane peeи name pi mene jaajemepene egä cane singi ge Rooma Babo Mope Biname bau otnime tabe te cebine atraname. Yepä, käme nuuja aitna mene lica gyene käme Israela binamewale poto cidi me. <sup>20</sup> Cane peeи name pi weebibine ala bii tisoglicinine weebibine päpäname piiyepu weene cama mene me. Yoo, ai ayana seea pisi nyene käme ime cabu pui biname name pi Israela biname cina lui ne jewagrienisi mibibine niiya cabu ca äsecerame."

<sup>21</sup> Siige, Israela biname cina teebine jejisi egä, "Cine nuuja peba ne Yuudea cabu ca lica ituge päpäna määme poto cidi me, piiyepu cime nuuja biname lica itu tädepi puma cita ca idre mene cama coo aitna mene cama määme poto cidi me. <sup>22</sup> Yepä, cine singi gemi määme ngene atwana poto cidi me umle äbitame, ingle naace popi iyeta poto ta biname cina jääcelusi määme peeи sigu ne."

<sup>23</sup> Siige, teepi bimu ne ecitisi Paulo cama, piiyepu pui bimu liba joomlige, piba bucurage bi-

name cina seclige Paulo luma enajige. Krokerage ca ngälu ciye tabe mene cängena jejananemige, teebibine ebiberäjemige mene Acejiyame te lipu biname bine yaawademuge. Tabé singi teebibine ätrunga abiberäjame Yeesu poto cidi me, peei name pi mene jewabemige Moose me Cotre mene piiyepu sasa mename biname bime oogäräneji mene cabu ca. <sup>24</sup> Poto biname cina singi teeme mene acatame, yepä nuuja poto cina singi lica ätrungame. <sup>25</sup> Teepi äblicäco yepä ngene atwana oomlana, siige gije abacitinisi Paulo ne abmalame, yepä niinäce gaabe teeme otni, Paulo cuta yepä mene jejemige egä, "Toraca gyene Aceji Seemo me mene weeme kaakesaare bime bau me, mename biname Isaya me tagepogogo cabu ca, <sup>26</sup> tabe lui jiicuji egä:

‘Äte, ädi, ai biname bine jejemepi:

Weene itecijinuge cuta itecijinuge, yepä lica umle läbitininuye.

Weene ire lacitaninuye piiyepu ire lacitanin-  
uye, yepä weene lica jäätäpänuye.

<sup>27</sup> Ingle naace gyene ai biname bime ngene atwanena krokeciyiye gemi;  
teepi tablame buduma gemi;  
teepi irecu ätumuteji gemi.

Teepi apu liga lica cire läbitinnejisi,  
teepi piba irecu ca jäätäpänuye,  
tablame ca yäätecijanemuge,  
piiyyepu ngene atwanena ca opo yaawatnusi,  
siige käme bau me tatatrongärininus,  
siige cane Acejiyame te teebibine miiji me jaawenemune.’”

**28** Siige, Paulo piba jejemige egä, “Page weene miji gemi umle äbitame egä Acejiyame me Miji Mene biname bine niiya mule cabu ca äsecrera poto cidi me, peei ne ituge ätyepa gawe maramara biname bime bau me, piiyepu teepi singi gemi ätecijame.”

**29** Paulo peei mene jejemige, piba Israela biname cina teebine sebmalisi, yepä gaabe cabu ta teemeteme jicelisi.

**30** Yoo, neeneni kämäge ngalebora Paulo puga Rooma cewe cabu je enajige, rarekaake yääcäremuge teeme lenaja mete tääpume. Tabé iyeta biname bine jaawablemuge lui cina teeme bau me saacluge. **31** Tabé mene jaajanemuge Acejiyame te lipu biname bine yaawademuge; tabé cuta piiyepu biname bine yaabiberäjemuge Yageyame Yeesu Keriso poto cidi me. Tabé wälu cäco mene jaajanemuge iyeta biname bine. Nuuja te lica teebine jiibige.

Siige, ai peba me mene ngälu agesa.

**Ireclota Mene  
The New Testament in the Bine Language of Papua  
New Guinea  
Nupela Testamen long tokples Bine long Niugini**

Copyright © 1993 Bible Society of Papua New Guinea

Language: Bine

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-01-13

---

PDF generated using Haiola and XeLaTeX on 11 Nov 2022 from source files  
dated 9 Oct 2020

0b7e6c06-9d83-54ea-bc99-bd2fbdf2dfe4